



**DIUI AURELIJ
AUGUSTINI
HIPPONENSIS
EPISCOPI
MEDITATIONES...**

Aurelius santo Augustinus
(santo)





XIX B 18





D. Aurelij. Augustinij.
Hippon. Episcopi
MEDITATIONES
Soliloquia & Manuale
S. D. N. CLEMENTI X
DICATA.

BIBLIOTHECA REGIA
VATICANA
MANUSCRIPTA

ROMÆ



DIVI AVRELII
AVGVSTINI

HIPPONENSIS EPISCOPI
MEDITATIONES

SOLILOQVIA, ET MANVALE.

SANCTISSIMO DOMINO NOSTRO

CLEMENTI X.

D I C A T A.



R O M Æ,
Typis Bartholomei Lupardi. M.DC.LXXII.

SVPERIORVM PERMISSV.

Imprimatur,

Si videbitur Reuerendissimo Patri Magistro
Sac. Palat. Apostol.

I. de Ang. Archiep. Vrb. Vicesg.

Imprimatur iterum,

Fr. Hyacinthus Libellus Sac. Pal. Apost.
Magist.

I N D E X

C A P I T V M

MEDITATIONVM

DIVI AVRELII AVGVSTINI

Hipponensis Episcopi.

I Nuocatio Dei omnipotentis ad morum & vite reparationem.	Cap. 1
Hominis accusatio, & commendatio misericordiae diuinae.	2
Hominis conquestio, qui propter inobedientiam à Domino non auditur.	3
Indicis timor.	4
Inuocatur Pater per Filium.	5
Hic representat homo Patri passionem Filij.	6
Hic recognoscit homo se causam esse passionis.	7
Hic exponit homo Deo Patri passionem Filij in sui reconcilia- tionem.	8
De inuocatione Spiritus sancti.	9
Oratio serui Dei de se humiliter sentientis.	10
Oratio ad sanctam Trinitatem.	11
Confessio omnipotentis Dei, & maiestatis eiusdem.	12
Qualiter generi humano dignatus est subuenire Deus Pater, & de Verbi incarnatione, & gratiarum actione.	13
De fiducia quam habere debet anima in Domino Iesu, atque eius passione.	14
De immensa charitate Patris aeterni ad genus humanum.	15
De duplici Christi natura, qui nobis miseretur, & pro nobis in- terpellat.	16
De gratia quam habere debet homo Deo pro beneficio redemp- tionis.	17
Oratio deuotissima ad Christum.	18

Hic distinguit inter sapientiam, quæ domus Dei est, & sapien- tiam, quæ diuina est.	19
Hic orat homo, vt ipsa quoque domus Dei oret pro eo.	20
Quantis amaritudinibus vita ista sit respersa.	21
De felicitate vitæ, quam præparauit Deus diligentibus se.	22
De felicitate animæ sanctæ hinc exeuntis.	23
Oratio ad Sanctos, vt nobis succurrant in periculis.	24
Animæ desiderium ad ciuitatem supernam Hierusalem.	25
Hymnus de gloria paradisi, Petri Damiani Cardinalis Ostiensis, ex dictis B. Augustini.	26
Laus continua quam facit anima, ex contemplatione supernæ diuinitatis.	27
Quid sit quodammodo Deum cernere & tenere, & qualiter sit de Deo sentiendum.	28
Oratio explicans plurimas Dei proprietates.	29
De pluralitate personarum & vnitatem in Deo.	30
Oratio ad Sanctam Trinitatem.	31
Quod Deus vera & summa vita est.	32
Laus Angelorum & hominum.	33
Hic conqueritur homo quod non compungitur in contemplatio- ne, ex quo Angeli quoque tremunt Deum videntes.	34
Oratio cor multum mouens ad deuotionem, & diuinum amo- rem.	35
Oratio deuotissima ad laudes habendas.	36
In ista oratione mens humana copiosius compungitur, si in quiete dicatur.	37
Oratio in tribulatione.	38
Oratio multum deuota ad Filium.	39
Oratio utilis.	40
Oratio deuota de recordatione passionis Christi.	41



I N D E X

C A P I T V M

SOLILOQVIORVM

DIVI AVRELII AVGVSTINI

Hipponensis Episcopi.

	Câp. r.
D E ineffabili dulcedine Dei.	2
De miseria & fragilitate hominis.	3
De admirabili lumine Dei.	4
De mortalitate humanæ naturæ.	5
- Quid sit nihil fieri.	6
De casu animæ in peccatis.	7
De multiplicibus beneficijs Dei.	8
De dignitate hominis futura.	9
De omnipotentia Dei.	10
De incomprehensibili laude Dei.	11
- De spe erigenda ad Deum.	12
De laqueis concupiscentiarum.	13
De miseria hominis & beneficijs Dei.	14
- Quod Deus perpetua inspectione considerat opera & intentiones hominum.	15
Quod homo per se nihil potest sine diuina gratia.	16
De Diabolo & multiplicibus tentationibus eius.	17
Quod Deus est lux iustorum.	18
De beneficijs Dei.	19
De seruire dilectionis, vel charitatis.	20
Quod Deus subiecit omnia seruituti hominum.	21
Quod ex consideratione bonorum temporalium colligitur magnitudo celestis consilij.	22
Quod diuina dulcedo omnem presentem mundi amaritudinem tollit.	22

<i>Quod tota spes nostra & desiderium cordis nostri debeat esse in-</i>	
<i>- Deum .</i>	23
<i>Quod salus nostra ex Deo est .</i>	24
<i>Quod voluntas humana messicax sit ad bona opera sine diuina</i>	
<i>gratia .</i>	25
<i>De antiquis beneficijs Dei .</i>	26
<i>De Angelis deputatis ad custodiam hominum .</i>	27
<i>De profunda prædestinatione , & præscientia Dei .</i>	28
<i>De illis , qui prius sunt iusti , & postea impij efficiuntur , & e</i>	
<i>conuerso .</i>	29
<i>Quod anima fidelis sit sanctuarium Dei .</i>	30
<i>Quod neque per sensus exteriores , neque interiores inueniri po-</i>	
<i>test Deus .</i>	31
<i>- Confessio veræ fidei .</i>	32
<i>De confessione propriæ vilitatis .</i>	33
<i>Consideratio diuinæ maiestatis .</i>	34
<i>De desiderio & siri animæ ad Deum .</i>	35
<i>De gloriæ cælestis patriæ .</i>	36
<i>Oratio ad sanctam Trinitatem .</i>	37



I N D E X

C A P I T V M

M A N V A L I S

DIVI AVRELII AVGVSTINI

Hipponensis Episcopi.

P Refatio eiusdem ..	
De mirabili essentia Dei ..	Cap. r.
De incredibili scientia Dei ..	2.
De desiderio animæ sitientis Deum ..	3.
De miseria animæ, quæ Dominum nostrum Iesum Christum non amat, nec quærit ..	4.
De desiderio animæ ..	5.
De felicitate animæ, à terreno carcere resolutæ ..	6.
De gaudio Paradisi ..	7.
De regno cælorum ..	8.
Quomodo post nimios ploratus, mæstam animam consolatur Deus ..	9.
De dulcedine diuini amoris ..	10.
De præparatione nostræ redemptionis ..	11.
De gaudio ..	12.
Quod Verbum incarnatum sit causa spei nostræ ..	13.
Quod quanto maior sit de Deo meditatio, tanto sit & dul- cior ..	14.
* Quod desiderandæ sint pro Christo tribulationes in hac vita ..	15.
Quomodo regnum cælorum possit acquiri ..	16.
Quid sit, & quid habeat Paradisus ..	17.
Quod homo non valet Deo vicem reddere, nisi per amorem ..	18.
Quod in nobis Deus requirat sibi simile ..	19.
De confidentia animæ amantis Deum ..	20.
Quid fecit Deus propter hominem ..	21.
De ..	

<i>De recordatione vulnerum Iesu Christi D.N.</i>	22
<i>Quod recordatio vulnerum Christi est efficax remedium contra</i>	
<i>omnes aduersitates.</i>	23
<i>Meditatio ad amorem Christi.</i>	24
<i>Nihil potest animæ sufficere præter summum bonum.</i>	25
<i>Quid sit cognitio veritatis.</i>	26
<i>Quid in nobis operetur missio Spiritus sancti.</i>	27
<i>De operatione eius qui diligit Deum.</i>	28
<i>De vera cordis requie.</i>	29
<i>Quicquid mentis aspectum à Deo retrahit, omnino fugiendum</i>	
<i>est, atque execrandum.</i>	30
<i>Quod visio Dei perdita sit propter peccatum, & miseria inuenta</i>	
<i>sit.</i>	31
<i>De bonitate Dei.</i>	32
<i>De delectabili fruitione Dei.</i>	33
<i>Summum bonum appetendum est.</i>	34
<i>De mutua charitate Sanctorum in cælis.</i>	35
<i>De pleno gaudio vite æternæ.</i>	36



C A P V T I.



re : da Domine Deus meum cordi meo poenitentiam, spiritui contritionem, oculis lachrymarum fontem, manibus eleemosynæ largitatem. Rex meus, extingue in me desideria carnis, & accende ignem tui amoris. Redemptor mei, expelle à me spiritum superbiæ, & concede propitius thesaurum humilitatis tuæ. Saluator mei, amoue à me furorem iræ, & indulge mihi benignus scutum patientiæ. Creator mei, euelle à me animi rancorem, & largire.

gire mihi mitis mentis dulcedinem. Da clementissime Pater mihi solidam fidem, spem congruam, charitatem continuam.

2 Rector mei, auerte à me vanitatem, mentis inconstantiam, cordis vagationem, oris scurrilitatem, oculorum elationem, ventris ingluuiem, opprobria proximorum, scelera detractionum, curiositatis pruriginem, diuitiarum cupidinem, potentatum rapinam, inanis gloriæ appetitum, hypocrisis malum, adulationis venenum, contemptum inopum, oppressionem debilium, auaritiæ ardorem, inuidiæ rubiginem, blasphemiæ mortem. Reseca in me, factor mei, temeritatem, iniquitatem, pertinaciam, inquietudinem, otiositatem, somnolentiam, pigritiam, mentis hebetudinem, cordis cæcitatem, sensus obstinationem, morum triculentiam, boni inobedientiam, consilij repugnantiam, linguæ effrenationem, pauperum prædam, impotentium violentiam, innocentum calumniam, subditorum negligentiam, circa domesticos seueritatem, aduersus familiares impietatem, erga proximos duritiam.

3 Deus meus, misericordia mea, oro te per dilectum Filium tuum, da mihi misericordiae opera, pietatis studia: compati afflictis, consulere erroneis, succurrere miseris, subuenire egenis, consolari moestos, releuare oppressos, pauperes recreare, flebiles refouere, dimittere debitoribus, parcere in me peccantibus, odientes me diligere, pro malis bona reddere, neminem despiciere, sed honorare; bonos imitari, malos cauere, virtutes amplecti, vitia reijcere: in aduersis patientiam, in prosperis continentiam, custodiam oris, & ostium circumstantiae labijs meis: terrena calcare, coelestia sitire.

CAPVT II.

*Hominis accusatio, & commendatio misericordiae
Diuinae.*

1 **E**Cce psalmator mei, multa rogaui, qui nec pauca promerui. Fateor, heu fateor, non solum quae postulo non debentur dona, sed multa & exquisita supplicia. Animant tamen me publicani, meretrices, & latrones;

trones; qui à faucibus hostis momentaneè eruti, sinibus excipiuntur pastoris. Tu enim factor omnium Deus, licet in cunctis operibus tuis sis mirabilis, mirabilior tamen crederis esse in operibus pietatis. Vnde de temetipso, per quendam tuum seruum dixisti: Miserationes eius super omnia opera eius. Et quasi de singulo loquentem, de vniuerso populo tuo te dixisse confidimus: Misericordiam autem meam non dispergam ab eo. Nullum enim spernis, neminem abijcis, neminem perhorrescis; nisi forte qui amens, te exhorruerit.

2. Ergo non iratus modo non percutis, sed te irritantibus dona, si quæsierint, tribuis. Deus meus, cornu salutis meæ, & susceptor mei, ego infelix, ego te irritaui, ego malum coram te feci; furorem tuum prouocaui, iram promerui; peccaui, & passus es; deliqui, & adhuc sustines. Si pœniteo, parcis; si reuertor, suscipis; insuper dum differo, præstolaris. Reuocas errantem, inuitas repugnantem, expectas torpentem, amplexaris redeuntem, doces ignorantem, moerentem mulces; à ruina suscitās, post lapsum reparas, petenti largiris,

giris, quærenti inueniris, & pulsanti aperis. Ecce Domine Deus salutis meæ, quid opponam, nescio; quomodo respondeam, ignoro. Nullum abste confugium, nullum à te patet latibulum. Ostendisti mihi bene viuēdi viam, & gradiendi scientiam dedisti; minatus es mihi gehennam, & pollicitus es mihi paradisi gloriam.

3 Nunc Pater misericordiarum & Deus totius consolationis, confige timore tuo carnes meas, quatenus quæ minaris metuendo euadam; & redde mihi lætitiā salutaris tui, vt quæ spondes diligendo percipiam. Fortitudo mea Domine, firmamentum meum, Deus meus, refugium meum, & liberator meus: suggere, quid de te cogitem; doce, quibus te sermonibus inuocem; da, quibus operibus tibi placeam. Scio namque, scio vnum, quo tu placaris; & aliud, quod non spernis. Est utique tibi spiritus contribulatus sacrificium, & acceptas cor contritum & humiliatum. His me Deus meus, adiutor meus, dita muneribus. His contra inimicum muni protectionibus; hoc de flammis vitiorum præsta refrigerium;

6 MEDITATIONES

his autem desideriorum passionibus pande-
pium refugium.

4 Fac Domine virtus salutis meæ, ne sim
de numero eorum, qui ad tempus credunt, &
in tempore tentationis recedunt. Obumbra
caput meum in die belli, spes mea in die affli-
ctionis, & salus in tempore tribulationis.

5 En Domine illuminatio mea, & salus
mea, rogavi, quibus egeo; intimaui, quæ ti-
meo; sed remordet me conscientia, reprehē-
dunt me cordis secreta; & quod amor mini-
strat, timor dissipat, zelus incitat, metus in-
crepat. Acta mea formidinem, sed tua inge-
rit pietas fiduciam; tua hortatur benignitas,
mea tardat malignitas. Et, vt verius fatear, oc-
currunt memoriæ phantasmata vitiorum, quæ
reuerberant audaciā præsumentiū animorū.

C A P V T I I I.

*Hominis conquestio, qui propter inobedientiam a
Domino non auditur.*

1 **C**Um enim quis odio dignus sit, qua-
fronte gratiam requirit? Cui poena
debe-

debetur, quæ temeritate gloriam deposcit? Laceffit iudicem, qui postposita satisfactione delicti quærit præmijs honorari. Regi insultat obnoxius supplicio, qui donari flagitat indebito brauiò; & dulcem affectum patris stultus exacerbat filius, qui post illatas contumelias ante pœnitudinẽ hæreditatis vsurpat celsitudinem. Quid, mi Pater, me gessisse recolo? Merui mortem, & peto vitam. Commouî regem meum, cuius impudens inuoco præsidium. Contempsi iudicem, quem temere postulo adiutorem. Insolens renui audire Patrem, quem demum præsumo habere tutorẽ.

2 Heu mihi quam sero venio: heu, heu, quam tarde festino: heu me, quia curro post vulnera, dedignans incolumis præcauere iacula. Neglexi prospicere tela, modò verò sollicitor de morte vicina. Vulnera vulneribus inflexi, quia scelera sceleribus addere non timui: Recenti cicatrices labe respersi, quia prisca flagitia modernis iniquitatibus reciprocaui; & quæ diuina solidauerat medicina, mea resoluit prurigo phrenetica. Cutis quæ superducta vulneribus morbum celauerat, san-

nie erumpente putruit: quia iterata iniquitas, concessam misericordiam exinaniuit. Noui quippe scriptum: In quacunque hora iustus peccauerit, omnes iustitiæ eius obliuiscuntur. Si iustitia aboletur iusti ruentis, quanto magis poenitentia peccatoris in idipsum reuertentis? Quoties vt canis redij ad vomitum, & quasi sus repetij volutabrum?

3 Fateor, quia mihi recordari est impossibile, quod mortalium ignorantes peccare docui, nolentibus delinquere persuasi, resistentes coëgi, volentibus consensi: Quod sane gradientibus laqueum induxi, viam querentibus foueam retexi, vt patrare non horrerem, obliuisci non metui. Sed tu iustus iudex signans peccata, quasi in sacco obseruasti omnes semitas meas, & cunctos gressus meos dinumerasti. Tacuisti semper, siluisti, patiens fuisti. Væ mihi, demum loqueris quasi parturiens.

CAPVTV IV.

Iudicis timor.

DEus deorum, Domine præstabilis super malitia; noui, quia manifestus venies; noui, quia non semper filebis, cum in conspectu tuo ignis exardescet, & in circuitu tuo tempestas valida ingruerit; cum aduocaueris cœlum desuper, & terram discernere populum tuum. Et ecce coram tot milibus populorum nudabuntur omnes iniquitates meæ; tot agminibus Angelorum patebunt vniuersa scelera mea, nō solum actuum, sed etiam cogitationum, simulque loquutionum. Tot iudicibus inops astabo, quot me præcesserunt in opere bono. Tot arguentibus confundar, quot mihi præbuerunt bene viuendi exemplar. Tot conuincar testibus, quot me monuerunt proficuis sermonibus, seque imitandos iustis dederunt actionibus. Domine mi, non suppetit, quid dicam; non occurrit, quid respondeam. Et cum iam inter sim saeuo illi discrimini, torquet me conscientia-

10 MEDITATIONES

scientia, cruciant cordis arcana, coarctat auaritia, accusat superbia, consumit inuidia. Inflammat concupiscentia, infestat luxuria, dehonestat gula, ebrietas confutat; detractio lacerat, ambitio supplantat, rapacitas obiurgat, discordia dissipat, ira perturbat, lenitas dissoluit, torpor opprimit, hypocrisis fallit; adulatio frangit, fauor attollit, calumnia pungit.

2. Ecce, liberator meus de gentibus iracundis. Ecce cum quibus vixi à die natiuitatis meae, quibus & studui, quibus & fidem seruaui. Ipsa me, quae dilexeram, studia damnant; quae laudaueram, vituperant. Hi sunt, quibus acquieui, amici; quibus parui, magistri; & quibus seruiui, domini: Confules quibus credidi, ciues quibus cohabitaui, domestici quibus consensi. Heu mihi, Rex meus & Deus meus: quia incolatus meus prolongatus est. Vae mihi, illuminatio mea, qui habitaui cum habitantibus Cedar. Et cum David sanctus dixerit multum, quanto magis ego infelix dicere possum? Nimis incola fuit anima mea. Firmamentum Deus meus, non iusti-

iustificabitur in conspectu tuo omnis viuens. Spes mea non est in filiis hominum. Quem, si remota pietate iudicaueris, iustū inuenies? Et nisi præueneris miserando implum, non est qui glorificet pium.

3 Credo namque, salus mea, qui audiui quoniam benignitas tua ad pœnitentiam me adducit; tui oris mihi sonuerunt nectarea labia: Nemo potest venire ad me, nisi Pater meus, qui misit me, traxerit eum. Enimuero quia me instruxisti, tanquam propitius instructione formasti, totis medullis cordis, toto nisu mentis, rogo te omnipotens Pater, cum dilectissimo Filio tuo; teque dulcissima proles, cum serenissimo inuoco Paracleta, trahere me, quatenus post te curram in odorem unguentorum tuorum dulciter.

C A P V T V.

Inuocatur Pater per Filium.

INuoco te Deus meus, inuoco te: quia prope es omnibus inuocantibus te in veritate. Tu enim veritas es: doce me (quæso)

perfecta, in odorem suauitatis oblata, & accepta. Ecce agnus sine macula, qui coram se tondentibus obmutuit; qui a lapis cæsus, spiritus illitus, opprobrijs affectus, os suum non aperuit. En, qui peccatum non fecit, peccata nostra pertulit, & languores nostros suo liuore sanauit.

CAP. V. T. VI.

*Hic præsentat homo Patri passionem
Filij.*

A Spice pie Pater pijsimum Filium, pro me tam impia passum. Respice clementissime Rex, quis patitur, & remiscere benignus, pro quo patitur. Nonne hic est, mi Domine, innocens ille, quem, vt seruum redimeres, filium tradidisti? Nunquid non auctor vitæ hic est, qui, vt ouis ad occisionem ductus, tibi que vsque ad mortem obediens factus, atrocissimæ non timuit necis genus subire? Recole totius salutis dispensator, quia hic est ipse, quem etsi ex tua virtute genuisti, meæ tamen infirmitatis participem

cipem fieri voluisti. Vere hæc est tua Deitas, quæ meam induit naturam; crucis ascendit patibulum, quæ in assumpta carne triste tulit supplicium. Reduc, Domine Deus meus, oculos tuæ Maiestatis super opus ineffabilis pietatis. Intuere dulcem natum, toto corpore extensum. Cerne manus innoxias pio manantes sanguine: & remitte placatus scelera, quæ patrarunt manus meæ. Considera inermē latus crudeli perfossū cuspide, & renoua me sacro fonte, quem inde credo fluxisse.

2 Vide immaculata vestigia, quæ non steterunt in via peccatorum, sed semper ambulauerunt in lege tua diris confixa clauis: & perforce gressus meos in semitis tuis, & fac me odio habere benignus omnes vias iniquitatis. Viam iniquitatis amoue à me, & fac me, propitius viam veritatis eligere. Oro te Rex Sanctorum, per hunc Sanctum Sanctorum, per hunc Redemptorem mei: fac me currere viam mandatorum tuorum, vt ei valeam spiritu vniri, qui mea non horruit carne vestiri. Nunquid non attendis pie Pater, adolescen-
tis

trones; qui à faucibus hostis momentaneè eruti, sinibus excipiuntur pastoris. Tu enim factor omnium Deus, licet in cunctis operibus tuis sis mirabilis, mirabilior tamen crederis esse in operibus pietatis. Vnde de temetipso, per quendam tuum seruum dixisti: Miserationes eius super omnia opera eius. Et quasi de singulo loquentem, de vniuerso populo tuo te dixisse confidimus: Misericordiam autem meam non dispergam ab eo. Nullum enim spernis, neminem abijcis, neminem perhorrescis; nisi forte qui amens, te exhorruerit.

2. Ergo non iratus modo non percutis; sed te irritantibus dona, si quæsierint, tribuis. Deus meus, cornu salutis meæ, & susceptor mei, ego infelix, ego te irritaui, ego malum coram te feci; furorem tuum prouocaui, iram promerui; peccaui, & passus es; deliqui, & adhuc sustines. Si pœniteo, parcis; si reuertor, suscipis; insuper dum differo, præstolaris. Reuocas errantem, inuitas repugnantem; expectas torpentem, amplexaris redeuntem; doces ignorantem, mœrentem mulces; à ruina suscitās, post lapsum reparas, petenti largiris,

giris, quærenti inueniris, & pulsanti aperis. Ecce Domine Deus salutis meæ, quid opponam, nescio; quomodo respondeam, ignoro. Nullum abste confugium, nullum à te patet latibulum. Ostendisti mihi bene viuēdi viam, & gradiendi scientiam dedisti; minatus es mihi gehennam, & pollicitus es mihi paradisi gloriam.

3 Nunc Pater misericordiarum & Deus totius consolationis, confige timore tuo carnes meas, quatenus quæ minaris metuendo euadam; & redde mihi lætitiā salutaris tui, vt quæ spondes diligendo percipiam. Fortitudo mea Domine, firmamentum meum, Deus meus, refugium meum, & liberator meus: suggere, quid de te cogitem; doce, quibus te sermonibus inuocem; da, quibus operibus tibi placeam. Scio namque, scio vnum, quo tu placaris; & aliud, quod non spernis. Est utique tibi spiritus contribulatus sacrificium, & acceptas cor contritum & humiliatum. His me Deus meus, adiutor meus, dita muneribus. His contra inimicum muni protectionibus; hoc de flammis vitiorum præsta refrigerium;

his autem desideriorum passionibus pande-
pium refugium.

4 Fac Domine virtus salutis meæ, ne sim
de numero eorum, qui ad tempus credunt, &
in tempore tentationis recedunt. Obumbrā
caput meum in die belli, spes mea in die affli-
ctionis, & salus in tempore tribulationis.

5 En Domine illuminatio mea, & salus
mea, rogavi, quibus egeo; intimaui, quæ ti-
meo; sed remordet me conscientia, reprehē-
dunt me cordis secreta; & quod amor mini-
strat, timor dissipat, zelus incitat, metus in-
crepat. Acta mea formidinem, sed tua inge-
rit pietas fiduciam; tua hortatur benignitas,
mea tardat malignitas. Et, vt verius fatear, oc-
currunt memoriæ phantasmata vitiorum, quæ
reuerberant audaciā præsumentiū animorū.

C A P V T I I I.

*Hominis conquestio, qui propter inobedientiam a
Domino non auditur.*

1 **C**Um enim quis odio dignus sit, qua
fronte gratiam requirit? Cui pœna
debe-

debetur, qua temeritate gloriam deposcit? Laceffit iudicem, qui postposita satisfactione delicti quærit præmijs honorari. Regi insultat obnoxius supplicio, qui donari flagitat indebito brauius; & dulcem affectum patris stultus exacerbat filius, qui post illatas contumelias ante poenitudinē hæreditatis vsurpat celsitudinem. Quid, mi Pater, me gessisse recolo? Merui mortem, & peto vitam. Commo- ui regem meum, cuius impudens inuoco præsidium. Contempsi iudicem, quem temere postulo adiutorem. Insolens renui audire Patrem, quem demum præsumo habere tutorē.

2 Heu mihi quam sero venio: heu, heu, quam tarde festino: heu me, quia curro post vulnera, dedignans incolumis præcauere iacula. Neglexi prospicere tela, modò verò sollicitor de morte vicina. Vulnera vulneribus inflexi, quia scelera sceleribus addere non timui: Recenti cicatrices labe respersi, quia prisca flagitia modernis iniquitatibus reciprocaui; & quæ diuina solidauerat medicina, mea resoluit prurigo phrenetica. Cutis quæ superducta vulneribus morbum celauerat, san-

8 MEDITATIONES

nie erumpente putruit: quia iterata iniquitas, concessam misericordiam exinaniuit. Noui quippe scriptum: In quacunque hora iustus peccauerit, omnes iustitiæ eius obliuiscuntur. Si iustitia aboletur iusti ruentis, quanto magis poenitentia peccatoris in id ipsum reuertentis? Quoties vt canis redij ad vomitum, & quasi sus repetij volutabrum?

3 Fateor, quia mihi recordari est impossibile, quod mortalium ignorantes peccare docui, nolentibus delinquere persuasi, resistentes coëgi, volentibus consensi: Quod sane gradientibus laqueum induxi, viam querentibus foueam retexi, vt patrare non horrerem, obliuisci non metui. Sed tu iustus iudex signans peccata, quasi in sacco obseruasti omnes semitas meas, & cunctos gressus meos dinumerasti. Tacuisti semper, siluisti, patiens fuisti. Væ mihi, demum loqueris quasi parturiens.

C A P I T V L V.

Iudicis timor.

DEus deorum, Domine præstabilis super malitia; noui, quia manifestus venies; noui, quia non semper filebis, cum in conspectu tuo ignis exardescet, & in circuitu tuo tempestas valida ingruerit; cum aduocaueris coelum desuper, & terram discernere populum tuum. Et ecce coram tot milibus populorum nudabuntur omnes iniquitates meæ; tot agminibus Angelorum patebunt vniuersa scelera mea, nō solum actuum, sed etiam cogitationum, simulque loquutionum. Tot iudicibus inops astabo, quot me præcesserunt in opere bono. Tot arguentibus confundar, quot mihi præbuerunt bene viuendi exemplar. Tot conuincar testibus, quot me monuerunt proficuis sermonibus, seque imitandos iustis dederunt actionibus. Domine mi, non suppetit, quid dicam; non occurrit, quid respondeam. Et cum iam intersim seuo illi discrimini, torquet me conscientia.

10 MEDITATIONES

scientia, cruciant cordis arcana, coarctat auaritia, accusat superbia, consumit inuidia. Inflammat concupiscentia, infestat luxuria, dehonestat gula, ebrietas confutat; detractio lacerat, ambitio supplantat, rapacitas obijurat, discordia dissipat, ira perturbat, lenitas dissoluit, torpor opprimit, hypocrisis fallit; adulatio frangit, fauor attollit, calumnia pungit.

2 Ecce, liberator meus de gentibus incunctis. Ecce cum quibus vixi à die natiuitatis meae, quibus & studui, quibus & fidem seruaui. Ipsa me, quae dilexeram, studia damnant; quae laudaueram, vituperant. Hi sunt, quibus acquieui, amici; quibus parui, magistri; & quibus seruiui, domini: Confusiles quibus credidi, ciues quibus cohabitaui, domestici quibus consensi. Heu mihi, Rex meus & Deus meus: quia incolatus meus prolongatus est. Vae mihi, illuminatio mea, qui habitaui cum habitantibus Cedar. Et cum Dauid sanctus dixerit multum, quanto magis ego infelix dicere possum? Nimis incola fuit anima mea. Firmamentum Deus meus, non iusti-

iustificabitur in conspectu tuo omnis viuens. Spes mea non est in filiis hominum. Quem, si remota pietate iudicaueris, iustū inuenies? Et nisi præueneris miserando implum, non est qui glorificet pium.

3 Credo namque, salus mea, qui audiui quoniam benignitas tua ad pœnitentiam me adducit; tui oris mihi sonuerunt nectarea labia: Nemo potest venire ad me, nisi Pater meus, qui misit me, traxerit eum. Enimuero quia me instruxisti, tanquam propitius instructione formasti, totis medullis cordis, toto nisu mentis, rogo te omnipotens Pater, cum dilectissimo Filio tuo; teque dulcissima proles, cum serenissimo inuoco Paracleta, trahere me, quatenus post te curram in odorem unguentorum tuorum dulciter.

C A P V T V.

Inuocatur Pater per Filium.

INuoco te Deus meus, inuoco te: quia prope es omnibus inuocantibus te in veritate. Tu enim veritas es: doce me (quæso)

12 MEDITATIONES

fo) per clementiam tuam, sancta Veritas, doce me inuocare te in veritate, quia hoc fieri quomodo oporteat, nescio; sed à te doceri, beata Veritas, humiliter imploro. Absque te enim sapere, est desipere; te vero nosse, est perfecte scire. Erudi me diuina sapientia, & doce me legem tuam. Credo namque, beatus erit, quem tu erudieris, & de lege tua docueris eum. Desidero inuocare te, quod quæso fiat in veritate. Quid est in veritate inuocare Veritatem, nisi in Filio Patrem? Ergo sancte Pater, sermo tuus veritas est, principiumque verborum tuorum veritas; hoc quippe est verborum tuorum principium, quod in principio erat Verbum. In ipso principio te summum adoro principium. In ipso veritatis verbo, te perfecta inuoco Veritas, in quo ipsa eadem veritas, dirigas me in veritate & doceas.

2 Quid enim est dulcius, quam genitorem in nomine vnigeniti inuocare? Patrem in recordatione Filij ad pietatem inflectere? Regem, charissimæ sobolis denominatione mitigare? Sic enim solent rei carceribus eri-

pi,

pi., sic commancipati vinculis liberari; sic tristem accipientes sententiam capitis, non solum absolui, sed insuper nancisci insolitam gratiam; dummodo iratis Principibus dilectæ prolis intimauerint Châritatem. Sic delinquentes seruuli euadunt supplicia dominorum, dum pro eis interuenit dulcedo filiorû. Sic te omnipotens Pater per omnipotentis Filij charitatem postulo, educ de carcere ad confitendum nomini tuo, animam meam. Libera me à vinculis peccatorum; per coæternum flagito vnicum tibi natum; meque, cui propria merita, lethalem minantur sententiam, preciosissimæ ad dexterâ tuam confidentis prolis interpellatione restaura placatus ad vitam.

31 Quem enim alium dirigam intercessorem tibi, nescio, nisi hunc, qui est propitiatio pro peccatis nostris; qui sedet ad dexteram tuam, interpellans pro nobis. Ecce aduocatus meus, apud te Deum Patrem. Ecce Pontifex Summus, qui non alieno eget expiari sanguine; quia proprio refulget perfusus cruore. Ecce hostia sancta, beneplacens & per-

perfecta, in odorem suauitatis oblata, & accepta. Ecce agnus sine macula, qui coram se tondentibus obmutuit; qui a lapis cæsus, spiritibus illitus, opprobrijs affectus, os suum non aperuit. En, qui peccatum non fecit, peccata nostra pertulit, & languores nostros suo liuore sanauit.

C A P. V T V I.

*Hic præsentat homo Patri passionem
Filij.*

A Spice pie Pater pijsimum Filium, pro me tam impia passum. Respice clementissime Rex, quis patitur, & remiscere benignus, pro quo patitur. Nonne hic est, mi Domine, innocens ille, quem, vt seruum redimeres, filium tradidisti? Nunquid non auctor vitæ hic est, qui, vt ouis ad occisionem ductus, tibi que vsque ad mortem obediens factus, atrocissimæ non timuit necis genus subire? Recole totius salutis dispensator, quia hic est ipse, quem etsi ex tua virtute genuisti, meæ tamen infirmitatis participem

cipem fieri voluisti. Vere hæc est tua Deitas, quæ meam induit naturam; crucis ascendit patibulum, quæ in assumpta carne triste tulit supplicium. Reduc, Domine Deus meus, oculos tuæ Maiestatis super opus ineffabilis pietatis. Intuere dulcem natum, toto corpore extensum. Cerne manus innoxias pio manantes sanguine: & remitte placatus scelera, quæ patrarunt manus meæ. Considera inermē latus crudeli perfossū cuspide, & renoua me sacro fonte, quem inde credo fluxisse.

2 Vide immaculata vestigia, quæ non steterunt in via peccatorum, sed semper ambulauerunt in lege tuā diris confixa clauis: & perforce gressus meos in semitis tuis, & fac me odio habere benignus omnes vias iniquitatis. Viam iniquitatis amoue à me, & fac me, propitius viam veritatis eligere. Oro te Rēx Sanctorum, per hunc Sanctum Sanctorum, per hunc Redemptorem mei: fac me currere viam mandatorum tuorum, vt ei valeam spiritu vniri, qui mea non horruit carne vestiri. Nunquid non attendis pie Pater, adolescentis

tis filij charissimi caput niuea ceruicē deflexa
preciosissimum resolutum in mortem? Aspi-
ce mitissime conditor, dilectæ sobolis huma-
nitatem, & miserere super infirmi plasmatis
debilitatem.

3 Candet nudum pectus, rubet cruentū
latus, tensa arent viscera, decora languent
lumina, regia pallent ora, procera rigent
brachia, crura pendent marmorea, rigat te-
rebratos pedes beati sanguinis vnda. Specta,
gloriose genitor gratissimæ prolis lacerata
membra; & memorare benignus, quæ mea
est substantia. Conspicere Dei hominis pœ-
nam, & relaxa conditi hominis miseriam.
Vide Redemptoris supplicium, & redempti
dimitte delictum. Hic est, Domine mi, quem
propter peccata populi tui percussisti, licet
ipse sit dilectus in quo tibi bene placuisti.
Hic est ille innocens, in quo dolus non est
inuentus, & tamen inter iniquos deputatus
est.

CAPVTVII.

Hic recognoscit homo se causam esse Passionis.

Quid commisisti, dulcissime puer, ut sic iudicareris? Quid commisisti, amantissime iuuenis, ut adeo dure tractareris? Quod scelus tuum, quæ noxa tua, quæ causa mortis, quæ occasio tuæ damnationis? Ego, ego sum tui plaga doloris, tuæ culpæ occisionis. Ego tuæ mortis meritum, tuæ vindictæ flagitium: Ego tuæ passionis liuor, tui cruciatus labor. O admirabilis censuræ conditio, & ineffabilis mysterij dispositio! peccat iniquus, & punitur iustus. Delinquit reus, & vapulat innocens. Offendit impius, & damnatur pius. Quod meretur malus, patitur bonus, quod perpetrat feruus, exsoluit Dominus; quod committit homo, sustinet Deus. Quo nate Dei, quo tua descendit humilitas? Quo tua flagrauit charitas? Quo processit pietas? Quo excreuit benignitas? Quo tuus attigit amor? Quo peruenit compassio?

18 MEDITATIONES

2 Ego enim inique egi, tu poena multaris. Ego facinus admisi, tu ultione pleris. Ego crimen edidi, tu torturæ subijceris. Ego superbiui, tu humiliaris. Ego tumui, tu attenuaris. Ego inobediens extiti, tu obediens scelus inobedientiæ luis. Ego gulæ parui, tu inedia afficeris. Me ad illicitam concupiscentiam rapuit arbor, re perfecta charitas duxit ad crucem. Ego præsumpsi vetitum, tu subijisti equuleum. Ego delector cibo, tu laboras patibulo. Ego fruor delicijs, tu laniaris clavis. Ego pomi dulcedinem, tu fellis gustas amaritudinem. Mihi ridens congaudet Eua, tibi plorans compatitur Maria. Ecce Rex gloriæ. Ecce mea impietas, & tua claret pietas. En mea iniustitia, & tua liquet iustitia.

3 Quid Rex meus, & Deus meus, quid retribuam tibi pro omnibus, quæ retribuisti mihi? Non enim inueniri potest in corde hominis, quod condignè talibus referatur præmijs. Numquid sagacitas machinari potest humana, cui comparetur misratio diuina? Nec est creaturæ moliri officium, quo iuste

iuste creatoris recompenset præsidium. Est autem nate Dei in hac tua admirabili dispensatione, est cui fragilitas mea in aliquo suppetit, si tua visitatione compuncta mens, carnem suam crucifigat cum vitijs, & concupiscentijs. Et hoc cum à te conceditur, quasi tam tibi incipit compati; quia & tu pro peccato meo dignatus es mori. Sicque per interioris hominis victoriam, te duce armabitur ad exteriorē palmam; quatenus deuicta persequutione spirituali, non vereatur pro amore tui subijci gladio materiali. Ita exiguitas conditionis, si tuæ complaceat pietati, magnitudini valebit pro viribus respondere Creatoris. Et hæc cœlestis medicina, bone Iesu, hoc tui antidotum amoris. Oro te per antiquas misericordias tuas, infunde vulneribus meis, quo reiecta vipereæ contagionis bile reintegret me incolumitati pristinæ; quo gustato tuæ nectare suauitatis, faciat me illecebrosa mundi toto affectu despicere, & nulla eius aduersa pro te formidare, memorque perpetuæ nobilitatis semper fastidiam ventos huius transitorij timoris.

4 Nihil (quæso) sine te, mihi dulcescat; nihil complaceat, nil pretiosum, nihil præter te mihi arrideat speciosum. Vilescant, obsecro, absque te mihi omnia, sordeant vniuersa. Quod tibi aduersum est, sit mihi molestum; & tuum beneplacitum, mihi indeficiens desiderium. Tædeat me gaudere sine te, & delectet contristari pro te. Sit mihi nomen tuum refocillatio, & memoria tui consolatio: fiant mihi lachrymæ meæ panes die, ac nocte inuestigando iustificationes tuas; sit bonum mihi lex oris tui, super millia auri, & argenti. Sit obedire tibi mihi amabile; & resistere tibi execrabile. Rogo te, spes mea, per omnes pietates tuas, vt propitieris impietatibus meis. Adaperi aures meas mandatis tuis, & ne declines (flagito) per nomen sanctum tuum in verba malitiæ cor meum, ad excusandas excusationes in peccatis. Peto etiam per admirabilem humilitatem tuam, ne veniat mihi pes superbiæ; & manus peccatoris non moueat me.

C A P V T V I I I.

*Hic exponit homo Deo Patri passionem Filij in
sui reconciliationem.*

ECce omnipotens Deus Pater Domini
mei, dispone benignus, quo mise-
rearis mei, quoniam quicquid preciosius in-
ueni, deuote obtuli; quicquid charius repe-
ri, suppliciter præsentavi. Nihil mihi reli-
qui, quin tuæ exposuerim Maieſtati; nihil iam
ſupereſt, quod adiſciam: quia totam tibi de-
legauī ſpem meam. Direxi tibi aduocatum
meum, dilectum Filium tuum. Miſi glorio-
ſam progeniem, inter me & te mediatorem:
Miſi, inquam, interceſſorem, per quem con-
fido veniam. Miſi verbis Verbum, quod pro
meis dixi miſſum factis, & numerauī tibi ſan-
ctiſſimæ ſobolis paſſionem, quam pro me
credo fuiſſe perpeſſam. Credo à te miſſam
deitatem, meam ſuſcepſiſſe humanitatem; in
qua dignum duxit alapas, vincula, ſputa, ir-
riſiones perferre, nec non crucem, clauos te-
lumque ſuſcipere. Hanc olim infantiaē vagi-
tibus

22 MEDITATIONES

tibus demolitam, pueritiæ pannis constrictâ,
iuuentutis sudoribus vexatam, ieiunijs mace-
ratam, vigilijs afflictam, itineribus fessam,
postea affectam flagris, laceratam supplicijs,
deputatam cum mortuis, dotatam gloria re-
surrectionis, cœlorum gaudio induxit, & in
dexteram tuæ celsitudinis collocavit. Hæc
placatio mea, & propitiatio tua.

2 Hic attende pius, quem genueris fi-
lium, & quem redemeris seruum. Hic aspice
factorem, & ne despicias facturam. Ample-
ctere serenus pastorem, & respice misericors
allatam proprijs humeris ouem. Hic est fi-
delissimus pastor ille, qui ouem dudum erra-
bundam per abrupta montium, per præcipi-
tia vallium, multis varijsque quæsierat labo-
ribus. Quique iam morienti, iam per longa
exilia deficienti, tandem inuentæ gaudens se
supposuit, & miro sibi annisu charitatis anne-
xam, de profunda confusionis abyssu leuauit,
pijsque astrictam complexibus, ad nonagin-
ta nouem vnâ, quæ perierat, reportauit.

3 Ecce Domine mi rex, Deus omnipo-
tens, ecce Pastor bonus refert tibi, quod cō-
misisti

misisti ei. Suscepit te disponente ad saluandum hominem, quem tibi restituit omni labe immunem. Ecce tuum tibi clarissimus natus plasma reconciliauit, quod à te procul deuiauit. En, gregi tuo Pastor mitis reportat, quod prædo violentus abegerat. Reddit tuis conspectibus seruum, quem sua fecerat conscientia fugitiuum; vt qui per se meruit poenam, per satisfactionem huius mereatur veniam, cuique pro culpis supererat gehenna, tanto duce iam confidat reuocari ad patriam. Potui per me sancte Pater offendere, sed non valui per me placare te. Factus est adiutor meus, Deus meus, tuus dilectus filius, meam participans humanitatem, vt curaret infirmitatem; quatenus, vnde causa emerferat offensionis, deinde tibi immolarèt sacrificiũ laudis; meque per hoc redderet tuæ pietati placabilem, quo sedens ad dexteram tuam, semper meæ substantiæ se ostenderet esse consortem. Ecce spes mea, ecce fiducia mea.

4 Si me pro mea, vt dignum est, despicias iniquitate, respice me saltem misericors,

24 MEDITATIONES

pro dilectæ sobolis charitate. Attende in filio, quo propitieris seruo. Vide carnis sacramentum, & remitte carnis reatum. Quoties beatæ prolis tibi patent vulnera, delitefcant (obsecro) scelera mea. Quoties rubet preciosus pio de latere sanguis, diluantur (obsecro) labes meæ pollutionis. Et quia caro te lacefsiuit ad iram, caro te fleâat (imploro) ad misericordiam; vt ficut me caro feduxit ad culpam, fic caro deducat ad veniam. Multum namque eft quod mea meretur impietas; longe autem maius, quod redemptoris mei repofcit iure pietas. Magna enim eft mea iniuftitia; fatis vero maior redemptoris iuftitia. Quanto namque eft fuperior Deus homine, tanto mea malitia eft inferior eius bonitate, & qualitate, & quantitate.

5 Quid enim deliquit homo, quod non redemerit Filius Dei factus Homo? Quæ tanta fuperbia tumeret, quam non tanta humilitas fterneret? Quodnam tantum mortis imperium, quod nati Dei non deftrueret crucis fupplicium? Nimirû Deus meus, fi æqual lance delicta peccantis hominis, & redimen-

tis gratia librentur auctoris: non tantum Oriens ab Occidente, seu inferior separatur infernus à summo cœli cardine. Iam lucis optime creator, iam culpis ignosce meis pro dilecti filij tui laboribus immensis. Iam eius (quæso) pietati mea impietas, eius modestiæ mea peruersitas, & eius mansuetudini mea dometur ferocitas; Iam eius humilitas, meam superbiam; patientia, impatientiam; benignitas, duritiam; obedientia, inobedientiam; tranquillitas, inquietudinem; dulcedo, amaritudinem; suauitas, iram; charitas, lucrificat crudelitatem.

C A P V T IX.

De inuocatione Spiritus sancti.

IAm, ò diuini amor numinis, Patris omnipotentis, prolisque beatissimæ sancta communicatio, omnipotens paraclete Spiritus, moerentium consolator clementissime, iam cordis mei penètralibus potenti illabere virtute, & tenebrosa quæque laris neglecti latibula, corusci luminis fulgore habitator

tator lætifica, tuique roris abundantia, longo ariditatis marcentia squallore, visitando fecunda. Saucia interioris hominis arcana, tui amoris iaculo; & torpentis medullas interioris, flammis salutaribus penetrando succende; sanctique feruoris igne illustrando, intimæ mentis & corporis vniuersa depasce.

2 Pota me torrente voluptatis tuæ, vt nil iam mundanorum degustare libeat venenatæ dulcedinis. Iudica me Domine, & discerne causam meam de gente non sancta, doce me facere voluntatem tuam, quia Deus meus es tu. Credo ergo, quod quemcunque inhabitaueris, Patris ac pariter Filij domicilium condis. Beatus, qui te merebitur hospitem, quoniam per te Pater & Filius apud eum facient mansionem. Veni iam, veni benignissime dolentis animæ consolator, protegens in opportunitatibus & in tribulatione adiutor. Veni mundator scelerum, curator vulnerum. Veni fortitudo fragilium, releuator labentium. Veni humilium doctor, superborum destructor. Veni orphanorum pius pater, viduarum dulcis iudex. Veni spes
pau-

pauperum, refocillator deficientium. Veni nauigantium fidus, naufragij portus. Veni omnium viuentium singulare decus, morientium vnica salus. Veni sanctissime Spiritus, veni, & miserere mei: apta me tibi, & condescende propitius mihi; vt mea tuæ magnitudini exiguitas, roborique tuo mea imbecillitas, secundum multitudinē tuarum complaceat miserationum, per Iesum Christum Saluatorem meum, qui cum Patre in tua vnitāte viuit & regnat in sæcula sæculorum. Amen.

C A P V T X.

Oratio serui Dei, de se humiliter sentientis.

I SCIO Domine, scio & fateor, quod non sum dignus, quem tu diligas, sed certe tu non es indignus, quem ego diligam. Indignus quidem sum tibi seruire; sed tu non es indignus seruitio creaturæ tuæ. Da ergo mihi Domine, vnde tu es dignus; & ego ero dignus, vnde sum indignus. Fac me, quomodo vis, à peccatis cessare, vt quomodo de-

debeo, possim tibi seruire. Concede mihi sic custodire, & regere, & finire vitam meam, vt in pace dormiam, & in te requiescam. Præsta mihi in finem, vt me excipiat somnus cum requie; requies cum securitate; securitas in æternitate. Amen.

C A P V T X I.

Oratio ad sanctam Trinitatem.

I **T**E Deum Patrem ingenitum: te Filium vnigenitum: te Spiritum sanctum paracletum: sanctam & indiuiduam Trinitatem, toto corde & ore confitemur, laudamus, atque benedicimus; tibi gloria in sæcula sæculorum. Amen.

C A P V T X I I.

Confessio omnipotentis Dei & maiestatis eiusdem.

I **O** Summa Trinitas virtus vna, & indiscrета maiestas; Deus noster, Deus omnipotens, confiteor tibi ego vltimus seruorum

uorum tuorum, & exiguum membrum Ecclesie tuæ confiteor tibi, & honorifico te, debito sacrificio laudis pro scire & posse, quod mihi tantillo donare dignatus es. Et quia exteriora mihi munera defunt, quæ possim offerre: ea quæ in me sunt vota laudationis, ex dono misericordiae tuæ, ecce libens atque ouans offero tibi, de fide non ficta, & conscientia pura.

2 Credo igitur te toto corde Rex cæli & terræ Domine, & oro te; confiteor Patrem, & Filium, & Spiritum sanctum in personis trinum, & in substantia vnum, verum Deum omnipotentem, vnius simplicis, incorporeæ, inuisibilis, & incircumscriptæ naturæ, nihil te superius aut inferius maiusve aliquid habentem, sed per omnem modum sine deformitate perfectum, sine quantitate magnum, sine qualitate bonum, sine tempore sempiternum, sine morte vitam, sine infirmitate fortem, sine mendacio verum, sine situ ubique præsentem, sine loco ubique totum, sine extensione omnia implentem, sine contradictione ubique occurrentem, sine
motu

motu omnia transcendentem, sine statu intra omnia manentem, sine indigentia omnia creantem, sine labore omnia regentem; sine tui initio, omnibus initia dantem; sine tui mutatione, omnia mutabilia facientem: In magnitudine infinitum, in virtute omnipotentem, in bonitate summum, in sapientia inæstimabilem, in consilijs terribilem, in iudicijs iustum, in cogitationibus secretissimum, in verbis veracem, in operibus sanctum, in misericordijs copiosum, erga delinquentes patientissimum, erga poenitentes pijsimum: semper idipsum æternum ac sempiternum: immortalem atque incommutabilem, quem nec spatia dilatant, nec breuitas locorum angustat, nec receptacula vlla coarctant; nec voluntas variat, nec necessitudo corrumpit, nec mœsta perturbant, nec læta demulgent. Cui nec obliuio tollit quicquam, nec memoria reddit, nec præterita transeunt, nec futura succedunt. Cui nec origo initium, nec tempora incrementum, nec casus finem dabit: sed ante sæcula, & in sæculis, & per sæcula in æternum viuus: & est
tibi

tibi perennis laus & æterna gloria, summa
potestas & singularis honor, perpetuum re-
gnum, & sine fine imperium, per infinita &
indefessa & immortalia sæcula sæculorum.

CAPV T XIII.

*Qualiter generi humano dignatus est subuenire
Deus Pater, & de Verbi Incarnatione,
& gratiarum actione.*

HVcusque omnipotens Deus, cordis
mei inspector & scrutator, confes-
sus sum omnipotentiam Maiestatis tuæ, &
Maiestatem omnipotentia tuæ: nunc autem
qua liter humano generi subuenire dignatus
es in fine sæculorum, sicut corde credo ad ius-
titiam, ita ore coram te confiteor ad salu-
tem. Tu quidem Deus Pater solus, nunquam
& nusquam legeris missus. De filio autem
tuo ita scribit Apostolus: Cum autem venit
plenitudo temporis, misit Deus filium suum.
Cum dicit (misit) satis ostendit, quod in
hunc mundum missus aduenit, cum de beata
Maria

Maria semper Virgine natus, verus & perfectus homo in carne apparuit.

2 Sed quid est, quod de illo ille Evangelistarum præcipuus ait: In mundo erat, & mundus per ipsum factus est. Illuc vero missus est per humanitatem, vbi semper fuit, & est per diuinitatem. Quam videlicet missionem opus esse totius sanctæ Trinitatis corde credo, & ore confiteor. Quomodo autem nos amasti, Pater sancte, & bone? quantum nos dilexisti, pie conditor, qui etiam proprio filio non percepisti, sed pro nobis impijs tradidisti illum? Subditus tibi ille fuit vsque ad mortem, mortem autem crucis, tollens chirographum peccatorum nostrorum, & affigens illud cruci, crucifixit peccatum, & occidit mortem. Vnus ille inter mortuos liber, potestatem habens ponendi animam suam pro nobis, & iterum sumendi eam pro nobis.

3 Igitur victor, & victima; & ideo victor, quia victima pro nobis. Tibi sacerdos & sacrificium; & ideo Sacerdos, quia sacrificium. Merito mihi spes valida in illo est, quia sanabis omnes languores meos per eum,

eum, qui sedet ad dexteram tuam, & interpellat pro nobis. Languores quippe mei, Domine, magni sunt, & multi: multi sunt, & magni. Habet enim multa in me princeps mundi huius; scio, & fateor; sed rogo te, libera me per sedentem ad dexteram tuam Redemptorem nostrum, in quo nihil sui mali potuit inuenire. Per ipsum me iustifica, qui peccatum non fecit, nec inuentus est dolus in ore eius. Per ipsum caput nostrum, in quo nulla est macula, libera me membrum eius, licet exiguum, & infirmum. Libera, quæso, me à peccatis, vitijs, culpis, & negligentijs meis. Reple me tuis sanctis virtutibus, & fac me bonis pollere moribus. Fac me in sanctis opèribus propter nomen sanctum tuum perseverare vsque in finem, secundum tuam voluntatem.



CAPVT XIV.

De fiducia, quam habere debet anima in Domino Iesu, atque eius passione.

DEsperare utique potuissem propter nimia peccata mea, infinitas negligentias meas, nisi Verbum tuum Deus caro fieret, & habitaret in nobis. Sed desperare iam non audeo; quia cum inimici essemus, reconciliati sumus per mortem filij tui, quanto magis reconciliati salui facti sumus per eum? Omnis namque spes, & totius fiduciae certitudo mihi est in precioso sanguine eius, qui effusus est propter nos, & propter salutem nostram. In ipso respiro, & in ipso confisus ad te peruenire desidero; non habens meam iustitiam, sed eam quæ est ex filio tuo Domino nostro Iesu Christo. Vnde gratias agimus tibi, clementissime, & benignissime amator hominum Deus, qui per Iesum Christum filium tuum Dominum nostrum, cum non essemus, potenter fecisti nos: &

cum

cum perditī fuīſſemus culpa noſtra, mirabili-
ter liberaſti, & recuperaſti nos.

2 Gratias ago pietati tuæ, & multas ti-
bi laudes refero ex totis præcordijs meis, qui
propter tuam inenarrabilem dilectionem,
qua nos miſeros, & indignos mirabili boni-
tate amare dignatus es, miſiſti eundem vni-
genitum tuum de ſinu tuo ad publicum pro-
ficuum noſtrum, ſaluare nos peccatores,
tunc filios perditionis. Gratias ago tibi pro
ſancta incarnatione, & natiuitate eius, & glo-
rioſa genitrice ſua, de qua ipſe carnem aſſu-
mere dignatus eſt propter nos, & propter
noſtram ſalutem: vt ſicut Deus verus de Deo,
ita verus homo ex homine eſſet. Gratias ti-
bi ago pro paſſione, & cruce eius, pro mor-
tē, & reſurrectione eius, pro aſcenſione eius
in cœlum, & ſede Maieſtatis eius ad dexte-
ram tuam. Ipſe enim quadrageſimo die, poſt
reſurrectionem ſuam, aſcendens videntibus
diſcipulis ſuper omnes cœlos, ſedenſque ad
dexteram tuam, Spiritum ſanctum, ſecundum
promiſſionem ſuam, in filios adoptionis ef-
fuſit.

36 MEDITATIONES

3 Gratias tibi ago pro sacratissima illa effusione pretiosi sanguinis eius, quo sumus redempti; simul, & pro sacrosancto, & viuifico mysterio Corporis, & Sanguinis eius, quo quotidie in Ecclesia tua pascimur, & potamur, abluimur, & sanctificamur, & vnus summæ diuinitatis participes efficimur. Gratias tibi ago pro tua mira, & inenarrabili charitate, qua nos indignos sic amasti, & saluasti, per vnicum, & dilectum filium tuum. Sic enim dilexisti mundum, vt vnigenitum tuum dares: vt omnis qui credit in eum non pereat, sed habeat vitam æternam. Hæc est autem vita æterna, vt cognoscamus te verum Deum, & quem misisti Iesum Christum, per fidem rectam, & condigna fidei opera.

CAPVT XV.

De immensa charitate Patris æterni ad genus humanum.

O Immenſa pietas, ò inæſtimabilis charitas! vt liberares ſeruū, filium tradidiſti. Deus factus eſt homo, vt perdi-

perditus homo, de potestate dæmonum erueretur. Quam benignissimus amator hominum, filius tuus Deus noster, cuius pijs visceribus non satis visum est, vt se inclinaret factus homo de Virgine Maria, nisi etiam subiret crucis supplicium effuso sanguine propter nos, & propter nostram salutem. Venit pius Deus, venit pro pietate, & bonitate sua, venit quærere, & saluum facere, quod perierat. Quæsiuit ouem perditam, quæsiuit, & inuenit, & humeris suis reportauit ad caulas gregis pius Dominus, & vere multum pius Pastor.

2 O charitas, ò pietas! Quis audiuit talia? Quis super tanta misericordiæ viscera non obstupescat? Quis non miretur? Quis non collætetur propter nimiam charitatem tuam, qua nos dilexisti? Misisti filium tuum in similitudinem carnis peccati, vt de peccato damnaret peccatum, vt nos efficermur iustitia tua in ipso. Ipse enim verus est agnus immaculatus, qui abstulit peccata mundi: qui mortem nostram moriendo destruxit, & vitam resurgendo reparauit.

3 Sed quid tibi retribuere possumus Deus noster, pro tantis beneficijs misericordiæ tuæ? Quas laudes, quas gratiarum actiones? Etiam si illa beatorum Angelorum scientia, & potentia nobis foret, nihil tamen dignum tantæ pietati, & bonitati tuæ recompensare valeremus. Si certe omnia membra nostra verterentur in linguas, ad rependendum tibi debitas laudes, nequaquam sufficeret exiguitas nostra: supereminet enim omnem scientiâ tuam inæstimabilis charitas, quâ ostendisti nobis indignis pro sola bonitate, & pietate tua. Filius namque tuus Deus noster, non Angelos, sed semen Abrahæ apprehendit, assimilatus nobis per omnia absque peccato. Humanam itaque, non Angelicam suscipiens naturam, & eam stola sanctæ resurrectionis, & immortalitatis glorificans, vexit super omnes cælos, super omnes choros Angelorum, super Cherubim, & Seraphim, colloans ad dexteram tuam. Hanc autem laudant Angeli, adorant Dominationes, & omnes Virtutes cælorum tremunt super se hominem Deum.

4 Hæc nempe mihi tota est spes omnisque fiducia. Est enim in ipso Iesu Christo Domino nostro vniuscuiusque nostrum portio, caro, & sanguis. Vbi ergo portio mea regnat, ibi me regnare credo. Vbi caro mea glorificatur, ibi gloriosum me esse cognosco. Vbi sanguis meus dominatur, ibi dominari me sentio. Quamuis peccator sim, de hac communione gratiæ non diffido. Et si peccata mea me prohibent, substantia mea requirit. Et si delicta mea me excludunt, naturæ communio non repellit. Non enim tam immitis est Deus, vt obliuiscatur hominis: & non meminerit ipsius quem ipse gestat, & quem mei causa suscepit: eius, quem mei causa requirit.

5 Mitis vero, & valde benignus est Dominus Deus noster; & diligit carnem suam, membra sua, & viscera sua. In ipso Deo, & Domino nostro Iesu Christo dulcissimo, benignissimo atque clementissimo, in quo resurreximus, & iam coelos ascendimus, & iam cœlestibus consedemus, caro nostra nos diligit. Habemus autem sanguinis nostri præ-

rogatiuam in ipso . Sumus autem membra eius, & caro eius, Ipse denique est caput nostrum, ex quo totum corpus, sicut scriptum est; Os ex ossibus meis, & caro de carne mea: & erunt duo in carne vna . Et nemo vnquam carnem suam odio habet, sed fouet, & diligit eam . Mysterium hoc magnum est; ego dico in Christo, & in Ecclesia (ait Apostolus.)

CAPITULUM XVI.

*De duplici Christi natura, qui nobis miseretur,
& pro nobis interpellat.*

I **G**RATIAS itaque ago labijs, & corde, & omni qua valeo virtute, infinitæ misericordiæ tuæ, Domine Deus noster; pro omnibus miserationibus tuis, quibus mirabiliter nobis perditis subuenire dignatus es; per eundem filium tuum saluatorem, & recuperatorem nostrum, qui mortuus est propter peccata nostra, & resurrexit propter iustificationem nostram: & nunc viuens sine fine, sedet ad dexteram tuam, & interpellat pro nobis; & simul tecum miseretur; quia

Deus

Deus est ex te Patre, coæternus, & cōsubstantialis tibi per omnia; vnde potest in perpetuū nos saluare: sed secundum id, quod homo est, ex qua parte minor te est, data est ei omnis potestas in cœlo & in terra: vt in nomine Iesu omne genu flectatur, cælestium, terrestrium, & infèrnorum; & omnis lingua confiteatur, quia Dominus noster Iesus Christus in gloria est tua Deus Pater omnipotens. Ipse quidem constitutus est à te iudex viuorum, & mortuorum; tu vero non iudicas quemquam, sed omne iudicium tuum dedisti filio tuo: in cuius pectore reconditi sunt omnes thesauri sapientiæ, & scientiæ.

2. Ipse autem testis, & iudex est, iudex, & testis, quem nulla peccatrix conscientia effugere poterit. Omnia enim nuda, & aperta sunt oculis eius. Ipse sane, qui iniuste iudicatus est, iudicabit orbem terrę in æquitatē, & populos in iustitia. Benedico ergo nomen sanctum tuum in æternum, & glorifico ex toto corde meo, omnipotens & misericors Domine, pro illa inenarrabili, & mirabili coniunctione diuinatis, & humanitatis in unitate

tate personæ ; vt non alter Deus, alter homo
esset : sed vnus idemque Deus, & homo ; ho-
mo, & Deus . Sed licet mirabili dignatione,
Verbum caro factum sit : neutra tamen ex
duabus naturis, in aliam mutata est substan-
tiam . Trinitatis mysterio, quarta non est ad-
dita persona : Vnita quippe est, non confusa
verbi Dei hominisque substantia, vt in Deū,
quod ex nobis susceptum fuerat, perueniret,
& illud quod nunquam fuerat, idem quod sē-
per fuerat, permaneret .

3 O admirabile mysterium : O inenar-
rabile commercium ! O mira semperque mi-
randa, semperque amanda diuinæ propitia-
tionis benignitas ! Serui digni non fuimus,
& ecce filij Dei facti sumus : hæredes quidem
Dei, cohæredes autem Christi . Vnde hoc
nobis, & quis nos ad hoc perduxit ? Sed ro-
go te, clementissime Pater Deus, per hanc
inæstimabilem pietatem, bonitatem, & cha-
ritatem tuam ; vt dignos nos facias multis, &
magnis promissionibus eiusdem filij tui Do-
mini nostri Iesu Christi . Manda virtuti tuæ,
& confirma hoc quod operatus es in nobis :
perfi-

perface quod cœpisti: vt ad plenam tuæ pietatis gratiam mereamur peruenire. Fac nos per Spiritum sanctum intelligere, & mereri, & debito semper honore venerari hoc magnum pietatis mysterium, quod manifestatū est in carne, iustificatum est in spiritu, apparuit Angelis, prædicatum est gentibus, creditum est in mundo, assumptum est in gloriam.

CAPVTV XVII.

De gratia, quam habere debet homo Deo pro beneficio redemptionis.

Quam sumus tibi debitores Domine Deus noster, tanto redempti precio, tanto saluati dono, & tam glorioso adiuti beneficio! O quantum à nobis miseris es timendus, amandus, benedicendus, laudandus, honorandus, & glorificandus; qui nos sic amasti, sic saluasti, sic sanctificasti, sic sublimasti? Tibi nempe debemus omne quod possumus, omne quod viuimus, omne quod sapimus. Sed quis habet quicquam non tuum?

44 MEDITATIONES

tuum? Tu Domine Deus noster, à quo bona cuncta procedunt, propter te, & nomen sanctum tuum da nobis de bonis tuis, vt de bonis, ac datis tuis seruiamus tibi, & in veritate placeamus, atque debitas quotidie laudes rependamus tibi pro tantis beneficijs misericordiæ tuæ.

2 Non enim aliunde possumus tibi feruire, neque placere, nisi de tuo munere. Omne enim datum optimum, & omne donum perfectum desursum est, descendens à patre luminum: apud quem non est transmutatio, nec vicissitudinis obumbratio, Domine Deus noster, Deus pie, Deus bone, Deus omnipotens, Deus ineffabilis, & incircumscriptæ naturæ: Deus institutor omnium rerum, & Domini nostri Iesu Christi Pater, qui eundem dilectum filium tuum Dominum nostrum dulcissimum misisti de sinu tuo ad publicum proficuum nostrum, suscipere vitam nostram, vt nobis donaret suam, essetque perfectus Deus ex te Patre, & perfectus homo ex matre: totus Deus, & totus homo, vnus idemque Christus æternus, & temporalis, immor-

mortalis, & mortalis, creator, & creatus, fortis, & infirmus, victor, & victus, nutritor, & nutritus, pastor, & ovis, temporaliter mortuus, & tecum viuens in æternum: suis dilectoribus vitæ municipium promittens, suis discipulis dixit: Quodcunque petieritis Patrem in nomine meo, dabit vobis.

3 Per ipsum summum Sacerdotem, & verum Pontificem, & bonum Pastorem, qui se tibi obtulit in sacrificium, ponens animam suam pro grege suo, te rogo per ipsum, qui sedet ad dexteram tuam, & interpellat pro nobis, redemptorem, & aduocatū nostrū: pietati, & bonitati tuæ supplico, clementissime, & amantissime, & benignissime amator hominum Deus; vt des mihi cum eodem Filio tuo, & Spiritu sancto te in omnibus benedicere, & glorificare, cum multa cordis contritione, & lachrymarum fonte, cum multa reuerentia, & tremore. Quia quorum vna est substantia, vnum est, & datum.

4 Sed quoniam corpus, quod corrumpitur, aggrauat animam: excita (quæso) torporem meum tuis stimulis; & fac me strenue

nue perseverare in præceptis, & laudibus tuis
 die, ac nocte; tribue, vt concaleat cor meum
 intra me: & in meditatione mea exardescat
 ighis. Et quia ipse tuus vnicus natus dixit:
 Nemo venit ad me, nisi Pater, qui misit me,
 traxerit eum; &: Nemo venit ad Patrem,
 nisi per me: obsecro, & suppliciter rogo, tra-
 he me semper ad ipsum, vt ipse me tandem
 perducatur ad te illuc, vbi ipse est in dextera
 tua sedens: Vbi est sempiterna vita, sempi-
 terne beata: Vbi est amor perfectus, & ti-
 mor nullus: Vbi est dies æternus, & vnus
 omnium spiritus: vbi summa, & certa securi-
 tas, & secura tranquillitas: & tranquilla iu-
 cunditas, & iucunda foelicitas, & foelix æter-
 nitas, & æterna beatitudo, & beata tui sine
 fine visio, & laudatio: Vbi tu cum illo, & ille
 tecum in communione sancti Spiritus, æter-
 naliter, ac sempiternaliter viuis, & regnas
 Deus, per omnia sæcula sæculorum.
 Amen.

CAPVTV XVIII.

Oratio deuotissima ad Christum.

SPes mea Christe Deus, hominum tu
dulcis amator,
Lux, via, vita, salus, decor, & decus omne
tuorum:
Omnia pro quorum voluisti ferre salute,
Cernito vincla, crucem, vulnus, mortem,
atque sepulchrum.
Post tres inde dies deuicta morte resurgens,
Discipulis visus, nutantia corda reformans,
Luce quaterna coelorum summa petisti.
Viuis in æternum, nunc, & per sæcula re-
b-b-n-gnans.
Tu es Deus meus viuus, & verus, Pater
meus sanctus, Dominus meus pius, Rex meus
magnus, Pastor meus bonus, Magister meus
vnus, Adiutor meus optimus, Dilectus meus
pulcherrimus, Panis meus viuus, Sacerdos
meus in æternum, Dux meus ad patriam, lux
mea vera, dulcedo mea sancta, via mea re-
cta, sapientia mea præclara; simplicitas mea
pura,

pura, concordia mea pacifica, custodia mea
tuta, portio mea bona, salus mea sempiter-
na, misericordia mea magna, patientia mea
robustissima, victima mea immaculata, re-
demptio mea sancta, spes mea firma, chari-
tas mea perfecta; resurrectio mea vera, vita
mea æterna, exultatio, & visio mea beatissi-
ma, & sine fine mansura: Te deprecor, sup-
plico, & rogo, vt per te ambulem, ad te per-
ueniam, in te requiescam: qui es via, veri-
tas, & vita; sine qua, nemo venit ad Patrem.
Te enim desidero, dulcissimum, & pulcherri-
mum Dominum.

2. O splendor paternæ gloriæ, qui sedes
super Cherubim, & intueris abyssos, lumen
veridicum, lumen illuminans, lumen inde-
ficiens, in quem desiderant Angeli prospice-
re: Ecce cor meum coram te est: discute te-
nebras eius, vt amoris tui claritate plenius
perfundatur. Da mihi Deus meus te, redde
mihi te: en amo te, & si parum est, amem
validius. Non possum metiri, vt sciam quan-
tum desit mihi amoris tui ad id quod satis est;
vt curret vita mea in amplexus tuos, nec
auer-

anertatur, donec abscondatur in abscondito vultus tui. Hoc tamen scio, quia male mihi est præter te Domine, non solum extra me, sed in me ipso. Omnis enim copia, quæ Deus meus non est, egestas mihi est.

3 Bonum namque, quod neque in melius, neque in deterius commutari potes, tu solus es, qui simpliciter solus es, cui non est aliud vivere, & aliud beate vivere, quia tua beatitudo tu es. Creatura vero tua, cui est aliud vivere, & aliud beate vivere, omne quod viuit, & beate viuit, non debet nisi gratiæ tuæ attribuere. Et ideo nos egemus tui, non tu nostri: quia si omnino non essemus, nihil tibi deesset ad bonum, quod tu es. Tibi itaque Domino Deo nostro semper adherere necesse habemus, ut per continuum auxilium tuum sancte, & pie, & recte vivere valeamus. Pondere siquidem fragilitatis nostræ deorsum trahimur: dono autem tuo accendimur, & sursum ferimur: inardescimus, & imus, ascendimus, ascensiones in corde facimus: & cantamus canticum graduum: igne tuo bono inardescimus, & imus.

4 Quonam? sursum imus ad pacem Hierusalem: quoniam iucundatus sum in his quæ dicta sunt mihi: In domum Domini ibimus. Illic collocavit nos voluntas bona, vt nihil velimus aliud, quam permanere illic in æternum. Sed quia dum sumus in corpore, peregrinamur à te Domine, non habemus hic civitatem manentem, sed futuram inquirimus: nolter autem municipatus in cœlis est. Ideo duce gratia tua, ingredior in cubile cordis mei: & canto tibi amatoria, rex meus, & Deus meus, gemens in enarrabiles gemitus, in loco peregrinationis meæ: vbi cantabiles mihi factæ sunt iustificationes tuæ.

5 Et recordans Hierusalem, extendo in eam sensum cordis: Hierusalem patriam meam, Hierusalem matrem meam, teque super eam regnatorem, illustratorem, patrem, tutorem, patronum, rectorem, pastorem, castas, & fortes delicias, solidum gaudium, & omnia bona, ineffabilia simul omnia: quia vnum summum, & verum bonum. Et non auertar, donec in eius pacem matris charissimæ, vbi sunt primitiæ spiritus mei,

colligas totum, quod sum à dispersione, & deformitate hac, & conformes atque confirmes in æternum, Deus meus, misericordia mea.

CAPV T XIX.

*Hic distinguit inter sapientiam quæ domus Dei est,
& sapientiam quæ divina est.*

HÆc est domus tua Deus non terrena, neque vlla cœlesti mole corporea, sed spiritualis, & particeps æternitatis, quia sine labe manet in æternum: statuisti enim eam in sæculum sæculi: præceptum posuisti, & non præteribit. Hæc tamen tibi Deo coæterna, quia non sine initio facta est. Prior quippe omnium creata est sapientia. Non utique illa sapientia Patri Deo plane coæterna, & coæqualis, per quam creata sunt omnia, & in quo principio factum est cœlum, & terra, sed profecto sapientia, quæ creata est spiritualis natura, scilicet, quæ contemplatione luminis lumen est. Dicitur enim, & ipsa (quamvis creata) sapientia.

Sed quantum distat inter lumen illuminans, & lumen quod illuminatur, tantum differt inter te summam sapientiam, quæ es creans, & istam quæ creata est sicut inter iustitiam iustificantem, quæ tu Deus noster es, & iustitiam, quæ iustificatione nostra facta est. Nam, & nos sumus dicti iustitia Dei Patris, in te filio eius Domino nostro, testante Apostolo.

2 Ergo, quia prior omnium creata est quædam sapientia, quæ creata est mens rationalis, & intellectualis, castæ scilicet civitatis tuæ matris nostræ, quæ sursum est, & libera est, & æterna in cœlis. Quibus cœlis? Nisi qui te laudant cœli cœlorum, quia hoc est, & cœlum cœli Domino. Et si non inuenimus tempus ante illam, quæ creaturam temporis antecedit; quia prior omnium creata est: ante illam tamen es tu Deus æternus creator omnium; à quo est ipsius creaturæ perpetuitas; à quo facta sumpsit exordium, quamuis non temporis, quia non dum erat tempus, ipsius tamen conditionis tuæ unde ita est abs te Domino Deo nostro, vt aliud

fit plane quam tu; licet nec ante illam, nec in illa inueniamus tempus. Est enim idonea faciem tuam semper videre, nec vspiam defleſcitur ab ea. Quo fit, vt nulla mutatione varietur. Inest tamen ipsi mutabilitas: qua tenebresceret, & frigesceret, nisi amore grandi cohærens tibi, tanquam super meridiem luceret, & ferueret ex te.

3 Denique tam casto amore cohæret tibi Deo vero, & vere æterno, vt quam vis tibi non sit coæterna, per nullius tamen temporis varietates, & vicissitudines à te resol-uatur, & defluat, sed in tui solius verissima contemplatione requiescat. Quoniam tu Deus diligenti te quantum præcipis, ostendiste, & sufficit ei. Vnde non declinat à te, nec à se: sed semper in eodem statu manet, te indefinenter videndo, te indeficienter amando, verum lumen, & castum amorem. O beata ista, & sublimis creatura creaturarum: maxime beatâ, inhærendo semper beatitudini tuæ; foelix, & nimium foelix, te sempiterno inhabitatore, atque illustratore suo.

4 Nec inuenio quid licentius appellandum existimemus cœlum cœli Domino, quā domum tuam, contemplantem delectationem tuam sine defectu, & absque affectu egrediendi in aliquid, mentem puram concordissime vnā; stabilimentum pacis beatorum spirituum: In cœlestibus sunt ista cœlestia. Vnde intelligat anima, cuius peregrinatio longinqua facta est, si iam sitit tibi; si iam factæ sunt lachrymæ suæ panes sui; si iam petat vnā, & hanc requirat, vt inhabitet in domo tua per omnes dies vitæ suæ. Et quæ vita eius, nisi tu? Et qui dies eius, nisi æternitas tua? Sicut anni tui, qui non deficient. Hic ergo intelligat anima, quæ potest, quā longe super omnia tempora sit æternus; quando domus tua, quæ peregrinata non est, quamuis tibi non sit coæterna, indefinenter tamen, & indeficienter coherendo tibi, nullam temporis patitur varietatem; teque semper perseverantissima castitate hauriens mutabilitate sua, nusquam, & nunquam exierit ex te sibi præsentē, ad quem toto affectu se tenet; non habens futurum,

quod expectet: nec in præteritum transiens,
quod meminerit: per nullas vices variatur,
& in nulla tempora extenditur.

CAP. V. T. XX.

*Hic orat homo, ut ipsa quoque domus Dei
oret pro eo.*

O Domus Dei luminosa, & speciosa,
dilexi decorem tuum, & locum ha-
bitationis gloriæ Domini Dei mei, possesso-
ris, & fabricatoris tui: Tibi suspiret peregri-
natio mea nocte, ac die, tibi inhiet cor meum:
tibi intendat mens mea, ad societatem bea-
titudinis tuæ peruenire desideret anima mea.
Dico ei qui fecit te, ut possideat me in te,
quia ipse fecit me, & te. Imo tu dic, tu ro-
ga eum, ut dignum me faciat participatione
gloriæ tuæ. Sanctam enim societatem tuam,
& mirabilem pulchritudinem tuam non per
meritum requiro; sed per sanguinem eius,
quo redemptus sum adipisci non despero.
Tantum adiuuent me merita tua, subueniant
prauitati meæ sanctæ, & purissime oratio-

nestuæ, quæ inefficaces apud Deum nullatenus esse possunt.

2 Erravi, fateor, sicut ovis perdita; & incolatus meus prolongatus est: atque procul proiectus sum à facie Domini Dei mei, in hanc exilij cæcitatem. Vbi expulsus à paradisi gaudijs, deploro quotidie mecum super miseras captiuitatis meæ lugubre carmen, ingentesque lamentationes, cum recordor tui mater Hierusalem, dum stant pedes mei in atrijs tuis sancta, & decora Sion; nec dum interiora tua conspiciere in propatulo valens; sed in humeris pastoris mei, structoris tui, spero me reportari tibi; vt tripudie tecum illo inenarrabili gaudio, quo lætantur illi, qui tecum sunt coram ipso Deo, & Salvatore nostro. Qui dissoluit inimicitias in carne sua; & pacificauit omnia quæ in coelis sunt; & quæ in terra, sanguine suo.

3 Ipse enim est pax nostra, qui fecit vtraque vnum. Qui duos ex aduerso venientes parietes coniungens, in se beatitudinis tuæ permanentem foelicitatem, pari modo, & eadem mensura se nobis daturum promissit,

fit, dicens: Erunt æquales Angelis Dei in
cœlis. O Hierusalem domus Dei æterna,
post Christi dilectionem, tu esto lætitia, &
consolatio mea; dulcis memoria tui beati
nominis sit releuatio mœroris; tædiorumque
meorum.

CAP. V. T. XXXI.

Quantis amaritudinibus Vita ista sit respersa.

TÆdet enim me Domine valde vitæ
huius, & istius ærumnosæ peregrina-
tionis. Vita hæc, vita misera, vita cadu-
ca, vita incerta, vita laboriosa, vita immun-
da, vita domina malorum, regina superbo-
rum, plena miserijs, & erroribus, quæ non
est vita dicenda, sed mors; in qua momen-
tis singulis morimur; per varios mutabilita-
tis defectus diuersis generibus mortium.
Nunquid ergo hoc, quod viuimus in
hoc mundo, dicere possumus vitam? quam
humores tumidant; dolores extenuant, &
ardores exsiccant, aër morbidat, escæ in-
flant, ieiunia macerant, ioci dissoluunt, tri-
stitiæ.

stitiæ consumunt : sollicitudo coarctat, securitas hebetat: diuitiæ inflant, & iactant, paupertas deiicit, iuuentus extollit, senectus incuruat, infirmitas frangit, mœror deprimit, Et in his malis omnibus, mors furibunda succedit, simulque cunctis gaudijs istius miseræ vitæ, ita finem imponit, vt quem esse desierit, non fuisse putetur. Mors ista vitalis, & vita mortalis, licet his alijsque sit respersa amaritudinibus, proh dolor, quam plurimos suis capit illecebris! & quam multos suis falsis promissionibus decipit!

3 Et cum ita per se sit falsa, & amara, vt etiam suos cæcos amatores latere non valeat: tamen infinitam stultorum multitudinem, aureo calice, quem in manu habet, potat, & prorsus inebriat. Foelices illi, & ipsi rari, qui familiaritatem eius recusant, perfunctoria gaudia spernunt, societate mabijciunt: ne cum pereunte deceptrice, & ipsi perire cogantur.

C A P V T X X I I .

*De felicitate vitæ, quam præparavit Deus
diligentibus se.*

OTu vita, quam præparavit Deus ijs,
qui diligunt eum, vita vitalis, vita
beata, vita sicura, vita tranquilla, vita pul-
chra, vita munda, vita casta, vita sancta,
vita ignara mortis, nescia tristitiæ, vita sine
labe, sine dolore, sine anxietate, sine corru-
ptione, sine perturbacione, sine varietate, &
mutatione, vita totius elegantia, & digni-
tatis plenissima: vbi non est aduersarius im-
pugnans, vbi nulla peccati illecebra, vbi est
amor perfectus, & timor nullus, vbi dies æter-
nus, & vnus omnium spiritus, vbi Deus facie
ad faciem cernitur, & hoc vitæ cibo mens
sine defectu satiatur.

Libet me tuæ intendere claritati, de-
lectant me bona tua lauido corde: Quanto
plus valeo tecum considerare, tanto plus
amore tui langueo: tui vehementi desiderio,
tuique dulci memoria admodum delector.

60. MEDITATIONES

Libet itaque, libet in te oculos cordis attollere, statum mentis erigere, affectum animi conformare. Libet sane de te loqui, de te audire, de te scribere, de te conferre, de tua beatitudine, & gloria quotidie legere, & lecta sæpius corde reuoluere: vt vel sic possim ab huius mortalis perituræque vitæ ardoribus, periculis, & sudoribus, sub tuæ vitalis auræ dulci refrigerio transire, & transiens, in sinu tuo fessum caput dormiturus, vel paululum reclinare.

3. Huius rei gratiâ Scripturarum sanctarum amœna prata ingredior, viridissimas sententiarum herbas exarando carpo, legendo comedo, frequentando rumino, atque congregando tandem in alta memoriæ sede repono; vt tali modo tua dulcedine degustata, minus istius miserrimæ vitæ amaritudines sentiam.

4. O tu Vita felicissima! ò Regnum vere Beatum, carens morte, vacans fine! Cui nulla tempora succedunt per æuum: Vbi continuus sine nocte dies nescit habere tempus. Vbi victor miles illis hymnidicis Angelorum

fociatus choris, cantat Deo sine celsatione
canticum de canticis Sion, nobile perpetua
caput amplectente corona. Vtinam con-
cessa mihi peccatorum venia, moxque hac
carnis sarcina deposita, in tua gaudia veram
requiem habiturus intrarem: & tuæ ciuitatis
præclara atque speciosa mœnia, coronam
vitæ de manu Domini accepturus ingrede-
rer: vt illis sanctissimis choris interessem, vt
cum beatissimis spiritibus gloriæ conditoris
assisterem, vt præsentem Christi vultum cer-
nerem, vt illud summum, & ineffabile, &
incircumscriptum lumen semper aspicerem:
sicque nullo metu mortis affici, sed de incor-
ruptionis perpetuæ munere lætari possem si-
ne fine.

CAPVT XXIII.

De felicitate animæ sanctæ hinc exeuntis.

I **F**œlix anima, quæ terreno resoluta, cor-
pore libera, cœlum petit, secura,
& tranquilla, non timet hostem, neque mor-
tem. Habet enim semper presentem, cer-
nitque

nitque indefinenter pulcherrimum Domi-
num, cui seruauit, quem dilexit, & ad quem
tandem læta, & gloriosa peruenit. Hanc ve-
ro tantæ beatitudinis gloriam nulla dies mi-
nuire, nullus improbus poterit auferre. Vi-
derunt eam filiæ Sion, & beatissimam præ-
dicauerunt, & Regina, & Concubinae lauda-
uerunt eam, dicentes: Quæ est ista, quæ ascen-
dit de deserto, delicijs affluens, innixa super
dilectum suum? Quæ est ista, quæ progredi-
tur sicut aurora consurgens, pulchra ut Luna,
electa ut Sol, terribilis ut castrorum acies or-
dinata? Quam læta exit, festinat, currit, cum
dilectum suum tibi dicentem attonitis auri-
bus audit: surge propera amica mea, specio-
sa mea, & veni: iam hyems transijt, imber
abiit, & recessit: flores apparuerunt in terra
nostra; tempus putationis aduenit, vox tur-
turis audita est in terra nostra, ficus protulit
grossos suos, vineæ florentes dederunt odo-
rem suum.

Surge, propera amica mea, formosa
mea, columba mea, in foraminibus petrae,
in cauernis maceræ: ostende mihi faciem

superiorem

tuam,

tuam, sonet vox tua in auribus meis. Vox enim tua dulcis, & facies tua decora. Veni electa mea, speciosa mea, & columba mea, immaculata mea, sponsa mea veni, & ponam in te thronum meum, quia concupiui speciem tuam. Veni, ut læteris in conspectu meo cum Angelis meis, quorum societas tibi à me repromissa est. Veni post multa pericula, & labores; intra in gaudium Domini tui, quod nemo tollet à te.

CAPV T XXIV.

*Oratio ad Sanctos, ut nobis succurrant
in periculis.*

Fœlices sancti Dei omnes; qui iam transijstis huius mortalitatis, pelagū, & peruenire meruistis ad portum perpetuæ quietis, securitatis, pacis, securi, & tranquilli, semperque festiui atque gaudentes estis. Obsecro vos per vestram charitatem, qui securi estis de vobis, solliciti estote de nobis. Securi estis de vestra immarcessibili gloria, solliciti estote de nostra multiplici

plici miseria. Per ipsum vos rogo, qui vos elegit, qui vos tales fecit; de cuius pulchritudine iam satiamini, de cuius immortalitate iam immortales facti estis: de cuius beatissima visione semper gaudetis. Estote iugiter memores nostri, subuenire nobis miseris, qui adhuc in salo huius vitæ circumstantibus agitamur procellis.

2 Vos portæ pulcherrimæ, quæ in magnam surrexistis altitudinem, adiuuate nos vile pauimentum longe inferius iacentes. Date manum; & erigite iacentes super pedes, vt conualescentes de infirmitate, fortes efficiamur in bello; intercedite: & orate constanter atque indefinenter pro nobis miseris, multumque negligentibus peccatoribus: vt per vestras orationes, vestro sancto consortio coniungamur; quia aliter salui esse non possumus. Sumus namque valde fragiles, & nullius virtutis homunciones, animalia ventris, & carnis mancipia; in quibus vix aliquod virtutis vestigium apparet. Et tamen in Christo confessione positi ligno crucis ferimur, nauigantes per hoc mare magnum,

gnūm, & spatiosum. Vbi sunt reptilia, quorum non est numerus. Vbi sunt animalia pusilla cum magnis. Vbi est draco sæuissimus, semper paratus ad deuorandum. Vbi sunt loca periculosa, scylla, & charybdidis, & alia innumerabilia, in quibus naufragantur incauti, & in fide dubij.

3 Orate Dominum, orate pijsissimi, orate omnia agmina Sanctorum, & vniuersi cœtus Beatorum, vt vestris precibus meritisque adiuti, salua naue, & integris mercibus, peruenire mereamur ad portum perpetuæ salutis, & quietis, & continuæ pacis, & nunquam finiendæ securitatis.

CAPVT XXV.

*Anima desiderium ad ciuitatem supernam
Hierusalem.*

MATER Hierusalem, Ciuitas sancta Dei, charissima sponsa Christi; te amat cor meum, pulchritudinem tuam nimium desiderat mens mea. O quam decora,
E
quam

quam gloriosa, quam generosa tu es. Tota pulchra es, & macula non est in te. Exulta, & lætare formosa filia Principis, quia concupiuit Rex speciem tuam, & amauit decorem tuum, speciosus forma præ filiis hominum. Sed qualis est dilectus tuus ex dilecto, ò pulcherrima? Dilectus meus candidus, & rubicundus, electus ex millibus. Sicut malus inter ligna sylvarum, sic dilectus meus inter filios. Sub vmbra illius quem desiderauī ecce læta sedeo, & fructus eius dulcis gutturi meo. Dilectus meus misit manum suam per foramen, & venter meus intremuit ad tactum eius.

2 In lectulo meo per noctem quæsiui, quem diligit anima mea: quæsiui, & inueni: Teneo, nec dimittam illum donec introducat me in domum suam, & in cubiculum suū, gloriosa genitrix mea. Ibi enim dabis mihi vbera tua abundantius, & perfectius, & satiabis me. satietate mirifica, ita vt nec esuriam, nec sitiam in æternum. Foelix anima mea semperque foelix in sæcula: si intueri meruero gloriam tuam, beatitudinem tuam,
pul-

pulchritudinem tuam, portas, & muros, & plateas tuas, & mansiones tuas multas, nobilissimos ciues tuos, & fortissimum Regem tuum in decore suo. Muri namque tui ex lapidibus preciosis, portæ tuæ ex margaritis optimis, plateæ tuæ ex auro purissimo, in quibus iucundum Alleluia sine intermissione concinitur; mansiones tuæ multæ quadris lapidibus fundatæ, saphiris constructæ, laterculis coopertæ aureis: in quas nullus ingreditur, nisi mundus: nullus habitat inquinatus.

3 Speciosa facta es, & suavis in delicijs tuis, mater Hierusalem. Nihil in te tale, quale hic patimur: qualia in hac misera vita cernimus. Non sunt in te tenebræ, aut nox, aut quælibet diuersitas temporum. Non lucet in te lux lucernæ: aut splendor Lunæ, vel iubar Stellarum; sed Deus de Deo, lux de luce. Sol iustitiæ semper illuminat te. Agnus candidus, & immaculatus, lucidum, & pulcherrimum est lumen tuum. Sol tuus, & claritas tua, & omne bonum tuum, huius pulcherrimi Regis indeficiens contemplatio.

Ipsè Rex regum in medio tui, & pueri eius in circuitu eius.

4 Ibi hymnidici Angelorum chori. Ibi societas supernorum ciuium. Ibi dulcis sollemnitas omnium, ab hac tristi peregrinatione ad tua gaudia redeuntium. Ibi Prophetarum prouidus chorus. Ibi duodenus Apostolorum numerus. Ibi innumerabilium Martyrum victor exercitus. Ibi sanctorum Confessorum sacer conuentus. Ibi veri, & perfecti Monaci. Ibi sanctæ Mulieres, quæ voluptates sæculi, & sexus infirmitatem vicerunt. Ibi Pueri, & Puellæ, qui annos suos sanctis moribus transcendèrunt. Ibi sunt oues, & agni, qui iam huius voluptatis laqueos euaserunt: exultant omnes in proprijs mansionibus. Dispar est gloria singulorum, sed communis est lætitia omnium.

5 Plena, & perfectà ibi regnat charitas, quia Deus est ibi omnia in omnibus, quem sine fine vident, & semper videndo in eius amore ardent; amant, & laudant; laudant, & amant. Omne opus eorum laus Dei sine fine, sine defectione; sine labore. Fœlix ego,

ego, & vere in perpetuum felix, si post resolutionem huius corpusculi, audire meruero illa cantica coelestis melodix, quæ cantantur ad laudem Regis æterni, ab illis supernæ patriæ ciuibus, beatorumque spirituum agminibus. Fortunatus ego, nimiumque beatus, si, & ego ipse meruero cantare ea, & assistere regi meo, Deo meo, & duci meo: & cernere eum in gloria sua, sicut ipse polliceri dignatus est, dicens: Pater, volo vt quos dedisti mihi sint mecum, vt videant claritatem meam, quam habui apud te ante constitutionem mundi. Et alibi: Qui mihi ministrat, me sequatur; & vbi sum ego, illic, & minister meuserit. Et iterum: Qui diligit me, diligetur à Patre meo: & ego diligam eum, & manifestabo ei me ipsum.



CAPVT XXVI.

*Hymnus de gloria Paradisi Petri Damiani
Cardinalis Ostiensis, ex dictis
B. Augustini.*

I **A**D perennis vitæ fontem mens siti-
uit arida.

Claustra carnis præsto frangi clausa quærit
anima.

Gliscit, ambit, eluctatur exul frui patria,

Dum pressuris, ac ærumnis se gemit obno-
xiam.

Quam amisit, cum deliquit, contemplatur
gloriam.

Præsens malum auget boni perditimemo-
riam.

2 Nam quis promat summæ pacis quã-
ta sit lætitia?

Vbi viuus margaritis surgunt ædificia :

Auro celsa micant tecta, radiant triclinia.

Solis gemmis preciosis hæc structura ne-
ctitur.

Auro mundo tanquam vitro vrbs via ster-
nitur.

Abest

Abest limus, deest fimus, lues nulla cer-
nitur.

Hyems horrens, æstas torrens, illic nun-
quam sæuiunt.

Flos perpetuus rosarum, ver agit perpetuum.

3 Candent lilia, rubescit crocus, fudat
balsamum.

Virent prata, vernant fata, riuï mellis in-
fluunt.

Pigmentorum spirat odor, liquor, & aroma-
tum.

Pendent poma floridorum non lapsura ne-
morum.

Non alternat Luna vices, Sol vel cursus fi-
derum.

Agnus est foelicis vrbis lumen in occiduum.

Nox, & tempus desunt ei, diem fert conti-
nuum.

Nam, & sancti, quique velut Sol præclarus
rutilant.

4 Post triumphum coronati mutuo con-
iubilant.

Et prostrati pugnas hostis iam securi nume-
rant.

Omni labe defecati, carnis bella nesciunt.
Caro facta spiritalis, & mens, vnum sentiunt.
Pace multa perfruentes, scandalo non perferunt.

Mutabilibus exuti repetunt originem.
Et praesentem veritatis contemplantur speciem.

¶ Hinc vitalem viui fontis hauriunt dulcedinem.

Inde statum semper iidem exeuntes capiunt.
Clari, viuidi, iucundi, nullis patent casibus.
Absunt morbi semper sanis, senectus iuuenibus.

Hinc perenne tenent esse; nam transire transijt.

Inde virent, vigent, florent, corruptela corrui.

Immortalitatis vigor, mortis ius absorbit.
Qui scientem cuncta sciunt, qui nescire nequeunt.

Nam, & pectoris arcana penetrant alterutrum.

¶ Vnum volunt, vnum nolunt, vnitas est mentium:

Licet

Licet cuique sit diuersum pro labore meritū.
Charitas hæc suum facit, quod dum amat
alterum.

Proprium sic singulorum commune fit om-
nium.

Vbi corpus, illic iure congregantur Aquilæ.
Quo cum Angelis, & sanctæ recreantur
animæ.

Vno pane viuunt ciues vtriusque patriæ.
Audi, & semper pleni, quod habent desi-
derant.

Non fatietas fastidit, neque fames cruciat.
Inhiantes semper edunt, & edentes inhiant.

7 Nouas semper harmonias vox melo-
da concrepat.

Et in iubilum prolata mulcent aures organa.
Digna, per quem sunt victores, Regi dant
præconia.

Fælix cæli, quæ præsentem Regem cernit
anima.

Et sub sede spectat alta orbis volui machi-
nam:

Solem, Lunam, & globosa cum planetis sy-
dera.

Chri-

Christe, palma bellatorum, hoc in munici-
cipium

Introduc me post solutum militare cingu-
lum.

Fac consortem donatiui beatorum ciuium.

Proba vires inexhausto laboranti praelio:

Vt quietem post præcinctum debeas eme-
rito,

Teque merear potiri sine fine prælio.

Amen.

C A P V T X X V I I.

*Laud continua, quam facit anima, ex contempla-
tione supernæ diuinitatis.*

Benedic anima mea Domino, & om-
nia quæ intra me sunt, nomini san-
cto eius. Benedic anima mea Domino, &
noli obliuisci omnes retributiones eius. Be-
nedicite Domino omnia opera eius, in omni
lôco dominationis eius: benedic anima mea
Domino. Laudemus Deum, quem laudant
Angeli, adorant Dominationes, tremunt
Potestates: cui Cherubim, & Seraphim inces-
sabili

fabili voce proclamant: Sanctus, Sanctus, Sanctus. Iungamus voces nostras vocibus Angelorum sanctorum, & communem Dominum laudemus pro modulo nostro.

2 Illi enim laudant Dominum purissime, & incessanter: qui semper inhaerent contemplationi diuinæ, non per speculum, & in ænigmate, sed facie ad faciem. Sed quis dicere vel cogitare sufficiat, qualis sit in conspectu Domini Dei omnipotentis illa beatorum Spirituum cælestiumque virtutum innumerabilis multitudo? Quæ sit in eis sine fine festiuitas visionis Dei? Quæ latitia sine defectu? Quis amoris ardor non crucians, sed delectans? Quod sit in eis desiderium visionis Dei cum satietate, & satietas cum desiderio: in quibus nec desiderium pænam generat, nec satietas fastidium parit? Quomodo inhærendo summæ beatitudini sint beati? Quomodo coniuncti vero lumini, facti lux sunt? Quomodo semper aspicientes incommutabilem Trinitatem, mutati sunt in incommutabilitatem?

3 Sed quando illam Angelicæ dignitatis celsitudinem comprehendere poterimus, quando nec ipsius animæ nostræ naturam inuestigare valemus? Qualis est ista, quæ carnem viuificare potest, se autem in sanctis cogitationibus, vt volet, constringere non potest? Qualis est ista, tam fortis, tam infirma, tam parua, tam magna, quæ rimatur secreta Dei, & cælestia contemplatur: atque humanis commodis multarum artium peritiam perspicaci ingenio adinuenisse probatur? Qualis ergo est ista, quæ tam multa de cæteris nouit, & se, qualiter facta sit, prorsus ignorat? Licet enim nonnulla ambigua, à quibusdam super eius origine proferantur, inuenimus tamen eam esse quendam intellectualem spiritum, per creatoris potentiam factum, immortaliter iuxta modum suum uiuentem; mortale corpus, quod sustinet, viuificantem, mutabilitati subiectum, obliuioni deditum: quem timor sæpe afficit, lætitia extollit. O res mira, omnique stupore dignissima! De Deo quidem creatore omnium, qui est incomprehensibilis, & ineffabilis, excelsa,

celſa, & mirabilis nimis, omni remota ambiguitate legimus, loquimur, & ſcribimus. De Angelis autem, & animalibus quidquid dicimus, non tam videnter approbare poſſumus. Sed tranſeat ab his animus., & tranſcendat omne quod creatum eſt; currat, & aſcendat, & volitet, & pertranſeat: & in eum, qui creauit omnia, quantum poteſt oculos fidei dirigat. Faciam ergo gradus aſcenſionis in corde meo, & per ipſos, aſcendam ad animam meam, & per ipſam, & mentem meam aſcendam ad Dominum meum, qui capiti meo deſuper manet.

5 Quidquid viſibiliter cernitur, quidquid ſpiritualiter imaginatur forti manu, ab intuitu cordis, & mentis procul remoueatur. Solus intellectus purus, & ſimplex incedens, rapido volatu ad ipſum perueniat conditorum Angelorum, & animarum, & omnium rerum. Mens illa beata, quæ ima deſerit, ſumma petit: quæ ponit in arduis ſedem habitationis ſuæ, & de ſummis rupibus contemplatur Solem iuſtitix, Aquilinis obtutibus. Nihil enim tam pulchrum, atque iucundum,

dum, quam Iesum solum mentis intuitu, & cordis auiditate, contemplari Deum, & miro modo inuisibiliter cernere inuisibilem; sicque aliam, non istam gustare dulcedinem; & inspicere aliam, non istam lucem. Lux enim ista, quæ loco clauditur, tempore finitur, noctium interruptione variatur: & quam communem cum vermibus, & pecoribus habemus, in comparatione illius summæ lucis non est lux dicenda, sed nox.

CAPUT XXVIII.

Quid sit quodammodo Deum cernere, & tenere, & qualiter sit de Deo sentiendum.

QUanquam autem illa summa, & incommutabilis essentia, lux vera, lux indeficiens, lux Angelorum, à nemine conspici valeat in hac vita, quod solum præmium Sanctis reseruatur in cœlesti gloria; illud tamen credere, & intelligere, & sentire, & ardentè inhiare, quodammodo illum cernere est, atque tenere. Sonet itaque vox super Angelos, & homo intenta mentè contem-

templetur Deum, verbis, quibus potest, suas illi dicat laudes. Iustum namque est, vt creatura suum laudet creatorem. Ipse enim ad laudandum se nos creauit, qui nostris non indiget laudibus.

2 Est autem virtus incomprehensibilis, nullius indigens, ipse sibi sufficiens: Magnus Dominus Deus noster, & magna virtus eius, & sapientiæ eius non est numerus. Magnus Dominus Deus noster, & laudabilis valde. Hunc itaque mens diligat, lingua canat, manus scribat, atque in his sanctis studijs, fidelis animus se totum exerceat. Huius videlicet cælestis rhetorici suauissimis dapibus, vir desideriorum, & cœlestium contemplator assidue reficiatur; vt hoc cœlesti pabulo saginatus, clamet clamore magno, clamet totis medullis cordis, clamet in iubilo, & ardentissimo mentis desiderio dicat.

* * *

*

CAPVT XXIX.

Oratio explicans plurimas Dei proprietates.

I **O** Summe, optime, omnipotentissime, misericordissime, iustissime, secretissime, præsentissime, pulcherrime, & fortissime stabilis, & incomprehensibilis: inuisibilis, omnia vicens, immutabilis, omnia mutans; immortalis, inlocalis, interminus, incircumscriptus, nusquam finitus; inæstimabilis, ineffabilis, inscrutabilis, immotus, omnia mouens, non inuestigabilis, indicibilis, metuendus atque terribilis, honorandus atque timendus, venerandus atque reuerendus; nunquam nouus, nunquam vetus, innouans omnia, & in vetustatem perducens superbos, & nesciunt.

2 Semper agens, semper quietus, colligens, & non egens; omnia portans sine onere, omnia implens sine inclusione; omnia creans, protegens, nutriendus, & proficiens; quærens, cum nihil desit tibi; amans nec æstuans, zelans, & securus es. Pœnitet te,
 & non

& non doles : irasceris, & tranquillus es; opera mutas, sed non consilium; recipis, quod non inuenis, & nunquam amisisti; nunquam inops, & gaudes lucris; nunquam auarus, & vsuras exigis; supererogatur tibi vt debeas.

3 Et quis habet quicquam non tuum? Reddis debita, nulli debens : donas debita, nihil perdens. Qui solus viuificas omnia; qui creasti omnia, qui vbique es, & vbique totus, qui sentiri potes, videri non potes : qui nusquam dees, & tamen ab iniquorum cogitationibus longe es. Qui nec ibi dees, vbi longe es : quia vbi non es per gratiam, ades per vindictam. Qui omnia tangis, nec tamen omnia tangis æqualiter. Quædam enim tangis vt sint, non tamen vt viuant, sentiant, & discernant. Quædam vero tangis vt sint, & viuant, non tamen vt sentiant, & discernant. Quædam vero tangis vt sint, viuant, & sentiant, non tamen vt discernant. Quædam vero tangis vt sint, viuant, sentiant, & discernant. Et cum tibi metipsi nunquam dissimilis sis, dissimiliter tamen tangis dissimilia :

82 MEDITATIONES

milia: qui vbique semper præsens es, & inueniri vix potes.

4 Quem stantem insequimur, & apprehendere non valemus. Qui tenes omnia, imples omnia, circumplecteris omnia, superexcedis omnia, substines omnia. Neque ex alia parte substines, atque ex alia parte superaris: neque ex alia parte imples, & ex alia circumplecteris: sed circumplectendo imples, & implendo circumplecteris, substinendo superexcedis, & superexcedendo substines. Qui doces corda fidelium sine strepitu verborum. Qui attingis à fine vsque ad finem fortiter, & disponis omnia suauiter. Qui locis non distenderis, nec temporalibus variaris. Neque habes accessus, & recessus, sed habitas lucem inaccessibilem, quam nullus hominum vidit, nec videre potest. In te manens quietus, vbique circumis totum, vbique prorsus totus. Non enim scindi vel diuidi poteris; Quia vere vnus es: nec in partes efficeris; quia totus totum tenes, totum imples, totum illustras, & possides.

5 Huius videlicet misterij immensam profunditatem, mens humana concipere non potest, nec oratoria lingua enarrare, neque diffusi sermones, nec bibliothecarum volumina queunt explicare. Si totum mundum libri repleant, tua scientia inenarrabilis explicari non potest; quoniam vere indicibilis es, nullo modo scribi potes, neque cōcludi, qui es fons lucis diuinæ, & Sol claritatis æternæ. Magnus enim es sine quantitate, & ideo immensus: bonus es sine qualitate, & ideo vere, & summe bonus: & nemo bonus, nisi tu solus, cuius volūtas est opus, cuius velle posse est.

6 Qui omnia de nihilo creasti, quæ sola voluntate tua fecisti. Qui omnem creaturam tuam absque indigentia aliqua possides, & sine labore gubernas; & absque tædio regis, & nihil est quod perturbet ordinem imperij tui, vel in summis, vel in imis. Qui in omnibus locis sine loco haberis: & omnia contines sine ambitu; & vbique es præsens sine situ, & motu. Qui nec mali auctor es: quodque facere non potes, qui nihil non po-

tēs; neque vnquam te aliquid fecisse pœnituit: nec vllius commotionis animi tui tempestate turbaris, nec totius terræ pericula damnum tuum est. Nulla flagitia, vel scelera probas, aut imperas.

7 Nunquam mentiris, quia æterna veritas es. Cuius vnus bonitate facti sumus, & iustitia pœnas luimus, & clementia liberamur. Nam nihil cæleste, nihil igneum, nihil terrenum, nihilque quod corporis sensus attingat, pro te colendum est: qui vere es, quod es, & non mutaris. Cui maxime conuenit illud quod Græci dicunt, *ὄν*, Latini Ens: quod semper idem ipse es, & anni tui non deficient. Hæc, & alia multa docuit me sancta Mater Ecclesia, cuius factus sum membrum per gratiam tuam. Docuit me sane, te solum, & vnum, & verum Deum, non esse corporeum, & passibilem. Nihilque de substantia tua, vel natura, vllō modo esse violabile, aut commutabile, aut compositum, vel factum. Et ideo certum est, corporeis oculis te non posse sentiri: sed nec ab vllō mortalium in propria essentia aliquando potuisse

tuisse videri. Hinc etenim patenter datur intelligi, quod vnde Angeli te intuentur, inde, & nos post hanc vitam te videbimus. Sed nec ipsi profecto te videre possunt. sicuti es: nulli denique alij tota, nisi tibi soli nota est omnipotens Trinitas.

CAP. V. T. X. X.

*De pluralitate personarum, & Unitate
in Deo.*

TV vero vnitas es diuinitatis, personarum pluralitate multiplex; numerabiliter es innumerabilis: ac idcirco mensurabiliter immensurabilis, & ponderabiliter imponderabilis. Non enim summæ bonitatis, quæ tu ipse es, profitemur originem: ex qua omnia, per quam omnia, in qua omnia: sed eius participatione dicimus omnia bona. Nam tua diuina essentia semper caruit, ac caret materia: licet non careat forma, forma scilicet informata, forma formarum, forma formosissima, quam dum imprimis quasi sigillum rebus singulis, eas

sine tui augmenti, aut tui detrimenti mutabilitate, procul dubio à te facis differri. Quidquid tamen in natura creatum est, creatura tua est.

2. O vna trinitas, & trina vnitas Deus, cuius omnipotentia omnia possidet, & regit, & implet quæ creauit. Nec ideo te implere omnia dicimus, vt te contineant, sed vt ipsa potius à te contineantur; nec particulatim imples omnia; nec vllatenus ita putandum est, vt vnaquæque creatura pro magnitudine portionis suæ capiat te, id est, maxima maius, & minima minus, dum sis potius ipse in omnibus siue in te omnia. Cuius omnipotentia concludit vniuersa; nec euadendi potentiã tuam, quis aditum inuenire poterit. Qui enim te non habet placatum, nequaquam euadet iratum. Sicut scriptum est: Neque ab Oriente, neque ab Occidente, neque à desertis montibus; quoniam Deus iudex est. Et alibi: Quo ibo à spiritu tuo, & quo à facie tua fugiam?

3. Immensitas diuinæ magnitudinis tuæ ista est; vt intelligamus te intra omnia, sed

non

non inclusum : extra omnia , sed non exclusum . Et ideo interior es , vt omnia contineas : & ideo exterior es , vt incircumscriptæ magnitudinis tuæ immensitate omnia concludas . Per id ergo , quod interiores , ostenderis esse creator : per id vero , quod exterior es , gubernator omnium demonstraris . Ac ne omnia , quæ creata sunt sine te essent , interiores ; exterior vero , vt omnia includantur à te , non locali magnitudine , sed potentiali præsentia ; qui vbique præsens es , & omnia tibi præsentia , quamuis quidam hæc intelligant , quidam vero non intelligant .

4 Inseparabilis ergo naturæ tuæ vnitas , separabiles nō potest habere personas : quia sicut es Trinitas in vnitate , & vnitas in trinitate , sic separationem non potes habere personarum . Nominantur quidem illæ personæ aliquando singulæ , sed ita te voluisti Deus Trinitas inseparabilem ostendere in personis , vt nullum tibi nomen sit in qualibet persona , quod non ad aliam secundum relationis regulam referatur . Sicut Pater ad

F 4

Filiū ,

Filium, & Filius ad Patrem, sic Spiritus Sanctus ad Patrem, & Filium verissime refertur. Ea vero nomina, quæ substantiam, vel personam, vel potentiam, vel essentiam tuam significât, vel quidquid proprie dicitur Deus, omnibus personis æqualiter conueniunt: vt Deus magnus, omnipotens, æternus, & omnia quæ naturaliter de te Deo dicuntur. Non est ergo aliquod naturæ nomen, quod sibi Deo Patri conuenire valeat; vt, aut Filio, aut Spiritui sancto conuenire nequeat. Dicimus te Patrem naturaliter esse Deum, sed naturaliter est, & Filius Deus, naturaliter est, & Spiritus sanctus Deus: non tamen tres Dij, sed vnus naturaliter Deus, Pater, & Filius, & Spiritus sanctus.

5 Idcirco inseparabilis es, sancta Trinitas Deus, in personis sensu intelligenda: quamuis voce separabilia habeas nomina: quia pluralem numerum in naturæ nominibus nullatenus recepis. In hoc enim ostenditur, personas non posse diuidi in sancta Trinitate, quæ vnus Deus verus est: quia cuiuslibet personæ nomen semper ad alteram respicit

respicit personam. Si Patrem dico, Filium ostendo: si Filium nōmino, Patrem prædico: si Spiritum sanctum appello, alicuius esse Spiritum necesse est intelligi, scilicet Patris, & Filij. Hæc est enim fides verā, veniens de sana doctrina: Hæc certe est Fides Catholica, & orthodoxa, quam me docuit Deus in sinu matris Ecclesiæ, gratia sua.

CAPV T XXXI.

Oratio ad sanctam Trinitatem.

Inuocat itaque, Domine, te fides mea, quam dedisti mihi propter bonitatem tuam ad saluationem mei. Fidelis autem anima ex fide viuit: tenet in spe, quod videbit in re. Inuocat te Deus meus casta conscientia mea, & suavis amor fidei meæ, quam, excussis ignorantiae tenebris, ad veritatis intelligentiam perduxisti: & quam à stulta sæculi amaritudine eruisti, atque adhibita tuæ dulcedinis charitate, iucundam mihi, & mellifluam reddidisti. Inuocat te, beata Trinitas, vox clara, & sincerus amor fidei meæ; quam

quam ab ipsis enutrens cunabulis, illuminasti semper per illustrationem gratiæ tuæ; & quam adauges confirmasti in me, per documenta matris Ecclesiæ. Te inuoco, beata, & benedicta; & gloriosa vna Trinitas: Pater, & Filius, & Spiritus sanctus: Deus Dominus, paracletus, charitas, gratia, communicatio.

2 Genitor, genitus, regenerans, verum lumen ex lumine vero, vera illuminatio. Fons, flumen, irrigatio. Ab vno omnia, per vnum omnia, in vno omnia. A quo, per quem, in quo omnia. Viuens vita, vita à viuento, viuentium viuificator. Vnus à se, vnus ab vno, vnus ambobus: *òn* à se, *òn* ab altero, *òn* ab utroque. Veritas Pater, veritas Filius, veritas Spiritus sanctus. Vna ergo (Pater, logos, paracletusque) essentia, vna virtus, vna bonitas, vna beatitudo: à quo, per quem, & in quo beata sunt omnia, quæcunque beata sunt.

CAPVT XXXII.

Quod Deus vera, & summa vita est.

I **D**Eus, vera, & summa vita, à quo, per quem, & in quo viuunt omnia quæcunque vere, & beate viuunt. Deus bonum, & pulchrum, à quo, per quem, & in quo bona, & pulchra sunt omnia, quæcunque bona, & pulchra sunt. Deus, cuius nos fides excitat, spes erigit, charitas iungit. Deus, qui peti te iubes, & inueniri te facis, & pulsanti aperis. Deus, à quo auerti, cadere est: ad quem conuerti, surgere est: in quo manere, consistere est. Deus, quem nemo amittit, nisi deceptus; nemo quærit, nisi admonitus; nemo inuenit, nisi purgatus. Deus, quem nosse, viuere est; cui seruire, regnare est; quem laudare, salus, & gaudium animæ est. Te labijs, & corde, omnique qua valeo, virtute laudo, benedico atque adoro, tuæque clementiæ, & bonitati, pro vniuersis beneficijs tuis, gratias refero, & hymnum gloriæ tuæ cano: Sanctus, Sanctus, Sanctus.

2 Te inuoco, ò beata Trinitas, vt venias in me, & templum me facias dignum gloriæ tuæ. Rogo Patrem per Filium: rogo Filium per Patrem: rogo Spiritum sanctum per Patrem, & Filium, vt omnia vitia elongentur à me, & omnes sancte virtutes plantentur in me. Deus immense, à quo omnia, per quem omnia, in quo omnia facta sunt, visibilia, & inuisibilia: qui opera tua extra circumdandas, & intra repleas: supra regis, & infra fers: custodi me opus manum tuarum in te sperantem, & in tua solummodo misericordia confidentem. Custodi me, quæso, hic, & ybique, nunc, & semper, intus, & foris, ante, & retro, supra, & infra, circumcirca; ita vt in me nullus pateat locus insidijs inimicorum,

3 Tu es Deus omnipotens, custos, & protector omnium in te sperantium: sine quo nemo est tutus, nemo de periculis liberatus. Tu es Deus, & non est alius Deus, præter te, neque in coelo sursum, neque in terra deorsum: qui facis magnalia, & mirabilia, & inscrutabilia, quorum

rum non est numerus. Te decet laus, te decet honor, te decet hymnus. Tibi omnes Angeli, tibi cœli, & vniuersæ potestates hymnos dicunt, & laudes indefinenter concinunt: vtpote Creatori creaturæ; Domino serui, Regi milites: De sanctam, & indiuiduam Trinitatem omnis creatura magnificat, omnis spiritus laudat.

CAPVT XXXIII.

Laus Angelorum, & hominum.

Tibi sancti, & humiles corde, tibi spiritus, & animæ iustorum, tibi omnes superni ciues, & cuncti beatorum spirituum ordines, gloriam, & honorem suppliciter adorantes concinunt sine fine. Laudant te, Domine, illi superni ciues magnifice, & honorabiliter. Laudat te homo, magna portio creaturæ tuæ. Sed, & ego peccator homuncio, desiderio magno cupio te laudare, amare te opto amore præcipuo. Deus meus, vita mea, fortitudo mea, & laudatio mea, dignare me, laudare te. Da mihi lumen in corde,

corde, verbum in ore; vt cor meum meditetur gloriam tuam, & lingua mea tota die canet laudes tuas.

2 Sed quia non est pulchra laus in ore peccatoris, & quia vir pollutis labijs ego sum: munda, obsecro, cor meum ab omni inquinamento: Sanctifica me, sanctificator omnipotens, interius, & exterius: & fac me dignum laudibus tuis. Suscipe benigne, & acceptabiliter de manu cordis, & de mentis amore, suscipe sacrificium labiorum meorum, fiatque acceptabile in conspectu tuo, & ascendat ad te in odorem suauitatis. Memoria tua sancta, & dulcedo tua beatissima, possideat totam animam meam, atque in inuisibilium amorem rapiat eam. Transeat de visibilibus ad inuisibilia, de terrenis ad coelestia, de tēporalibus ad æterna: transeat, & videat visionem mirabilem.

3 O æterna Veritas, & vera charitas, & chara Æternitas, tu es Deus meus, ad te suspiro nocte, ac die; tibi inhio, tibi intendo, ad te peruenire desidero. Qui nouit te, nouit veritatem, nouit æternitatem. Tu veri-

tas super omnia præfides, quem videbimus
 sicuti es, cum pertransierit hæc vita cæca,
 & mortalis; in qua dicitur nobis, ubi est
 Deus tuus? Et ego dico: Deus meus ubi es?
 Respiro in te paululum, cum effundo super
 te animam meam in voce exultationis, &
 confessionis soni epulantis, & festiuitatem
 celebrantis, & adhuc tristis est, quia relabi-
 tur, & fit abyssus: vel quin potius, sentit se
 adhuc esse abyssum. Dicit ei fides mea,
 quam accendisti in nocte ante pedes meo.

4 Quare tristis es anima mea, & quare
 conturbas me? Spera in Deo: lucerna pedi-
 bus meis verbum eius. Spera, & perseuera,
 donec pertranseat nox, mater iniquorum:
 donec pertranseat ira Dei, cuius fuimus ali-
 quando filij, (fuimus enim aliquando tene-
 bræ) donec pertranseat iste impetus aqua-
 rum: residua adhuc trahimus in corpore pro-
 pter peccatum mortuo, donec aspiret dies,
 & inclinentur vmbre. Spera in Domino,
 mane astabo, & contemplabor, semperque
 confitebor ei. Mane astabo, & videbo sa-
 lutare vultus mei Deum meum, qui viuifica-
 bit

bit mortalia corpora nostra, propter inhabitantem spiritum eius in nobis, ut iam sumus lux, dum adhuc spe salui facti sumus, & filij lucis, & filij diei, non noctis neque tenebrarum. Fuimus enim aliquando tenebræ, nunc autem lux in te Deus noster, & tamen adhuc per fidem, nec dum per speciem. Spes enim quæ videtur, non est spes.

5 Laudant te Domine illi populi Angelorum tuorum immortales, & glorificant nomen tuum cœlestes virtutes; quæ non habent opus legere hanc scripturam nostram, & cognoscere te sanctam, & indiuiduam Trinitatem. Vident enim faciem tuam semper, & ibi legunt sine syllabis temporum, quid velit æterna voluntas tua: legunt, eligunt, & diligunt, semperque legunt, & nunquam præterit id, quod legunt. Eligendo, & diligendo legunt ipsam immutabilitatem consilij tui, & non claudetur codex eorum, nec plicabitur liber eorum, quoniam tu ipse illis hoc es, & eris in æternum. O beatæ nimium illæ cœlorum virtutes, quæ laudare possunt

possunt te sancte, & purissime, cum nimia dulcedine, & ineffabili exultatione. Inde laudant vnde gaudent, quia semper vident vnde gaudere valeant, & laudare.

6 Nos vero mole carnis pressi, & procul à vultu tuo in hac peregrinatione positi, atque per mundanas varietates distenti, te digne laudare nequimus: laudamus tamen per fidem, non per speciem: illi vero Angelici spiritus per speciem non per fidem. Hoc enim caro facit, vt multo aliter laudemus, quam illi. Sed licet diuersis modis laudes dicamus, tu vnus es Deus creator omnium, cui sacrificium laudis in cœlo, & in terrâ offertur, peruenturi tamen sumus misericordia tua ad eorum consortium, cum quibus te semper videbimus, & sine fine laudabimus. Tribue Domine, vt donec in hoc fragili corpore positus sum, laudet te cor meum, laudet te lingua mea, & omnia ossa mea dicant: Domine, quis similis tui?

7 Tu es Deus omnipotens, quem trinum in personis, & vnum in substantia Deitatis, colimus, & adoramus, Patrem inge-

nitum, Filium de Patre vnigenitum, Spiritum sanctum de vtroque procedentem, & in vtroque permanentem, sanctam, & indiuiduam Trinitatem, vnum Deum omnipotentem. Qui cum non essemus, potenter fecisti nos: & cum periti fuissetus culpa nostra, pietate, & bonitate tua mirabiliter recuperasti nos: Ne finas nos esse ingratos, obsecro, tantis beneficijs, & indignos tam multis miserationibus: te deprecor, supplico, & rogo, auge fidem, auge spem, auge charitatem.

8 Fac nos per ipsam gratiam tuam semper in fide stabiles, & in opere efficaces: vt per fidem rectam, & condigna fidei opera, ad vitam te miserante perueniamus æternam: vt ibi videntes gloriam tuam sicuti est, adoremus Maiestatem tuam, & dicamus pariter, quos dignos feceris videre gloriam tuam: Gloria Patri, qui creauit nos: Gloria Filio, qui redemit nos: Gloria Spiritui sancto, qui sanctificauit nos: Gloria summæ, & indiuiduæ Trinitati, cuius opera incomparabilia sunt, cuius imperium sine fine, manet.

manet. Te decet laus, te decet hymnus,
tibi debetur omnis honor, tibi benedictio, &
claritas, tibi gratiarum actio, tibi honor,
virtus, & fortitudo, Deo nostro in sæcula
sæculorum. Amen.

CAPVT XXXIV.

*Hic conqueritur homo, quod non compungitur in
contemplatione, ex quo Angeli quoque
tremunt Deum videntes.*

I Gnosce Domine, ignosce pie, ignosce,
& miserere; parce, & ignorantiae meae,
& multae imperfectioni meae. Noli me tan-
quam temerarium reprobare, quod audeam
seruus, vtinam vel bonus, & non etiam inu-
tilis, & malus: & ideo valde malus, quia te
omnipotentem Deum nostrum terribilem,
& nimis metuendum, sine cordis contritio-
ne, & lachrymarum fonte, sine reuerentia
debita, & tremore, laudo, benedico, atque
adoro. Si enim Angeli te adorantes, & lau-
dantes tremunt, mira exultatione repleti:
ego peccator, dum tibi assisto, laudes dico,

100 MEDITATIONES

sacrificium offero; cur non corde paueo, vultu palleo, labijs tremo, toto corpore inhorresco; sicque obortis lachrymis, coram te indefinenter lugeo? Volo, sed non valeo, quia nequeo, quod desidero. Hinc enim mecum vehementer admiror, dum te nimis terribilem oculis fidei cerno: Sed quis hoc, sine ope gratiæ tuæ? Vniuersa enim salus nostra, magna misericordia tua.

2 Miserum me, quomodo sic insensata facta est anima mea: vt non terreatur terrore nimio, dum stat ante Deum, & suas illi laudes decantat? Miserum me, quomodo sic induruit cor meum; vt oculi mei indefinenter non producant flumina lachrymarum, dum conseruus sermocinatur coram Domino suo, homo cum Deo, creatura cum creatore, qui factus est ex limo, cum eo, qui omnia fecit ex nihilo? Ecce Domine, pone me ante te, & quid in secretis de me sentio, fraternis auribus non taceo. Tu diues in misericordia, & largus in præmijs, da mihi de bonis tuis, vt ex eis seruiam tibi. Non enim aliunde possumus seruire, neque

que tibi placere, nisi de tuo munere.

3 Confige, quæso, timore tuo carnes, latetur cor meum, vt timeat nomen tuum. Vtinam sic te timeret peccatrix anima mea, quomodo ille vir sanctus, qui dixit: Semper enim quasit mentes super me fluctus timui Deum. Dator enim bonorum Deus, da mihi inter laudes tuas fontem lachrymarum, simul cum cordis puritate, & mentis iubilatione, vt perfecte te diligens, & digne te laudans, ipso cordis palato sentiam, gustem, & sapiam, quam dulcis, & suavis es, Domine, sicut scriptum est: Gustate, & videte quoniam suavis est Dominus. Beatus vir, qui sperat in eo: beatus populus, qui scit iubilationem: beatus vir, cuius est auxilium abs te, ascensiones in corde suo disposuit in valle lachrymarum, in loco quem posuit. Beati mundo corde; quoniam ipsi Deum videbunt. Beati qui habitant in domo tua, Domine, in sæcula sæculorum laudabunt te.

CAPVT XXXV.

*Oratio multum mouens ad deuotionem,
& diuinum amorem.*

Iesu nostra redemptio, amor, & desiderium, Deus de Deo; adesto mihi famulo tuo. Te inuoco, ad te clamo clamore magno, in toto corde meo. Te inuoco in animam meam: intra in eam, & coapta eam tibi, vt possideas eam sine ruga, & sine macula. Mundissimo namque Domino, munda debetur habitatio. Sanctifica ergo me vas tuum, quod fecisti; de malitia euacua, imple de gratia, & plenum conserua; ita vt dignum habitationis tuæ efficiar templum hic, & in perpetuum. Dulcissime, benignissime, amantissime, charissime, potentissime, desideratissime, preciosissime, amabilissime, pulcherrime; tu melle dulcior, lacte, & niue candidior, nectare suauior, gemmis, & auro preciosior, cunctisque terrarum diuitijs, & honoribus mihi charior.

2 Quid dico, Deus meus, vna spes mea, tam grandis misericordia tua? Quid dico dulcedo foelix, & segura? Quid dico, dum talia dico? Dico, quod valeo, sed non dico, quod debeo. Vtinam possem talia dicere, qualia illi hymnidici Angelorum chori. O quam libenter me in tuis laudibus totum effunderem! O quam deuotissime illa coelestis melodiae cantica ad laudem, & gloriam nominis tui in medio Ecclesiae infatigabilis perorarem! Sed quia talia non possum, numquid tacebo? Vae tacentibus de te, qui ora mutorum resoluis, & linguas infantium facis disertas. Vae tacentibus de te, quoniam ipsi loquaces muti sunt, cum non tuas laudes dicunt.

3 Quis digne te laudare potest, ò ineffabilis virtus, & sapientia Patris! Et quoniam nulla inuenio verba, quibuste sufficienter valeam explicare cunctipotens, & omnisciū Verbum, dicam interim, quod valeo, donec iubeas me venire ad te, vbi possum dicere quod te decet, & me oportet. Et ideo suppliciter rogo, vt non respicias tantum ad

G 4

id quod

104. MEDITATIONES

id quod modo dico, sed ad id quod dicere opto. Cupio enim desiderio magno de te eloqui, quod oportet, & decet: quia te decet laus, te decet hymnus, tibi que debetur omnis honor. Scis ergo occultorum cognitor Deus, quoniam: cælo, terra, & omnibus, quæ in ea sunt tu mihi acceptior, tu mihi amabilior es. Diligo enim te super cælum, & terram, & cætera omnia quæ in eis sunt; imo amore nominis tui, quæ transitoria sunt, procul dubio amanda non sunt. Amote Deus meus amore magno, magisque te amare cupio.

4. Da mihi vt amem te semper, quantum volo, & quantum debeo, vt tu solus sis. tota intentio mea, & omnis meditatio mea. Te mediter per dies sine cessatione, te sentiam per soporem, in nocte te alloquatur spiritus meus, tecum fabuletur mens mea. Lumine sanctæ visionis tuæ illustretur cor meum, vt te rectore, te duce ambulem de virtute in virtutem, tandemque videam te Deum deorum in Sion, nunc quidem per speculum in ænigmate, tunc autem facie ad faciem, vbi
 bouq bi cognos-

cognoscā te sicut, & cognitus sum. Beati mundo corde, quoniam ipsi Deum videbunt. Beati qui habitant in domo tua, Domine; in sæcula sæculorum laudabunt te. Rogo itaque te, Domine, per omnes miserationes tuas, quibus de morte æterna liberati sumus, mollifica cor meum durum, & lapideum, saxeam, & ferreum, tua sacratissima, & potenti vñctione, & fac me per ignem compunctionis coram te omni hora hostiam vivam fieri.

Fac me in tuo conspectu cor contritum, & humiliatum semper habere, cum lachrymarum abundantia. Fac me ex toto desiderio huic mundo funditus extinguī, & transeuntium rerum obliuisci, præ magnitudine timoris, & amoris tui, usque adeo, ut de temporalibus nec lugeam, nec gaudeam, nec metuam aliquid temporale, nec diligam, nec blandis corrumpar, nec aduersis concutiar. Et quia tui valida est ut mors dilectio, absorbeat (quæso) mentem meam ab omnibus quæ sub cœlo sunt; ignita, & melliflua vis amoris tui; ut tibi soli inhæream.

106 MEDITATIONES

ream solaque tuæ suauitatis memoria pascar.

6 Descendat, Domine, descendat (precor) descendat in cor meum odor tui suauissimus, ingrediatur amor tui mellifluus. Veniat mihi tui saporis mira, & inenarrabilis fragrantia, quæ sempiternas in me suscitet concupiscentias; & ex corde meo producat venas salientis aquæ in vitam æternam. Imensus es, Domine, & ideo sine mensura debes amari, & laudari ab ijs, quos tuo precioso sanguine redemisti. Amator hominum benignissime, clementissime Domine, & æquissime iudex, cui omne iudicium dedit Pater, sapientissimo tuæ æquitatis iudicio discernis hoc rectum, & iustum esse, ut filij huius sæculi noctis, & tenebrarum, præstantiori desiderio, virtute atque studio, diligant, & quærant perituras diuitias, & fugitivos honores: quam nos serui tui diligamus te Deum nostrum, per quem facti, & redempti sumus.

7 Si enim homo hominem tanta diligectione, ut alter alterum vix patiatur abesse,

se, si sponsa sponso tanto conglutinetur mentis ardore, ut præ magnitudine amoris nulla perfrui valeat requie, chari sui absentiam non sine moerore ferens: qua ergo dilectione, quo studio, quo fervore anima, quam desponsasti tibi fide, & miserationibus, debet diligere te verum Deum, & pulcherrimum sponsum: qui nos sic amasti, & salvasti, qui pro nobis tot, tanta, & talia fecisti? Quamquam autem hæc infima habeant suas delectationes, suosque amores: non tamen tali modo delectantur sicut tu Deus noster. In te enim delectatur iustus, quia amor tui suavis est, & quietus. Nam pectora, quæ possides, dulcedine, & suavitate, & tranquillitate replet. Et contra, amor sæculi, & carnis anxius est, & perturbatus: animas certe quas ingreditur, quietas esse non patitur; semper enim suspicionibus, & perturbationibus, variisque timoribus sollicitat eas.

8 Tu itaque es delectatio rectorum, & merito: quies enim valida est apud te, & imperturbabilis vita. Qui intrat in te, bone Domine, intrat in gaudium Domini sui, & non

108 MEDITATIONES

non timebit amplius; sed ha bebit se optime in optimo loco dicens: Hæc requies mea in sæculum sæculi: hic habitabo, quoniam elegi eam. Et illud: Dominus regit me, & nihil mihi deerit; in loco pascuæ ibi me collocavit. Dulcis Christe, bone Iesu, reple semper (quæso) cor meum inextinguibili dilectione tui, continua recordatione tua, adeo, vt sicut flamma vrens, totus ardeam in tui amoris dulcedine; quem, & aquæ multe in me nunquam possint extinguere. Fac me dulcissime Domine amare te; & desiderio tui deponere pondus omnium carnalium desideriorum, & terrenarum concupiscentiarum grauissimam sarcinam, quæ impugnant, & aggrauant miseram animam meam; vt post te expedite in odore vnguentorum tuorum currens, vsque ad tuæ pulchritudinis visionem efficaciter satiandus, quantocius te quoque duce merear peruenire.

9 Duo enim amores, alter bonus, alter malus, alter dulcis, alter amarus, non se simul in vno capiunt pectore. Et ideo si quis præter te aliud diligit, non est charitas tua

Deus

Deus in eo. Amor dulcedinis, & dulcedo amoris: Amor non crucians, sed delectans: amor sincere casteque permanens in sæculum sæculi; amor, qui semper ardes, & nunquam exstingueris; dulcis Christe, bone Iesu, charitas, Deus meus: accende me totum igne tuo, amore tui, suauitate, & dulcedine tua, iucunditate, & exultatione tua, voluptate, & concupiscentia tua, quæ sancta est, & bona, casta, & munda, tranquilla est, & secura; vt totus dulcedine amoris tui plenus, totus flamma charitatis tuæ succensus, diligam te Deum meum ex toto corde meo, totisque medullis præcordiorum meorum, habens te in corde, in ore, & præ oculis meis semper, & vbique; ita vt nullus pateat in me locus adulterinis amoribus.

10 Audi Deus meus, audi lumen oculorum meorum: audi quæ peto, & da quæ petam, vt audias me, pie, & misericordissime Domine, ne efficiaris mihi inexorabilis propter peccata mea, sed propter bonitatem tuam suscipe preces serui tui: & da mihi effectum petitionis meæ, & desiderij mei; interce-

110 MEDITATIONES

tercedente, & orante, & impetrante gloriosa virgine genitrice tua, Maria Domina mea, cum omnibus Sanctis tuis. Amen.

C A P V T X X X V I.

Oratio deuotissima ad laudes habendas.

I Hriste Domine, verbum Patris, qui venisti in hunc mundum peccatores saluos facere: rogo te per indulgentissima misericordiæ tuæ viscera, emenda vitam meam, meliora actus, compone mores: tolle de me, quod mihi nocet, & tibi displicet: & da, quod nosti tibi placere, & mihi prodesse. Quis potest facere mundum de immundo conceptum semine, nisi tu solus? Tu es Deus omnipotens infinitæ pietatis: qui iustificas impios, & viuificas mortuos propter peccatum: qui mutas peccatores, & non sunt. Tolle ergo de me, quidquid tibi displicet in me. Imperfecta enim mea plurima vident oculi tui. Mitte, quæso, manum pietatis tuæ in me: & tolle de me, quidquid offendit oculos pietatis tuæ in me. Coram
te Do-

te Domine est sanitas, & infirmitas mea: illam (precor) serua, istam sana.

2 Sana me Domine, & saluabor: saluum me fac: & saluus ero: Tu, qui infirma sanas, & sanata conseruas: Tu, qui solo nutu tuo restauras diruta, & collapsa. Si enim dignaris in agro tuo corde meo serere bonum semen, necesse est, vt manu pietatis tuæ spinas prius euellas vitiorum meorum. Dulcissime, benignissime, amantissime, charissime, desideratissime, amabilissime, pulcherrime: infunde obsecro; multitudinem dulcedinis tuæ, & charitatis tuæ, pectori meo; vt nihil terrenum, nihil carnale desiderem vel cogitem: sed te solum amem, te solum habeam in corde, & in ore meo. Scribe digito tuo in pectore meo, dulcem memoriam; tui melliflui nominis, nulla vnquam obliuione delendam. Scribe in tabulis cordis mei voluntatem tuam, & iustificationes tuas; vt te immensæ dulcedinis Dominum, & præcepta tua semper, & vbique habeam præ oculis meis. Succende mentem meam igne illo tuo quem misisti in terram, & voluisti vehementer.

112 MEDITATIONES

hementer accendi, vt sacrificium spiritus contribulati, & cordis contriti, obortis lachrymis quotidie offeram tibi.

3 Dulcis Christe, bone Iesu, sicut desidero, sicut tota mente mea peto; da mihi amorem tui sanctum, & castum, qui me repleat, teneat, totumque possideat. Et da mihi euidentis signum amoris tui, irriguum lachrymarum fontem iugiter emanantem; vt ipsæ quoque lachrymæ, tui in me testentur amorem, ipsæ prodant, ipsæ loquantur, quantum te diligit anima mea: dum præ nimia dulcedine amoris tui, nequit se à lachrymis continere.

4 Reminiscor, pie Domine, illius bonæ mulieris Annæ, quæ ad tabernaculum rogatura pro filio venit: de qua scriptura refert, quod vultus eius post lachrymas, & preces, non sunt amplius in diuersa mutati. Sed memor tantæ virtutis, tantæque constantiæ, dolore torqueor, & verecundia confundor; quia me miserum, nimis deorsum iacere intueor. Si enim ita fleuit, & in fletu perseuerauit mulier, quæ quærebat filium; quomodo plange-
re,

re, & in planctu persistere debet anima mea, quæ quærit, & amat Deum, & ad eum pervenire desiderat? Quomodo gemere, ac flere debet talis anima, quæ quærit Deum die, ac nocte? quæ præter Christum nihil vult amare? Mirum quippe est, si iam non factæ sunt ei lachrymæ suæ panes die, ac nocte. Respice ergo, & miserere mei: quia dolores cordis mei multiplicati sunt. Da mihi consolationem tuam cœlestem, & noli spernere peccatricem animam, pro qua mortuus es. Da mihi, quæso, lachrymas ex toto affectu internas, quæ peccatorum meorum possint solvere vincula, & cœlesti iucunditate semper repleant animam meam. Si non cum veris, & perfectis Monachis, quorum vestigia nequeo imitari: saltem cum deuotis mulieribus, quantulamcunque portionem in regno tuo merear adipisci.

5 Venit mihi quoque in mentem alterius mulieris deuotio mira; quæ te in sepulchro iacentem, pro amore quærebat; quæ recedentibus discipulis de sepulchro, non recedebat: quia sedebat ibi tristis, & mor-

H

rens,

rens, & diu, multumque flebat : & resurgens, multis lachrymis iterum iterumque antra deserti sepulchri vigilantibus oculis explorabat, si forte alicubi te videre posset, quem feruenti desiderio quærebat. Iam certe semel, & iterum ingressa sepulchrum viderat : sed nimium amanti nō satis erat : virtus enim boni operis perseverantia est. Et quia præ cæteris dilexit, & diligendo fleuit, & flendo quæsiuit, & quærendo perseverauit : ideo prima omnium te inuenire, te videre, & te alloqui meruit.

6 Et non solum hæc, sed etiam ipsis discipulis gloriosæ resurrectionis tuæ prænuncia extitit : te præcipiente, & clementer monente : Vade ; dic fratribus meis vt vadant in Galilæam ; ibi me videbunt. Si ergo ita fleuit, & in fletu perseverauit mulier, quæ uiuentem cum mortuis quærebat, quæ te manu fidei tangebatur, quomodo plangere, & in planctu persistere debet anima, quæ te redemptorem suum iam cœlo præsidentem, & vbique regnantem, corde credit, ore confitetur ? Quomodo ergo gemere, & flere debet.

bet talis anima, quæ te toto corde diligit, te-
que toto desiderio videre concupiscit? So-
lum confugium, & vnica spes miserorum, qui
nunquam sine spe misericordiæ supplicatur.

7 Præsta mihi hanc gratiam propter te,
& propter nomen sanctum tuum: vt quoties
de te cogito, de te loquor, de te scribo, de te
lego, de te confero: quoties tui reminiscor,
tibi assisto, laudes, preces, & sacrificium of-
fero: toties obortis lachrymis, in conspectu
tuo copiose, & dulciter fleam; itaut effician-
tur mihi lachrymæ meæ panes die, ac nocte.
Tu quidem Rex gloriæ, & omnium virtutum
magister, docuisti nos verbo, & exemplo ge-
mere, & flere, dicens: Beati qui lugent,
quoniam ipsi consolabuntur. Tu fleuisti de-
functum amicum, & lachrymatus es valde
super perituram ciuitatem.

8 Rogo te bone Iesu per illas preciosissi-
mas lachrymas tuas, & per omnes miseration-
es tuas, quibus mirabiliter nobis perditis
subuenire dignatus es: da mihi gratiam la-
chrymarum, quam multum desiderat, & ap-
petit anima mea: sine dono tuo, non possum

habere eam, sed per Spiritum sanctum tuum, qui dura corda peccatorum mollit, & ad fletum compungit. Da mihi gratiam lachrymarum, sicut dedisti patribus nostris, quorum vestigia debeo imitari; ut plangam me in omni vita mea, sicut ipsi se planxerunt nocte, ac die. Propter merita, & orationes eorum, qui tibi placuerunt, & deuotissime seruiuerunt: miserere mei miserrimi, & indigni serui tui: & da mihi gratiam lachrymarum. Da mihi irriguum superius, & irriguum inferius; ut sint mihi lachrymæ meæ panes die, ac nocte, efficiatque in conspectu tuo, Deus meus, per ignem compunctionis, holocaustum pingue, & medullatum, mactet totus in ara cordis mei, & tanquam pinguißimum holocaustum assumat tibi in odorem suauitatis.

9 Da mihi, dulcissime, fontem irriguum, fontemque perspicuum, in quo lauetur assidue istud inquinatum holocaustum. Licet enim me totum tibi obtulerim opitulante gratia tua, in multis tamen quotidie offendo propter nimiam fragilitatem meam. Da ergo mihi gratiam lachrymarum, benedicte, & amabi-

amabilis Deus; præcipue ex multa dulcedine amoris tui, & commemoratione misericordiarum tuarum, præpara hanc mensam famulo tuo in conspectu tuo, & da mihi in-
- potestatem, vt quoties volo satier ex ea.

10 Tribue pro pietate, & bonitate tua, vt iste calix tuus inebrians, & præclarus, satiet sitim meam, vt inhiat, tibi spiritus meus, & ardeat mens mea in amore tui, oblitus vanitatis, & miserix. Audi Deus meus, audi lumen oculorum meorum; audi quæ peto, & da vt petam quod audias, pie, & exorabilis Domine, ne efficiaris mihi in exorabilis propter peccata mea: sed propter bonitatem tuam suscipe preces serui tui, & da mihi effectum petitionis meæ, & desiderij mei precibus, & meritis gloriosæ Virgihis Mariæ Dominae meæ, & omnium Sanctorum.

Amen.



CAPUT XXXVII.

In ista Oratione mens humana copiosius compungitur, si in quiete dicatur.

Iesu Domine, Iesu pie, Iesu bone, qui
 mori dignatus es propter peccata nostra, & resurrexisti propter iustificationem
 nostri: rogo te per gloriosam resurrectionem
 tuam, resuscita me de sepulchro vitiorum, &
 peccatorum meorum omnium: & da mihi
 quotidie partem in resurrectione prima: ut in
 resurrectione tua merear veraciter percipere
 portionem. Dulcissime, benignissime, aman-
 tissime, charissime, preciosissime, desideratis-
 sime, amabilissime, pulcherrime, ascendisti
 in cœlum cum triumpho gloriæ tuæ, & sedes
 ad dexteram Patris, rex potentissime. Trahe
 me sursum ad te, ut curram post te in odorem
 unguentorum tuorum, curram, & non defi-
 ciam, te trahente, te ducente me currentem.
 Trahe os sitientis te animæ, in superna fluen-
 ta æternæ satietatis, imo trahe me ad te fon-
 tem viuum, ut inde pro captu meo bibam.
 vnde

vnde semper viuum, Deus meus, vita mea.

2 Tu enim dixisti ore tuo sancto, & benedicto: Si quis sitit, veniat ad me, & bibat. Fons vitæ, da sitienti animæ semper bibere ex te, vt secundum sanctam, & veridicam promissionem tuam, de ventre meo fluant aquæ viuæ. Fons vitæ, reple mentem meam torrente voluptatis tuæ: inebria cor meum, sobria ebrietate amoris tui: vt obliuiscar quæ vana sunt, & terrena; & te solum iugiter habeam in memoria mea, sicut scriptum est: Memor fui Dei, & delectatus sum.

3 Da mihi Spiritum sanctum tuum, quem significabant illæ aquæ, quas sitientibus daturum te promiseras. Da, quæso, toto desiderio, & omni studio tendere, quo te ascendisse post resurrectionem die quadragesimo, credimus; vt in præsentem quidem miseria solo tenear corpore; tecum autem sim cogitatione semper, & auiditate: vt ibi sit cor meum. vbi tu es, thesaurus meus desiderabilis, & incomparabilis, multumque amabilis. In hoc enim magno huius vitæ diluuiò, vbi circumstantibus agitamur procellis, & non inueni-

tur fida statio, & locus eminentior, vbi pes columbæ valeat aliquatenus requiescere; nusquam tuta pax, nusquam secunda quies: vbique bella, & lites, vbique hostes: foris pugnae, intus timores.

4 Et quia altera pars sumus cœli, altera terræ, corpus quod corrumpitur aggrauat animam: Idcirco animus meus, socius, & amicus meus fatigatus, de via veniens languet, & iacet; discissus atque laceratus ab ijs, quas pertransierat, vanitatibus, esurit, & sitit valde: & non habeo quod ponam ante illum, quia pauper sum, & mendicus. Tu Domine Deus meus diues omnium bonorum, & dapum supernæ satietatis opulentissime largitor: da lasso cibum, collige dispersum, reintegra scissum. En stat ad ostium, & pulsas. Obsecro per viscera misericordiæ tuæ, quibus visitasti nos oriens ex alto: aperi pulsan-
 ti misero manum pietatis tuæ: & iube propitiabili dignatione, vt ingrediatur ad te, requiescat in te, reficiatur de te viuo cœlestique pane; quo satiatus resumptisque viribus, ad superiora conscendat, & de hac valle

valle lachrymarum, penna sancti desiderij raptus, ad cœlestia regna volitet.

5 Assumat, Domine, assumât (rogo) spiritus meus pennas vt aquilæ, & volitet, & non deficiat; volitet, & perueniat vsque ad decorem domus tuæ, & locum habitationis gloriæ tuæ: vt ibi super mensam refectionis ciuium supernorum pascatur de occultis tuis in loco pascuæ tuæ, iuxta fluenta plenissima requiescat in te Deus cor meum, cor mare magnum, tumens fluctibus. Tu, qui imperasti ventis, & mari, & facta est tranquillitas magna: veni, & gradere super fluctus cordis mei, vt tranquilla, & serena fiant omnia mea, quatenus vnum bonum meum amplectar te, & dulce lumen oculorum meorum contempler te, sine tumultuantium cogitationum cæca caligine. Confugiat Domine mens mea sub vmbra alarum tuarum ab æstibus cogitationum huius sæculi, vt in tui refrigerij temperamento absconsa, lætabunda cantet, & dicat: In pace in idipsum dormiam, & requiescam.

6 Dormiat (obsecro) Domine Deus, dormiat memoria mea ab omnibus malis: iniquita-

quitatem odiat, iustitiam diligat. Quid enim pulchrius, quidue dulcius, quam inter tenebras huius vltæ multasque amaritudines, diuinæ dulcedini inhiare, & æternæ beatitudini suspirare? Illic teneri mente, vbi vera habere gaudia certissimum est? Dulcissime, amantissime, benignissime, charissime, preciosissime, desideratissime, amabilissime, pulcherrime, quando te videbo? Quando apparebo ante faciem tuam? Quando satior de pulchritudine tua? Quando educes me de hoc carcere tenebroso, vt confitear nomini tuo: ita vt deinceps non compungar?

7 Quando transibo in illam admirabilē, & pulcherrimam domum tuam, vbi personat vox lætitiæ, & exultationis, in tabernaculis iustorum? Beati qui habitant in domo tua, Domine, in sæcula sæculorum laudabunt te. Beati, & vere beati, quos elegisti, & assumpsisti in illam coelestem hæreditatem. Ecce Sancti tui, Domine, florent ante te sicut liliū. Replentur enim ab vbertate domus tuæ, & torrente voluptatis tuæ potas eos, quoniam

quoniam tu es fons vitæ, & in lumine tuo vident lumen: vsque adeo, vt ipsi videlicet lumen illuminatum per te Deum illuminantem sicut Sol effulgeant in conspectu. O quam mira, quam pulchra, quam acceptabilia sunt domus tuæ habitacula, Domine virtutum! concupiscit intrare in eā hæc peccatrix anima mea. Domine dilexi decorem domus tuæ, locum habitationis gloriæ tuæ.

8 Vnam rem petij à Domino, & hanc requiram, vt inhabitem in domo Domini omnibus diebus vitæ meæ. Quemadmodum desiderat ceruus ad fontes aquarum, ita desiderat anima mea ad te Deus. Quando veniam, & apparebo ante faciem tuam: quando videbo Deum meum, quem sitit anima mea? Quando videbo eum in terra viuentium? In ista enim terra morientium videri non potest mortalibus oculis. Quid faciam miser ego, grauedine compedis mortalitatis meæ constrictus? Quid faciā? Dum sumus in corpore; peregrinamur à Domino: nō habemus hic manentē ciuitatem, sed futurā inquirimus. Noster autē municipatus in cœlis est.

9 Heu mihi ! quia incolatus meus prolongatus est : habitavi cum habitantibus Cedar, multum incola fuit anima mea. Quis dabit mihi pennas sicut columbæ : & volabo, & requiescam ? Nihil mihi tam dulce, quam cum Domino meo esse. Mihi autem adhærere Deo bonum est. Da mihi, Domine, donec his fragilibus adsisto membris, tibi adhærere, sicut scriptum est : Qui adhæret Domino, vnus spiritus est cum eo. Præbe mihi, rogo, contemplationis pennas, quibus indutus, ad te volitem sursum ; & quia omne sinistrum deorsum iacet, tene mentem meam, ne ad ima tenebrose vallis corruat : ne interueniente vmbra terræ, à te vero iustitiæ Sole separetur ; & adducta tenebrarum nebula prohibeatur alta respicere. Idcirco sursum tendo ad pacis gaudia, lucisque delectabilem, & serenissimum statum.

10 Tene cor meum manu tua, quia sine te ad altiora non rapitur. Illuc festino, vbi summa pax regnat, & iugis tranquillitas rutilat. Tene, & rege spiritum meum, & assume illum secundum voluntatem tuam : vt, te duce,

ce, ascēdat in illam regionem vbertatis, vbi
 pascis Israel in æternum pabulo veritatis: Vt
 ibi vel rapida cogitatione attingat te summā
 sapientiam, super omnia manentem, cuncta
 transeuntem, & omnia gubernantem. Sed
 volitanti ad te animæ multa sunt, quæ obstre-
 punt. Iussu tuo Domine conticescant mihi
 omnia. Ipsa sibi anima mea sileat, omnia
 pertranseat, omnia quæ creata sunt transcen-
 dat à se, & perueniat ad te; atque in te solo
 creatore omnium oculos fidei figat, tibi in-
 hiet, tibi intendat: te meditetur, te contem-
 pletur; te sibi ante oculos ponat, te sub cor-
 de reuoluat, verum, & summum bonum, &
 gaudium sine fine mansurum.

II Multæ denique sunt contemplatio-
 nes; quibus anima deuota tibi mirabiliter pa-
 scitur, sed in nulla earum ita delectatur, & re-
 quiescit anima mea sicut in te, & quando te
 solum cogitat, & contemplatur. Quam ma-
 gna multitudo dulcedinis tuæ Domine?
 Quam mirabiliter inspiras cordibus amato-
 rum tuorum? Quam mira suauitas amoris tui,
 quo perfruuntur illi, qui nihil præter te dili-
 gunt,

126 MEDITATIONES

gunt, nihil quæerunt, nihil etiam cogitare concupiscunt. Felices illi, quibus tu solus spes es! & omne opus eorum, oratio! Beatus qui sedet solitarius, & tacet, & stat super custodiam suam iugiter die, ac nocte: ut adhuc in hoc fragili corpusculo positus, prælibare valeat aliquatenus dulcedinem tuam.

12 Rogo te per illa salutifera vulnera tua, quæ passus es in cruce pro salute nostra, è quibusemanavit ille preciosus sanguis, quo sumus redempti: vulnera hanc animam meam peccatricem, pro qua etiam mori dignatus es: vulnera eam igneo, & potentissimo telo tuæ nimæ charitatis. Viuis est enim sermo Dei, & efficax, & penetrabilior omni gladio ancipiti. Tu sagitta electa, & gladius acutissimus, qui durum scurum humani cordis penetrare tua potentia vales, confige cor meum iaculo tui amoris, ut dicat tibi anima mea: Charitate tua vulnerata sum: ita ut ex ipso vulnere amoris tui vberissime fluant lachryme die, ac nocte.

13 Percute Domine, percutere (obsecro) hanc durissimam mentem meam pia, & valida

da cuspide dilectionis tuæ, & altius ad intima
 penetra potenti virtute: & sic de capite meo
 educ aquam immensam, & de oculis meis ve-
 rum fontem lachrymarum iugiter manātem,
 ex nimio affectu, & desiderio visionis pulchri-
 tudinis tuæ: vt lugeam die, ac nocte, nullam
 in præfenti vita recipiens consolationem, do-
 nec te in cœlesti thalamo merear videre dile-
 ctum, & pulcherrimū sponfum meum, Deum,
 & Dominum meum. Vt ibi videns gloriosam,
 admirabilem, & pulcherrimam faciem tuam
 omni dulcedine plenam, cum ijs quos elegi-
 sti, maiestatem tuam supplex adorem; & illic
 tandem cœlesti, & ineffabili repletus iubilo
 æternæ exultationis, exclamem cum diligen-
 tibus te dicens: Ecce, quod concupiui iam
 video, quod speraui iam teneo, quod deside-
 raui iam habeo. Illi namque in cœlis iunctus
 sum, quem in terris positus tota virtute dile-
 xi, tota charitate amplexus sum, cui toto
 amore inhæsi: ipsum laudo, benedico, atque
 adoro. Qui viuit, & regnat Deus in sæcula
 sæculorum. Amen.

CAP V T XXXVIII.

Oratio in tribulatione.

Miserere Domine, miserere pie, miserere mihi miserrimo peccatori indigna agentis, & digna patienti, assidue peccanti, & tua flagella quotidie substanti. Si penso malum quotidie quod feci, non est tantum quod patior: gravius est quod commisi: leuius est quod tolero. Iustus es Domine, & rectum iudicium tuum: omnia iudicia tua iusta sunt, & vera. Iustus, & rectus tu es Domine Deus noster, & non est vlla iniquitas in te. Non enim iniuste neque crudeliter affligis nos peccatores, omnipotens, & misericors Domine: qui cum non essemus, potenter fecisti nos: & cum perditii fuissetus culpa nostra; pietate, & bonitate tua mirabiliter reparasti nos.

2 Scio, & certus sum, quod vita nostra non temerarijs motibus agitur: sed à te Domino Deo nostro disponitur, & gubernatur. Vnde tibi cura est de omnibus, præcipue de
seruis

seruis tuis, qui totam spem suam posuerunt in sola misericordia tua. Idcirco obsecro, & suppliciter rogo, vt non facias mihi secundum peccata mea, quibus iram tuam merui: sed secundum magnam misericordiam tuam, quæ superat etiam peccata totius mundi. Tu Domine, qui exterius flagella irrogas: da semper interius indeficientem patientiam, ita vt laus tua non recedat de ore meo. Miserere mei Domine, miserere mei, & adiuua me, sicut tu nosti, quod mihi est necesse in corpore, & in anima: scis omnia, potes omnia, qui viuus in sæcula.

CAPV T XXXIX.

Oratio multum deuota ad Filium.

I Domine Iesu Christe, fili Dei viui, qui in cruce expansis manibus, propter mortalium omnium redemptionem, hausisti calicem Passionis, mihi hodie præbere digneris auxilium. Ecce pauper venio ad te diuitem, miser ad misericordem; ne recedam vacuus vel contemptus. Esuriens inci-

pio ne desinam de te ieiunus. Famelicus accedo, ne recedam impastus. Et si antequam comedam suspiro, da vel post suspiria vt comedam. In primis, dulcissime Iesu, coram magnificentia tuæ suauitatis, confiteor aduersum me iniustitiam meā. Ecce, Domine, quia in peccatis fui conceptus, & natus: & tu me abluisti, & sanctificasti: & ego postea me maioribus sordidaui peccatis. Fui enim in necessarijs natus, postea in spontaneis volutatus.

2 Sed tuæ, Domine, miserationis non immemor: tulisti me de domo patris mei carnalis, & de tabernaculis peccatorum, & inspirasti mihi vt sequerer te, cum generatione quærentium faciem tuam, ambulantium semitam rectam, commorantium inter lilia castitatis, & tecum discumbentium in cænaculo altissimæ paupertatis. Et ego tot beneficiorum ingratus, post religionis ingressum multa cōmisi illicita, multa perpetravi nefanda: & vbi peccata emēdare debui, peccata peccatis addidi. Hæc sunt mala mea, Domine, quibus exhonoraui te, & maculaui me (quem ad
 imagi-

imaginem, & similitudinem tuam creasti) superbia, vana gloria, & cætera alia mala multa, quibus vexatur, & affligitur, laceratur, & destruitur infelix anima mea.

3 Ecce, Domine, iniquitates meæ supergressæ sunt caput meum, & sicut onus graue grauatae sunt super me: & nisi tu, cui proprium est misereri semper, & parcere, dexteram tuæ maiestatis supponas, mergi cōgor miserabiliter in profundum. Attende, Domine Deus, & vide, quoniam sanctus, & ecce insultat aduersum me inimicus meus, dicens: Deus dereliquit eum, persequar, & comprehendam eum, quia non est qui eripiat. Et tu Domine vsquequo? Conuertere, & eripe animam meam, saluum me fac propter misericordiam tuam. Miserere filij tui, quem in dolore non modico peperisti; & noli attendere malum meum, vt obliuiscaris bonum tuum. Quis est pater, qui filium non liberet? aut quis filius, quem pater pietatis baculo non corripiat?

4 Ergo pater, & Domine, licet peccator sim, non possum non esse filius tuus: quia

tu me fecisti, & refecisti, sicut peccaui, emenda me; & prius flagello me emendatum, trade me filio tuo. Nunquid obliuisci potest mater infantem vteri fui? Et certe, si illa oblita fuerit, tu pater promisti te non obliuisci. Ecce clamo, & non exaudis me: dolore crucior, & non consolaris me. Quid dicam, vel quid faciam miserrimus? Ego tanto destitutus solatio, proiectus sum à facie oculorum tuorum. Heu me, de quanto bono in quantum malum cecidi! Quo tendebam, & quo deueni? Vbi sum, & vbi non sum? Ad quæ aspiravi, & nunc in quibus suspiro? Quæsiui bona, & ecce turbatio. Ecce iam morior, & Iesus non est mecum. Et certe melius est mihi non esse, quam sine Iesu esse. Melius est non viuere, quam yiuere sine vita.

5. Et tu Domine Iesu, vbi sunt misericordiæ tuæ antiquæ? Nunquid irasceris mihi in finem? Placare obsecro, & miserere mei, & non auertas faciem tuam à me: qui pro me redimendo, non auertisti faciem tuam ab increpantibus, & conspuentibus in te. Fateor, quia peccaui, & conscientia mea meretur
damna-

damnationem, & pœnitentia non sufficit ad satisfactionem: sed certum est, quod misericordia tua superat omnem offensionem. Noli, quæso, pijsime Domine, scribere aduersum me amaritudines meas, vt intres in iudicium cum seruo tuo; sed secundum multitudinem miserationum tuarum, dele iniquitatem meam. Væ mihi misero! cum venerit dies iudicij, & aperti fuerint libri conscientiarum: cum dicetur de me: Ecce homo, & opera eius. Quid faciam tunc, Domine Deus meus, cum cœli reuelabunt iniquitatem meam, & aduersum me terra consurget? Ecce nihil respondere potero, sed demisso capite præ confusione, coram te stambo trepidus, & confusus.

6 Heu me miserum, quid dicam? Clamabo ad te Domine Deus meus. Quare tacens consumor? Verumtamen si locutus fuero, non quiescet dolor meus: & si tacuero, amarissima amaritudine cruciabor interius. Plange anima mea, sicut vidua super virum pubertatis suæ. Vlula misera, & plora, quoniam dimisit te sponsus tuus, id est, Christus.

Ita omnipotens, ne irruas super me, quia nunquam capi posses in me. Certe non est in toto me, quod posset tolerare te. Misere-
rere non desperem, sed desperando respirē. Et si ego commisi, vnde me damnare potes; tu non amisisti vnde saluare soles.

7 Tu Domine non vis mortem peccatorum, nec lätaris in perditione morientium: imo vt mortui viuerent, tu mortuus es, & mors tua peccatorum mortem occidit: & ipsi te moriente vixerunt. Obsecro te Domine, vt ego, te viuente, non moriar. Mitte manum tuam de alto, & libera me de manu inimicorum meorum; ne supergaudeant mihi, & dicant: Deuorabimus eum. Quis vnquam bone Iesu, de tua misericordia diffidat; qui cum inimici tui essemus, redemisti nos in sanguine tuo, & reconciliasti nos Deo? Ecce sub tuæ misericordiæ vmbra protectus, ad thronum gloriæ veniam postulans curro, clamans, & pulsans, donec miserearis mihi. Si enim ad veniam nos vocasti, veniam non quærentes; quanto magis veniam impetrebimus postulantes?

8 Ne memineris, dulcissime Iesu, tuæ iustitiæ aduersus peccatorem tuum: sed esto memor benignitatis tuæ aduersus creaturam tuam. Ne memineris iræ aduersus reum, sed memor esto miserationis tuæ aduersus miserum. Obliuiscere superbum prouocantem, & respice miserum inuocantem. Quid enim est Iesus nisi Saluator? Ergo Iesu per temetipsum exsurge in adiutorium mihi, & dic animæ meæ: salus tua ego sum. Multum Domine de tua bonitate præsumo, quoniam tu ipse doces petere, quærere, & pulsare. Et ideo tua oratione admonitus, peto, quæro, & pulso.

9 Et tu Domine, qui iubes petere, fac accipere; consulis quærere, da, & inuenire; doces pulsare, aperi pulsanti: & confirma me infirmum, reſtaura me perditum, suscita me mortuum; & omnes sensus meos, cogitatus, & actus dirigere, & gubernare digneris in beneplacito tuo; vt de cætero tibi seruiam, tibi viuam, tibi que me tradam. Scio, Domine mi, quia ex hoc, quod me fecisti, debeo tibi meipsum: & quia me redemisti, &

pro me homo factus es, deberem tibi plus quam me; si haberem quanto tu maior es, pro quo dedisti te ipsum. Ecce nec plus habeo, nec quod habeo dare tibi possum sine te, sed accipe me tu, & trahe me ad te; ut tuus sim imitatione, & dilectione, sicut tuus sum conditione, & creatione. Qui vivis, & regnas in sæcula. Amen.

C A P V T X I.

Oratio utilis.

Domine Deus omnipotens, qui es
 trinus, & vnus, qui es semper in
 omnibus; & eras ante omnia, & eris semper
 in omnibus Deus benedictus, in sæcula: tibi
 commendo hodie, & omni tempore animam
 meam, corpus meum, visum, auditum, gu-
 stum, odoratum, & tactum: omnes cogita-
 tiones meas, affectiones, locutiones, actio-
 nes: omnia exteriora, & interiora, sensum,
 & intellectum, memoriam meam, fidem, &
 credulitatem meam, & perseverantiam meam,
 in manus potentiae tuæ: ut custodias ea die-
 bus,

bus, & noctibus, horis atque momentis. Exaudi me Trinitas sancta, & conserua me ab omni malo, ab omni scandalo, & ab omni mortali peccato, ab omnibus insidijs, & infestationibus dæmonum, & inimicorum visibilium, & inuisibilium; per orationes Patriarcharum, per merita Prophetarum, per suffragia Apostolorum, per constantiam Martyrum, per fidem Confessorum, per castitatem Virginum, & per intercessionem omnium Sanctorum, qui tibi placuerunt ab initio mundi.

2 Expelle à me iactantiam mentis, & auge compunctionem cordis; minue superbiam meam, & perfice in me humilitatem veram; fuscita in me fletum, mollifica cor meum durum, & lapideum: libera me Domine, & animam meam ab omnibus insidijs inimici, & conserua me in tua voluntate. Doce me Domine voluntatem tuam facere, quia Deus meus es tu. Da mihi Domine sensum perfectum, & intellectum, vt suspicere valeam profundam benignitatem tuam. Illud da mihi petere, quod te audire delectet, & mihi expe-

expediat. Da mihi lachrymas ex toto affectu, quæ peccatorum meorum possint dissolvere vincula.

3 Audi Domine meus, & Deus meus. Audi lumen oculorum meorum. Audi quæ peto; & da ut quod peto, exaudias. Si despicias, pereō; si respicias, vivo. Si iustitiam meam requiris, mortuus fœteo: si cum misericordia respexeris, fœtentem resuscitas de sepulchro. Quod odis in me, longe fac à me, & castitatis, ac continentię spiritum infere in me, ut quodcunque petiero in ipsa petitione, te non offendam. Tolle à me quod nocet, & præbe quod iuuet. Præsta mihi, Domine, medicinam, unde mea possint curari vulnera. Da mihi, Domine, timorem tui, cordis compunçãoem, mentis humilitatem, & conscientiam puram. Præsta mihi, Domine, ut fraternam semper tenere valeam charitatem: & mala mea non obliuiscar, aliena non requiram.

4 Parce animæ meæ, parce malis meis, parce peccatis meis, parce criminibus meis. Visita me infirmum, cura me ægrum, sana me

me languentem, & suscita me mortuum. Da mihi Domine cor, quod te timeat; mentem, quæ te diligat; sensum, qui te intelligat; aures, quæ te audiant; oculos, qui te videant. Miserere mei Deus, miserere mei, & respice me de sede sancta Maiestatis tuæ, & tenebras cordis mei radio splendoris tui illumina. Da mihi Domine discretionem discernendi inter bonum, & malum: & concede, vt sensum habeam peruigilem. Peto à te Domine remissionem omnium peccatorum meorum a quo, & per quem mihi fiat propitiatio in tempore necessitatis, & angustiarum mearum.

5 Sancta, & immaculata Virgo Dei Genitrix Maria, & Mater Domini Nostri Iesu Christi, interuenire pro me digneris apud illum, cuius meruisti effici templum. Sancte Michael, sancte Gabriel, sancte Raphael, sancti chori Angelorum, Archangelorum, Patriarcharum, atque Prophetarum, Apostolorum, Euangelistarum, Martyrum, Confessorum, Sacerdotum, Leuitarum, Monachorum, Virginum, Omniumque Iustorum, per illum qui vos elegit, & de cuius contem-
pla-

platione gaudetis, vos rogare præsumo; vt pro me culpabili, ipsi Deo supplicare dignemini; quatenus de faucibus diaboli, & de morte perpetua merear liberari. Largiri mihi digneris Domine perpetuam vitam, secundum clementiam, ac benignissimam misericordiam tuam.

6 Da Domine Iesu Christe sacerdotibus concordiam, regibus, & principibus iuste iudicantibus tranquillitatem, & pacem. Oro Domine pro vniuersa sancta Ecclesia Catholica, pro viris, & foeminis, pro religiosis, & sæcularibus, pro omnibus rectoribus Christianorum, cunctisque in te credentibus, qui pro amore tui sancto laborant, vt perseuerantiam boni operis obtineant. Præsta, Domine Rex æternæ, Virginibus castitatem, Deo dicatis continentiam, coniugatis sanctimoniam, poenitentibus indulgentiam, viduis, & orphanis sustentationem, pauperibus protectionem, peregrinantibus reditum, lugentibus consolationem, defunctis fidelibus requiem sempiternam, nauigantibus in portum venire salutis; optimis,
vt

vt in bonitate semper consistent; bonis, & mediocribus, vt meliores fiant; prauis agentibus, & delinquentibus, vt mihi misero, vt cito se corrigant. O dulcissime, & misericordissime Domine Iesu Christe, Fili Dei viui, redemptor mundi, inter omnes, & per omnia me miserum peccatorem confiteor.

7 Sed tu clementissime Pater, & summe, qui omnium misereris, non me patiaris à tua misericordia fieri alienum. Et tu Domine Rex regum, qui inducias viuendi præstas, corrigendi mihi deuotionem tribue. Excita in me mentem, quæ te requirat, te desideret, & te (qui es vbique totus trinus, & vnus) semper præ omnibus amet, te timeat, tuamque voluntatem faciat. Præcipue ergo te, Domine sancte Pater, deprecor, qui es benedictus, & gloriosus per omnia sæcula, vt omnes qui memoriam faciunt in suis orationibus, & qui indignis orationibus meis se commendauerunt, & qui mihi aliquod charitatis officium, & pietatis studium impenderunt: seu,

seu, & illos, qui consanguinitate, ac cognationis affectu sunt mihi propinqui, tam, & illos, qui nunc consistunt in corpore, quam, & illos qui teguntur funere, misericorditer gubernare digneris, ne pereant.

8 Omnibus etiam Christianis viuis adiutorium præstare digneris: & defunctis fidelibus absolutionem, & requiem sempiternam, per omnia sæcula. Nec non, & illud magnopere supplico Domine, qui es *a*, & *o*, vt cum extrema dies mea finisque vitæ meæ aduenerit, tu mihi sis misericors iudex contra malignum accusatorem diabolum; & sis mihi perpetuus defensor, aduersus insidias hostis antiqui; & in societatem Angelorum, omniumque Sanctorum in sancto Paradiso tuo me perseverare facias. Qui es benedictus in sæcula sæculorum.

*
*

CAPVT XLII.

*Oratio deuota de recordatione passionis
Iesu Christi.*

I Domine Iesu Christe, redemptio mea,
misericordia mea, salus mea: te
laudo, tibi gratias ago; quamuis valde im-
pares tuis beneficijs, quamuis multum ex-
pertes deuotionis, quamuis macras à desi-
derata pinguedine dulcissimi tui affectus, ta-
men qualescunque gratias, non quales scio
me debere, sed sicut potest conari, tibi per-
soluit anima mea. Spes cordis mei, virtus
animæ meæ, compleat tua potentissima di-
gnitas, quod conatur mea tepidissima imbe-
cillitas, vita mea, tu finis intentionis meæ.
Et si nondum merui tantum, quantum debi-
tor sum amare, vtique saltem desidero te
amare quantum debeo.

2. Illuminatio mea, tu vides conscien-
tiam meam; quia, Domine, ante te est om-
ne desiderium meum, & tu donas siquid be-
ne vult conscientia mea. Si bonum est, Do-
mine,

144 MEDITATIONES

mine, quod inspiras; imo, quia bonum est, ut te velim amare: da, quod me facis velle: da, ut quantum iubes, tantum te merear amare. Laudes, & gratias offero, ne sit mihi donum tuum infructuosum, quod tua spontanea dedisti voluntate. Perfice quod incepisti, & dona quod me benigne perueniendo, immeritum desiderare fecisti. Conuer-te, benignissime, meum torporem in frequentissimum tui amorem. Ad hoc enim, clementissime, tendit hæc oratio mea, hæc memoria, & meditatio beneficiorum tuorum, ut tui accendas in me amorem.

3 Tua me, Domine, bonitas creauit; tua misericordia creatum ab originali peccato mundauit; tua patientia post illam emundationem Baptismi, in alijs peccatorum sordibus inuolutum hætenus tolerauit, nutriuit, & expectauit. Expectas tu bone Domine correctionem, expectat anima mea ad poenitendum, ad bene viuendum tuæ gratiæ inspirationem. Deus meus, creator meus, tolerator, & nutritor meus, te sitio, te esurio, te desidero, ad te suspiro, & concupisco,

cupisco, & sicut pupillus benignissimi patris orbatuſ præſentia, flens, & eiulans inceſſanter, eius dilectam faciem toto corde amplectitur: ſic ego non quantum debeo, ſed quantum queo, memor paſſionis tuæ, memor alarum tuarum, memor flagellorum, memor vulnerum tuorum, memor qualiter pro me occiſus es, qualiter conditus, qualiter ſepultus, ſimul memor tuæ glorioſæ reſurrectionis, & admirabilis aſcenſionis, hæc indubitata fide teneo, exilij mei ærumnas deſleo, ſpero tui aduentus ſolam conſolationem, ardentè deſidero tui vultus glorioſam contemplationem.

4 Hei mihi! quia videre non potui Dominum Angelorum, humiliatum ad conuerſationem hominum, ut homines exaltaret ad conuerſationem Angelorum, cum Deus offenſus moriebatur, ut peccator viueret. Heu, quod tam admirabili, tam inæſtimabili pietati præſens obſtupescere non merui! Cur, ò anima mea, te præſertim non tranſfigit gladius doloris acutiſſimi, cum ferre non poſſes vulnerari lancea latus tui Saluatoris? cum videre

dere nequires violari clavis pedes, & manus
tui plasmatoris? cum horrore effundi sangui-
nem tui Redemptoris?

5 Cur non es inebriata lachrymarum
amaritudine, cum ille potaretur amaritudine
fellis? Cur non es compassa castissimæ Vir-
gini dignissimæ matri eius, dignissimæ Do-
minæ tuæ? Domina mea misericordissima,
quos fontes dicam erupisse de tuis pudicissi-
mis oculis, cum attenderes vnicum filium
tuum innocentem coram te ligari, flagella-
ri, & mactari? Quos fletus credam perfudis-
se pijsimum tuum vultum, cum suspiceres
eundem filium tuum, Deum, & Dominum
tuum in cruce sine culpa extendi, & carnem
de carne tua ab impijs crudeliter dissecari?
Quibus singultibus, æstimabo purissimum
pectus tuum vexatum esse, cum tu audires:
Mulier, ecce filius tuus. Et Discipulus: Ec-
ce mater tua. Cum acciperes discipulum pro
magistro, seruum pro domino.

6 Vtinam cum felice Ioseph Dominum
meum de cruce deposuissem, aromatibus
condidissem, in sepulchro collocaissem; vt
saltem

saltem persecutus, vel consecutus essem, ut tanto funeri non defuisset aliquid mei obsequij. Vtinam cum beatis mulieribus, corusca visione Angelorum essem territus, & audissem nuncium Dominicæ Resurrectionis, nuncium meæ consolationis, nuncium tam expectatum, nuncium tam desideratum.

Vtinam, inquam, audissem ex ore Angeli: Nolite timere vos: Iesum quæritis crucifixum, surrexit, non est hic. Benignissime, suavissime, serenissime, quando restaurabis mihi, quia non vidi illam beatæ tuæ carnis incorruptionem? quia non fui deosculatus loca vulnerum, fixuram clauorum? quia non respersi lachrymis gaudij cicatrices corporis veri? Admirabilis, inæstimabilis, incomparabilis, quando consolaberis, & compeſces me à dolore meo? Non enim cadit à me dolor meus, quamdiu peregrinus sum à Domino meo.

7 Heu mihi Domine! heu animæ meæ! Recessisti consolator animæ meæ, nec vale dixisti. Ingrediens vias tuas benedixisti tuis, nec affui. Eleuatis manibus à nube susceptus

es in cælum, nec vidi. Angeli promiserunt te rediturum, nec audiui. Quid dicam? quid faciam? quo vadam? vbi eum quæram? vel quando inueniam? quem rogabo? quis annuntiabit dilecto, quia amore langueo? Defecit gaudium cordis mei, versus est in luctum risus meus: defecit caro mea, & cor meum, Deus cordis mei, & pars mea, Deus, in æternum. Renuit consolari anima mea, nisi de te dulcedo mea. Quid enim mihi est in cœlo, & à te quid volui super terram? Te volo, te spero, te quæro, tibi dixit cor meum: Quæsiui vultum tuum, vultum tuum Domine requiram, ne auertas faciem tuam à me.

8 Amator hominum benignissime, tibi derelictus est pauper, orphano tu eris adiutor. Mi aduocate tutissime miserere mei, orphani derelicti, pupillus factus sum absque patre, anima mea quasi vidua. Respice orbitatis, & viduitatis meæ lachrymas, quas tibi offero donec redeas. Eia iam Domine, eia appare mihi, & consolatus ero. Exhibe præsentiam tuam, & consecutus ero desiderium meum. Reuela gloriam tuam, & erit per-

perfectum gaudium meum. Sitiuit in te anima mea, quam multipliciter tibi caro mea. Sitiuit anima mea ad Deum fontem viuum, quando veniam, & apparebo ante faciem Domini?

9 Quando venies, consolator meus? Quem expectabo? O si quando videbo gaudium meum, quod desidero! O si satiabor cum apparuerit gloria mea, quam esurio! O si inebriabor ab vbertate domus tuæ, ad quam suspiro! Si potabis me torrente voluptatis tuæ, quem sitio! Sint mihi, Domine, interim lachrymæ meæ panes die, ac nocte, donec dicatur mihi: Ecce Deus tuus; donec audiat anima mea: Ecce sponsus tuus. Pafce interim me singultibus meis, refocilla me doloribus meis. Veniet fortasse redemptor meus, quia bonus est; nec tardabit, quia pius est. Ipsi gloria in sæcula sæculorum. Amen.

Meditationum finis.

D I V I A V G V S T I N I

HIPPONENSIS EPISCOPI,

*Liber Soliloquiorum animæ
ad Deum.*

C A P V T P R I M V M.

De ineffabili dulcedine Dei.



Ognoscam te Domine cognitor meus: cognoscā te virtus animæ meæ. Ostende te mihi, cōsolator meus: videam te lumen oculorum meorum. Veni gaudium spiritus mei; videam te, lætitia cordis mei. Diligam te, vita animæ meæ. Appare mihi delectatio mea magna, solatium meum dulce: Domine Deus meus, vita mea, & gloria tota animæ meæ. Inueniam te, desiderium cordis mei; teneam te, amor animæ meæ. Amplectar te sponse cœlestis, exultatio mea
sum-

summa intus, & extra. Possideam te beatitudo sempiterna; possideam te in medio cordis mei, vita beata, dulcedo summa animæ meæ. Diligam te Domine fortitudo mea, Domine firmamentum meum, & refugium meum, & liberator meus. Amem te Deus meus, adiutor meus, turris fortitudinis mihi, & spes mea dulcis in omni tribulatione mea. Amplectar te bonum, sine quo nihil bonum; fruar te optimo, sine quo nihil est optimum. Aperi penetralia aurium mearum, verbo penetrabiliore omni gladio ancipiti, ut audiam vocem tuam. Intona, Domine, desuper voce grandi, & forti. Tonet mare, & plenitudo eius, commoueatur terra, & omnia quæ in eis sunt.

2 Illustra oculos meos lux incomprehensibilis; fulgura coruscationem, & dissipa eos, ut non videant vanitatem. Fulgura multiplica, & conturba eos; appareant fontes aquarum, & reuelentur fundamenta orbis terrarum. Tribue visum, lux inuisibilis, qui te videat. Crea nouum olfactum, odor vitæ, qui post te currat in odorem vnguentorum.

tuorum. Gustum sana, qui sapiat, & cognoscat, & discernat, quam magna multitudo dulcedinis tuæ Domine, quam abscondisti his, qui pleni sunt charitatis tuæ. Da cor, quod te cogitet: animum, qui te diligat: mentem, quæ te recolat: intellectum, qui te intelligat: rationem, quæ tibi semper summo delectabili fortiter adhæreat. Te semper amor sapiens diligit. O vita, cui omnia viuunt: vita, quæ dat mihi vitam: vita, quæ est mea vita, per quam uiuo, sine qua morior: vita, per quam resuscitor, sine qua pereor: vita, per quam gaudeo, sine qua tribulor; Vita vitalis, dulcis, & amabilis, semper memorabilis, ubi quæso es? Ubi te inueniam, ut in me deficiam, & in te subsistam? Prope esto in animo, prope in corde, prope in ore, prope in auribus, prope in auxilio: quia amore langueo, quia sine te morior, quia te recolens suscitior. Odor tuus me recreat, memoria tui me sanat: sed satiabor cum apparuerit gloria tua, vita animæ meæ. Concupiscit, & deficit anima mea de memoria tua, quando veniā, & apparebo tibi, lætitia mea?

3 Quare faciem tuam auertis, gaudium meum per quod gaudeo? Vbi est absconditus pulcher, quem desidero? Odorem tuum haurio, viuo, & gaudeo: te autem non video. Vocem tuam audio, & reuiuifco. Sed cur faciem tuam abscondis? Forte dicis: Non videbit me homo, & viuet. Eia Domine moriar, vt te videam: videam vt hic moriar. Nolo viuere, volo mori: dissolui cupio, & esse cum Christo. Mori desidero, vt videam Christum: viuere renuo, vt viuam cum Christo. O Domine Iesu, accipe spiritum meum: Vita mea, suscipe animam meam: Gaudium meum, attrahe cor meum: Dulcis cibus meus, comedam te: Caput meum; dirige me: Lumen oculorum meorum, illumina me: Melos meum, tempera me: Odor meus, viuifica me: Verbum Dei, recrea me: Laus mea, lætifica animam serui tui. Intra in eam, Gaudium meum, vt in te gaudeat. Intra in eam, Dulcedo summa, vt dulcia sapiat. Lumen æternum, illustra super eam, vt te intelligat, cognoscat, & diligat. Ob hoc enim non te diligit, Domine, si te non diligit, quia non
te

te cognoscit: & te ideo non cognoscit, quia non intelligit: & idcirco non intelligit, quia lumen tuum non comprehendit: & lux in tenebris lucet, & tenebræ eam non comprehenderunt.

4 O lux mentis, ò lucens veritas, ò vera claritas, quæ illuminas omnem hominem venientem in hunc mundum! Venientem quidem, sed non diligentem: quia qui diligit mundum, inimicus Dei constituitur. Expelle tenebras desuper faciem abyssi mentis meæ; vt videat te intelligendo, vt cognoscat te comprehendendo, vt diligat te cognoscendo. Quisquis enim cognoscit te, diligit te; se obliuiscitur, amat te plusquam se; relinquit se, & venit ad te, vt gaudeat de te. Hinc est ergo, Domine, quod non tantum diligo, quantum debeo; quia non plane cognosco te: sed quia parum cognosco, parum diligo; & quia parum diligo, parum in te gaudeo. Séd à te vero gaudio interiori per exteriora recedens, dum te solo careo, adulterinas amicitias in his exterioribus quæro. Et sic miser ego, cor meum, quod tibi soli debui

debui toto amore totoque affectu impendere, vanis dedi: & ideo vanus effectus sum, dum vanitatem dilexi. Hinc etiam est, Domine, quod in te non gaudeo, & tibi non adhæreo: quia ego in exterioribus, tu in interioribus: ego in temporalibus, tu in spiritualibus: ego in transitorijs animo diffundor, cogitatione verſor, loquutione implicor, & tu Domine in æternis habitas, & æternitas es: Tu in cœlo, ego in terra: Tu diligis alta, ego infima: Tu cœlestia, ego terrestria. Et quando poterunt hæc contraria conuenire?

C A P V T I I.

De miseria, & fragilitate hominis.

Miser ego, quando poterit obliquitas mea tuæ rectitudini adæquari? Tu Domine diligis solitudinem ego multitudinem: Tu silentium, ego clamorem: Tu veritatem, ego vanitatem: Tu munditiam, ego immunditiam sequor. Quid plura Domine? Tu vere bonus, ego malus: Tu pius, ego impius: Tu sanctus, ego miser: Tu iustus,

stus, ego iniustus: Tu lux, ego cœcus: Tu vita, ego mortuus: Tu medicina, ego æger: Tu gaudium, ego tristitia: Tu summa veritas, ego vniuersa vanitas: vt omnis homo viuens. Heu quid igitur, ò Creator dicam? Audi ò Creator. Creatura tua sum, iam perij: Creatura tua sum, iam morior: Factura tua sum, iam ad nihilum redigor: Plasma tuum sum: Manus tuæ Domine fecerunt me, & plasmauerunt me: Manus inquam illæ, quæ affixæ clauis sunt pro me. Opus manuum tuarum Domine ne despicias; vulnera manuum tuarum precor vt aspicias. Ecce in manibus tuis Domine Deus descripsisti me. Lege ipsam scripturam, & salua me. En ad te suspiro creatura tua: Creator es, recrea me. En ad te clamo factura tua: Vita es, viuifica me. En ad te respicio tuum plasma: Plasmator es, restaura me. Parce mihi Domine, nihil enim sunt dies mei.

2 Quid est homo, vt possit alloqui Deū factorem suum? Parce mihi colloquente tibi. Ignosce seruo tuo, qui præsumit loqui tanto Domino: Legem non habet necessitas.

Dolor

Dolor me compellit dicere : Calamitas quā
 patior, cogit me exclamare : Ægrotus sum,
 ad medicum clamo : Cœcus sum, ad lucem
 propero : Mortuus sum, ad vitam suspiro.
 Tu es medicus, tu lux, tu vita : Iesu Nazare-
 ne, miserere mei, fili David miserere mei.
 Fons misericordiæ, audi, quid ad te clamat
 infirmus. Lux quæ transis, expecta cœcum,
 præbe ei manum, vt ad te veniat : & in lumi-
 ne tuo videat lumen. Vita viuens, reuoca
 mortuum. Quid sum ego, qui loquor tecum?
 Væ mihi Domine, parce mihi Domine. Ego
 cadauer putridum, esca vermium, vas foeti-
 dum, cibus ignium. Quid sum ego, qui lo-
 quor tecum? Væ mihi Domine, parce mihi
 Domine. Infœlix ego homo. Homo, in-
 quam, natus de muliere, breui viuens tem-
 pore, repletus multis miserijs : Homo (in-
 quam) vanitati similis factus, comparatus iu-
 mentis insipientibus, & iam similis factus il-
 lis.

3 Quid iterum ego? Abyssus tenebro-
 sa, terra misera; filius iræ, vas aptum in con-
 tumeliam : genitus per immunditiam, viuens
 in

in miseria, moriturus in angustia. Heu miser, quid sum? quid futurus sum? Vas sterquilini, concha putredinis, plenus foetore, & horrore: cæcus, pauper, nudus, plurimis necessitatibus subditus, & ignorans introitum, & exitum meum, miser, & mortalis. Cuius dies sicut umbra prætereunt, cuius vita sicut umbra lunatica evanescit, sicut flos in arbore crescit, & statim marcescit, nunc floret, & statim aret. Vita (inquam) mea, vita fragilis, vita caduca, vita quæ quanto magis crescit, tanto magis decrescit: quanto magis procedit, tanto magis ad mortem accedit. Vita fallax, & umbratica, plena laqueis mortis. Nunc gaudeo, statim tristior; nunc vigeo, sæpe infirmior; nunc vivo, statim morior; nunc felix appareo, semper miser; nunc rideo; iam fleo. Sicque omnia mutabilitati subiacent, ut mihi vix vna hora in vno statu permaneat. Hinc timor, hinc tremor, hinc fames, hinc sitis, hinc calor, hinc frigus, hinc languor, inde dolor exuberat. Subsequitur his importuna mors, quæ mille modis quotidie miseros homines inopinante

pinat rapit. Hunc necat febribus, illum opprimit doloribus: hunc consumit fames, illum sitis extinguit: hunc suffocat aquis, illum interimit laqueo: illum perimit flammis, alium dentibus bestiarum ferocium vorat: hunc trucidat ferro, illum veneno corrumpit, alterum tantum repentino terrore miseram vitam finire compellit. Et nunc super hæc omnia magna miseria, quia cum nihil sit certius morte, ignorat tamen homo finem suum. Et cum stare putat, colliditur, & perit spes eius. Nescit enim homo quando, vel ubi, vel quomodo morietur, & tamen certum est, quod cum mori oporteat.

4 Ecce, Domine, quam magna miseria hominis, in qua sum, nec timeo: quam gravis calamitas quam patior, nec doleo, & ad te non clamo. Clamabo, Domine, ante quam transeam, si forte non transeam, sed in te maneam. Dicam ergo, dicam miseriam meam: confitear, nec erubescam, ante te vtilitatem meam. Adiuua me fortitudo mea, per quam subleuor, succurre virtus, per quam sustentor: veni lux, per quam video: appare gloria,

gloria, per quam gaudeo: appare. vita, in qua viuam, o Domine Deus meus.

C A P V T I I I.

De admirabili lumine Dei.

1 **O** Lux quam videbat Tobias, quando oculis clausis docebat filium suum viam vitæ. Lux quam videbat Isaac interius, quando caligantibus oculis exterius filio futura narrabat. Lux (inquam) inuisibilis, cui omnis abyssus humani cordis est visibilis. Lux quam Iacob videbat, quando sicut tu intus docebas, filijs exterius ventura prædicebat. Ecce tenebræ sunt super faciem abyssi mentis meæ, tu es lumen. Ecce caligo tenebrosa super aquas cordis mei, tu es veritas.

2 O Verbum, per quod facta sunt omnia, & sine quo factum est nihil!. Verbum quod est ante omnia, & ante quod nihil. Verbum regens omnia, sine quo nihil sunt omnia. Verbum, quod dixisti in principio, fiat lux, & facta est lux. Dic etiam mihi, fiat lux; & facta sit lux; & videam lumen, & cognoscam

scam quidquid non est lumen: quia sine te, mihi tenebræ lumen, & lumen tenebræ ponuntur. Et sic sine tua luce non est veritas. Adest error, adest vanitas; non est discretio, adest confusio: adest ignorantia, non est sciētia: adest cœcitas, non est visio: adest inuiū, non est via: adest mors, non est vita.

CAPVT IV.

De mortalitate humane nature.

I **E**Cce Domine, quia lux non est, mors est: immo non est mors, quia nihil est mors. Nam per ipsam ad nihilum tendimus, dum nos nihil facere per peccatum non formidamus. Et iuste quidem hoc Domine: Nam digna factis recipimus, dum ad nihilum deuenimus, tanquam aqua decurrens; quia sine te factum est nihil, & nos faciendo nihil, facti sumus nihil; quia sine te sumus nihil, per quem facta sunt omnia, sine quo factum est nihil. O Domine Verbum! O Deus Verbum, per quod facta sunt omnia, sine quo factum est nihil! Væ mihi misero toties obca-

cato; quia tu lux, & ego sine te! Væ mihi misero toties vulnerato; quia tu salus, & ego sine te! Væ mihi misero toties infatuato, quia tu es veritas, & ego sine te! Væ mihi misero toties aberrato, quia tu via, & ego sine te! Væ mihi misero toties mortuo, quia tu vita, & ego sine te! Væ mihi misero toties annihilato, quia tu es Verbum, per quod facta sunt omnia, & ego sine te, sine quo factum est nihil.

2 O Domine Verbum! ò Deus Verbū! qui es lux, per quem facta est lux, quī es vīa, veritas, & vita: in quo non sunt tenebræ, error, vanitas, neque mors. Lux, sine qua tenebræ; via, sine qua error; Veritas, sine qua vanitas mors: Dic Verbum Domine, fiat lux, vt videam lucem, & vitem tenebras: videam viam, & vitem iniuriam; videam veritatem, & vitem vanitatem; videam vitam, & vitem mortem. Illuminare Domine lux mea, illuminatio mea, & salus mea, quem timebo: Dominus meus, quem laudabo. Deus meus, quem honorabo: Pater meus, quem amabo: sponsus meus, cui me

me seruabo. Illuminare (inquam) illuminare lux huic coeco tuo, qui in tenebris, & in vmbra mortis sedet, & dirige pedes eius in viam pacis; per quam ingrediar in locum tabernaculi admirabilis vsque ad domum Dei, in voce exultationis, & confessionis. Vera enim confessio est via, per quam ingrediar ad te viam, per quam egrediar ab inuio, & reuertar ad te viam, quia tu es vera via vitæ.

C A P V T V.

Quid sit nihil fieri.

ICONFITEAR ergo, confitear tibi Pater Domine coeli, & terræ, miseriam meam: vt me venire liceat ad misericordiam tuam. Miser quippe factus sum, & ad nihilum redactus sum, & nesciui: quia tu es veritas, & ego non eram tecum. Vulnerauerunt me iniquitates meæ, & non dolui, quia tu es vita, & ego non eram tecum. Ad nihilum duxerunt me, quia tu es Verbum, & ego non eram tecum, per quem facta sunt omnia, sine quo factum est nihil: & ideo sine te factus sum

nihil, quia nihil est, quod ad nihilum ducit. Omnia per Verbum facta sunt, quæcunque facta sunt. Et qualia facta sunt? Vidit Deus cuncta quæ fecerat, & erant valde bona. Omnia quæcunque facta sunt, per Verbum facta sunt: & quæcunque per Verbum facta sunt, valde bona sunt. Quare bona sunt? quia omnia per Verbum facta sunt, & sine ipso factum est nihil, quia nihil bonum sine summo bono est. Sed malum est, vbi non est vllum bonum, quod vtique nihil est: quia nihil aliud est malum, quam priuatio boni; sicut nihil aliud est cœcitas, quàm priuatio luminis.

2 Malum itaque nihil est; quia sine Verbo factum est, sine quo factum est nihil; illud autem malum est, quod priuatur illo bono, per quod omnia facta sunt, quæcunque sunt. At quæ non sunt, per ipsum facta non sunt, & ideo nihil sunt. Et ideo mala sunt, quæ facta non sunt: quia omnia quæcunque facta sunt, per Verbum facta sūt; & omnia per Verbum bona facta sunt. Cum igitur omnia per Verbum facta sunt, mala per ipsum non sunt. Restat igitur, quod omnia,

nia, quæ facta non sunt, bona non sunt; quia omnia quæcunque facta sunt, bona sunt: & ideo mala sunt, quia facta non sunt: & ideo nihil sunt, quia sine Verbo factum est nihil. Malum igitur nihil est, quia factum non est. Sed qualiter malum est, si factum non est? Quia malum priuatio boni est, per quod factum bonum est. Esse ergo sine Verbo, malum est; quod esse non est, quia sine ipso nihil est. Sed quid est separari à Verbo?

3 Si hoc quæris scire, audi, quid est Verbum. Verbum Dei dicit: Ego sum via, veritas, & vita. Separari ergo à Verbo, est esse sine via, sine veritate, sine vita; & ideo sine ipso nihil, & ideo malum, quia separatur à Verbo, per quod omnia facta sunt valde bona. Separari autem à Verbo, per quod omnia facta sunt, nihil aliud est, quam deficere: & à facto transire in defectum; quia sine ipso est nihil. Quoties ergo à bono deuias, à Verbo te separas, quia ipsum est bonum: & ideo nihil efficeris, quia sine Verbo es, sine quo factum est nihil. Nunc igitur Domine illuminasti me, vt viderem te; vidi, & cognoui

me: quia toties nihil factus sum, quoties à te
 separatus sum; quia bonum, quod tu es, ob-
 litus sum, & ideo malus effectus sum. Væ mi-
 hi misero, vt quid hoc non cognoscebam,
 quia te deferens nihil fiebam! Sed quid hoc
 quæro? Si nihil eram, quomodo cognosce-
 re nolebam? Scimus quia malum nihil est:
 & quod nihil est, non est, & quod non est bo-
 num, non est, quia nihil est. Si ergo nihil
 fui, cum sine te fui, quasi nihil fui, & velut
 idolum, quod nihil est. Quod quidem aures
 habet, & non audit: nares habet, & non
 odorat: oculos habet, & non videt: os ha-
 bet, & non loquitur: manus habet, & non
 palpat: pedes habet, & non ambulat: &
 omnia lineamenta habet membrorum sine
 sensu eorum.

CAPVT VI.

De casu animæ in peccatis.

I **C**VM igitur fui sine te, non fui, sed ni-
 hil fui, & ideo cæcus eram, surdus,
 & insensibilis: qui nec bonum discernebam,
 nec

nec malum fugiebam : nec dolorem vulnerū sentiebam, nec tenebras meas videbam, quia eram sine te vera luce, quæ illuminas omnem hominem venientem in hunc mundum. Væ mihi ! vulnerauerunt me, & non dolui; traxerunt me, & non sensi : quia nihil eram, quia sine vita eram, quæ est Verbū, per quod facta sunt omnia. Ideo Domine lux mea, inimici mei de me fecerunt quæcunque voluerunt, percusserunt, nudauerunt, polluerunt, corruerunt, vulnerarunt, & occiderunt me: quia recessi à te, & factus sum nihil sine te.

2. Heu Domine vita mea, qui fecisti me; lux mea, qui direxisti me ! Defensor vitæ meæ miserere mei, & resuscita me Domine Deus meus, spes mea, virtus mea, fortitudo mea, consolatio mea. In die tribulationis meæ, respice inimicos meos, & eripe me : fugiant à facie meā, qui oderunt me, & ego viuam in te, per te. Ipsi enim Domine considerauerunt me : & videntes me sine te, despexerunt me. Diuiserunt sibi vestimenta virtutum, quibus ornaueras me : fecerunt sibi viam per me : sub pedibus suis conculcauerunt

runt me : facibus peccatorum polluerunt templum sanctum tuum : posuerunt me desolatum , & moerore confectum . Ibam post eos cæcus , & nudus , & illaqueatus funibus peccatorum . Trahebant me post se in circuitu de vitio in vitium , & de luto in lutum , & ibam absque fortitudine ante faciem subsequenti . Seruus eram , & seruitutem amabam : cæcus eram , & cæcitatem desiderabam : vincitus eram , & vincula non horrebam . Amarum dulce , & dulce amarum credebam .

3. Miser eram , nec cognoscebam : & hoc quia sine Verbo eram , sine quo factum est nihil , per quod omnia conseruantur , sine quo omnia annihilantur . Sicut enim omnia per ipsum facta sunt , & sine ipso factum est nihil ; sic per ipsum omnia conseruantur , quæcunque sunt siue in coelo , siue in terra , siue in mari , & in omnibus abyssis . Nec pars parti in lapide adhæret , nec in aliquo creatorum : nisi quia per Verbum conseruatur , per quod omnia facta sunt . Adhæream ergo tibi Verbo , vt conserues me ; quia vbi à te recessi , perij in me : nisi quia tu , qui me fecerás , refeci-
sti

sti me. Ego peccaui, tu me visitasti: ego cecidi, tu me erexisti: ego ignoravi, tu me docuisti: ego non vidi, tu me illuminasti.

C A P V T V I I.

De multiplicibus beneficijs Dei.

1 **M**iser ego, Deus meus, quantum teneor diligere te, ostende mihi; quantum debeo laudare te, demonstra mihi: quantum debeo placere tibi, innotesce mihi. Intona, Domine, desuper voce grandi, & forti in interiorem aurem cordis mei: doce me, & salva me: & collaudabo te, qui creasti me cū nihil essem; qui illuminasti me, cum in tenebris essem; qui resuscitasti me, cum mortuus essem; qui paucisti me à iuuentute mea omnibus bonis tuis. Hunc inutilem vermem, foetentem peccatis, nutris omnibus optimis donis tuis.

2 Aperi mihi, ò clavis David, qui aperis, & nemo claudit illi, cui tu aperis: claudis, & nemo aperit illi, cui tu claudis. Aperi mihi ostium luminis tui, vt ingrediar, & videam,

deam, & cognoscam, & confitear tibi in toto corde meo, quia misericordia tua magna est super me, & eruisti animam meam ex inferno inferiori. Domine Deus noster, quam admirabile, & laudabile est nomen tuum in vniuersa terra! Ecquid est homo, quod memor es eius? aut filius hominis, quoniam visitas eum? Domine spes Sanctorum, & turris fortitudinis eorum. Deus vita animæ meæ, per quam uiuo, sine qua morior. Lumen oculorum meorum, per quod video, sine quo orbor. Gaudium cordis mei, & lætitia spiritus mei, diligam te toto corde meo, & toto animo meo, & totis medullis, & visceribus meis, quia tu prior dilexisti me.

3 Et vnde hoc mihi, ò Creator cœli, & terræ, & abyssi, qui bonorum meorum non indiges, vnde hoc mihi, quod dilexisti me? O sapientia, quæ aperis os mutorum! ò Verbum, per quod facta sunt omnia: aperi os meum, da mihi vocem laudis, vt enarrem omnia beneficia tua; quæ mihi, Domine, à principio contulisti. Ecce enim sum, quia tu creasti me: & quod me creares, & in numero

mero creaturarum tuarum numerares, ab æterno tu præordinasti antequam quicquam faceres à principio, antequam extenderes cœlos, necdum erant abyssi: adhuc terram, non feceras, nec montes fundaueras, necdum fontes eruperant: antequam hæc omnia quæ fecisti per Verbum faceres, me creaturam tuam fore, certissima veritatis tuæ providentia prævidisti, & esse me creaturam tuam voluisti.

4 Et hoc vnde mihi, Domine benignissime, Deus altissime, pater misericordissime, creator potentissime, & semper mitissime, quæ mea merita, quæ mea gratia, ut complaceret ante conspectum tuæ magnificæ maiestatis, creare me? Non eram, & creasti me: nihil fueram, & de nihilo me aliquid fecisti. Quale autem aliquid? Non stillam aquæ, non ignem, non auem, vel piscem, non serpentem, vel aliquid ex brutis animalibus, non lapidem, vel lignum; non ex eorum genere, quæ tantum habent esse; vel ex eorum, quæ tantum esse possunt, & crescere; non ex eorum genere, quæ tantum esse

esse, & crescere, & sentire possunt : sed super omnia hæc, voluisti me esse ex his, quæ habent esse, quia sum : & ex his, quæ habent esse, & crescere, quia sum, & cresco : & ex his quæ sunt, crescunt, & sentiunt : quia sum, cresco, & sentio. Et paulo minus parem me creasti Angelis ; quia rationem te cognoscendi, cum ipsis à te communem accepi. Sed paulo minus utique dixi. Nam illi tuam felicem notitiam iam habent per speciem, ego autem per spem, illi facie ad faciem, ego per speculum in ænigmate ; illi plene, ego autem ex parte.

C A P V T V I I I.

De dignitate hominis futura.

Sed cum venerit, quod perfectum est, euacuabitur, quod ex parte est, quando iam reuelata facie, tuam faciem videbimus. Quid iam prohibebit nos non esse minores paulo minus ab Angelis, quos tu Domine corona spei, quæ ornata est gloria, & honore, coronaueris : quos tu nimis, quasi
amicos

amicos tuos, honorificaueris: immo per omnia pares, & æquales Angelis? Nempe, & hoc veritas tua dicit: Æquales sunt Angelis, & filij Dei sunt. Quidni filij Dei sunt, si pares fiunt Angelis? Vere quidem erunt filij Dei, quia filius hominis factus est filius Dei. Hoc vtique consideranti mihi, fiducia est dicere: Non homo minor paulo minus est ab Angelis, non vtique tantum æqualis Angelis, sed superior Angelis, quia homo Deus, & Deus homo, non Angelus.

2 Et dicam propter hoc, hominem esse creaturam dignissimam, quia Verbum, quod erat in principio Deus apud Deum: Verbū, per quod Deus dixit: Fiat lux, & facta est lux, Angelica scilicet natura: Verbum, per quod Deus creauit omnia in principio; idem Verbum caro factum est, & habitauit in nobis, & vidimus gloriam eius. Ecce gloria, per quam glorior, quando sane glorior. Ecce gaudium, per quod gaudeo, quando sane gaudeo. Domine Deus meus, vita, & tota gloria animæ meæ. Confiteor ergo tibi Domine Deus meus: cum me creasti rationis capacem;

pacem; Angelis quodammodo parem creati, quia perfici possum per Verbum tuum, ut veniam ad æqualitatem Angelorum, ut habeam adoptionem filiorum, per vnigenitum Verbum tuum Domine; per filium tuum dilectum in quo tibi bene complacuit, per vnicum coheredem, & consubstantialem tibi, & coæternum Iesum Christum vnicum Dominum redemptorem nostrum, illuminatorem, & consolatorem nostrum, adiocatum nostrum apud te, & lumen oculorum nostrorum, qui es vita nostra, & Saluator noster, & spes unica nostra, qui nos dilexit magis quam se, per quem habemus fiduciam repositam, & firmam apud te spem, & accessum veniendi ad te, quoniam dedit potestatem filios Dei fieri his, qui credunt in nomine eius.

3. Laudem tribuam nomini tuo, Domine, qui me ad imaginem, & similitudinem tuam creando, tantæ gloriæ fecisti me fore susceptibilem, ut possim filius Dei fieri. Hoc utique non possunt arbores, non possunt lapides, non generaliter omnia, quæ mouentur, vel crescunt in aëre, vel in mari, vel in terra;

terra; quia non dedit eis potestatem per Verbum suum filios Dei fieri, quia rationem non habent. Nam, & hæc potestas in ratione consistit, per quam cognoscimus Deum: dedit autem hanc potestatem hominibus, quos creavit rationabiles ad imaginem, & similitudinem suam. Et ego utique, Domine, per tuam gratiam homo sum: & filius tuus esse possum per gratiam, quod illa non possunt.

4 Vnde hoc mihi, Domine, veritas summa, veraque summitas, principium omnium creaturarum? Vnde hoc mihi, Domine, ut possim fieri filius Dei, quod illa non possunt? Tu es, qui manes in æternū, qui omnia creasti simul. Simul creasti homines, & iumenta, lapides, & virentia terræ. Non enim præcesserunt merita, nulla eorum antecessit gratia: quia omnia tua tantum bonitate creasti: & pares omnes creaturæ fuere in meritis, quia omnium nulla fuere merita. Et vnde ergo magis tua bonitas in hac creatura tua, quam fecisti rationalem, quam in omnibus alijs, quæ sunt sine ratione, apparuit? Quare non ego, sicut omnes illæ: aut cur non omnes

nes illæ sicut ego, aut ego solus sicut illæ?
Quæ mea merita, quæ mea gratia, vt me filiū
Dei posse fieri susceptibilem creares, quod
illis omnibus denegares? Absit, Domine,
vt hoc sentiam. Tua tantum gratia, tua tan-
tum bonitas hoc fecit, vt essem particeps dul-
cedinis eius. Illa igitur gratia, qua me de
nihilo creasti, illam quæso Domine, da mihi
gratiam, vt tibi de hoc referam gratiam.

C A P V T I X.

De omnipotentia Dei.

I **O**Mnipotens manus tua semper vna,
& eadem creauit in cœlo Angelos,
& in terra vermiculos: non superior in illis,
non inferior in istis. Sicut enim nulla alia
manus Angelum, ita nulla posset creare ver-
miculum. Sicut nulla cœlum, ita nulla pos-
set creare minimum arboris folium: sicut nul-
la corpus, ita nulla vllum capillum album
posset facere, aut nigrum: sed omnipotens
manus tua, cui omnia pari modo sunt possi-
bilia.

2 Nec enim possibile est ei creare vermiculum, quam Angelum; nec impossibile extendere cœlum, quam folium; nec leuius formare capillum, quam corpus; nec difficilius fundare terram super aquam, quam aquas super terram. Sed omnia, quæcunque voluit, fecit, sicut voluit in cœlo, & in terra, in mari, & in omnibus abyssis; & me inter omnia, sicut voluit, potuit, & sciuit. Potuit quidem manus tua Domine me lapidem, vel auem, vel serpentem, vel belluam aliquã creare, & sciuit: sed noluit propter suam bonitatem. Quare ergo ego non sum lapis, vel arbor, vel aliqua bellua? Quia sic ordinauit bonitas tua: & vt hoc ordinaret, non præcesserunt merita mea.

C A P V T X.

De incomprehensibili laude Dei.

1 **V**Nde hoc mihi Domine, vnde mihi laudes ad laudandum te? Sicut enim fecisti me sine me, sicut complacuit ante te; ita laus tibi est sine me, sicut complacet

cet ante te. Ante te Domine laus tua tu ipse es. Laudent te opera tua secundum multitudinem magnitudinis tuæ: Laus tua Domine incomprehensibilis est: corde non comprehenditur, ore non mensuratur, aure non percipitur: quia ista transeunt, & laus tua Domine manet in æternū. Cogitatio incipit, & cogitatio finitur; vox sonat, vox transit; auris audit, & auditus desinit; laus vero tua in æternū stat.

2 Quis ergo est, qui te laudet? Quis homo annunciet laudem tuam? Laus tua perpetua est, transitoria non est. Hic te laudat, qui te ipsum laudem tuam credit. Hic te laudat, qui se ipsum nescit in tuam laudem non posse pertingere. Laus perpetua, quæ nunquam transit; in te est laus nostra, in te laudabitur anima mea. Non nos te laudamus, sed tu te, & per te, & in te: & nobis etiam est laus in te. Tunc veram habemus laudem, quando à te habemus laudē, quando lux approbat lucem: quia tu vera laus, tribuis veram laudem. Quoties autem ab alio, quam à te quærimus laudem, toties tuam amittimus laudem: quia illa transitoria est,

est, sed tua æterna. Si transitoriam quærimus, æternam amittimus laudem. Si æternam volumus, transitoriam non amemus. Laus æterna Domine Deus meus; à quo omnis laus, sine quo nulla est laus. Non valeo laudare te sine te. Habeam te, & laudabo te. Quid enim ego sum, Domine, per me, vt laudem te? Pulvis, & cinis ego sum, canis mortuus, & foetens ego sum, vermis, & putredo ego sum. Quis ego sum, vt laudem te, Domine Deus fortissime, spiritus vniuersæ carnis, qui inhabitas æternitatem?

3 Nunquid tenebræ laudabunt lucem, aut mors vitam? Tu lux, ego tenebræ: tu vita, ego mors. Nunquid vanitas veritatem laudabit? Tu es veritas, ego vero homo similis factus vanitati. Quid ergo, Domine, laudabo te? Nunquid miseria mea laudabit te? Nunquid foetor laudabit odorem? Nunquid mortalitas hominis, quæ hodie est, & cras tollitur, laudabit te? Nunquid laudabit te homo putredo, & filius hominis vermis? Nunquid laudabit te, Domine, qui in peccatis conceptus est, & natus, & nutritus?

Non est enim speciosa laus in ore peccatoris. Laudet te, Domine Deus meus, incomprehensibilis potentia tua, incircumscriptibilis sapientia tua, & ineffabilis bonitas tua. Laudet te supereminens clementia tua, superabundans misericordia tua, sempiterna quoque virtus, & diuinitas tua. Laudet te omnipotentissima fortitudo tua, summa quoque benignitas, & charitas tua, per quam creasti nos, Domine Deus, vita animæ meæ.

C A P V T X I.

De spe erigenda ad Deum.

I E Go autem creatura tua sub vmbra alarum tuarum sperabo in bonitate tua, qua creasti me. Adiuvā creaturam tuam, quam creavit benignitas tua. Non pereat in malitia mea, quod operata est bonitas tua: non pereat in miseria mea, quod fecit summa clementia tua. Quæ est enim utilitas in creatione tua, si descendam in corruptionem meam? Nunquid enim vane Deus constitui omnes filios hominum? Creasti me, Domine,

mine, rege quod creasti. Opera manuum
tuarum ne despicias Deus. Me fecisti de ni-
hilo: si me non regis, Domine, iterum reuer-
tar ad nihilum. Sicut enim, Domine non
eram, & de nihilo fecisti me; sic si me non
regis, adhuc ad nihilum redigar in me.

2 Adiuua me, Domine, vita mea, ne
peream in malitia mea. Si non creasses me,
Domine, non essem; quia creasti me, iam
sum. Si non regis, iam non sum. Non enim
mea merita, non mea gratia te coëgerunt, vt
creares me, sed benignissima bonitas tua, &
clementia tua. Illa charitas tua, Domine
Deus meus, quæ te ad creationem coëgit,
ipsa (quæso) modo cogat te ad regendum.
Quid enim prodest, quod te compulit chari-
tas tua ad creandum, si peream in miseria
mea, & non me regat dextera tua? Hæc te
cogat, Domine Deus meus, clementia, ad
saluandum, quod creatum est, quæ te com-
pulsit creare, quod creatum non est. Ipsa te
vincat charitas ad saluandum, quæ te vicit
ad creandum, quia nec nunc minor est, quia
ipsa charitas tu ipse es, qui semper idem es:

non est abbreviata manus tua, Domine, ut saluare nequeat; neque aggrauata est auris tua, ut non audiat; sed peccata mea diuiserunt inter me, & te, inter tenebras, & lucem, inter imaginem mortis, & vitam, inter vanitatem, & veritatem, inter lunaticam hanc vitam meam, & sempiternam tuam.

CAPVT XII.

De laqueis concupiscentiarum.

I HÆ sunt vmbrae tenebrarum, quibus operior in hac abyſſo caliginosi carceris huius: in qua proſtratus iaceo, donec aſpiret dies, & inclinentur vmbrae, fiatque lux in firmamento virtutis tuæ. Vox Domini in virtute, vox Domini in magnificentia, dicat: Fiat lux, & effugentur tenebrae: & appareat arida, germinetque terra herbam virentem, & facientem ſemen, & fructum bonum iuſtitiae regni tui. Domine pater, & Deus, vita, per quam omnia viuunt, & ſine qua omnia mortua computantur, ne derelinquas me in cogitatu maligno, & extollen-

tollentiam oculorum meorum ne dederis mihi : aufer à me concupiscentias , & animo irreuerenti , & infrunito ne tradas me ; sed posside cor meum , vt te cogitet semper .

2 Illumina oculos meos , vt te videant , & non extollantur ante te gloria sempiterna : sed humiliter sentiant non in mirabilibus super se ; & quæ à dexteris sunt videant , & non quæ à sinistris abs te . Et palpebræ tuæ præcedant gressus meos ; nam , & palpebræ tuæ interrogant filios hominum . Allide concupiscentiam meam dulcedine tua , quam abscondisti timentibus te ; vt concupiscam te concupiscentijs sempiternis : ne vanis illectus , & deceptus interior gustus , ponat amarum dulce , & dulce amarum , tenebras lucē , & lucem tenebras , vt liberari in medio tot decipularum possim ab inimico super faciem viæ huius positarum , ad capiendas animas peccatorum , quibus plenus est totus mundus . Quod is qui vidit , sub silentio non transiit , inquiens : Quicquid enim est in mundo , aut est concupiscentia carnis , aut concupiscentia oculorum , aut superbia vitæ .

3 Ecce Domine Deus meus, mundus totus plenus est concupiscentiarum laqueis, quos parauerunt pedibus meis, & quis effugiet hos laqueos? Profecto à quo tu abstuleris extollentiam oculorum suorum, vt non eum capiat concupiscentia oculorum: & à quo tu abstuleris carnis concupiscentiam, ne eum capiat carnis concupiscentia: & à quo tu abstuleris animum irreuerentem, & infrunitum, ne eum callide decipiat superbia vitæ. O quam foelix, cui hæc tu facies! quippe transibit immunis.

4 Nunc redemptor te precor per te, adiua me, ne corruam in conspectu aduersariorum meorum, captus laqueis eorum, quos parauerunt pedibus meis, vt incuruent animam meam. Sed erue me virtus salutis meæ, ne sibi risum exhibeant de me inimici tui, qui oderunt te. Exurge, Domine Deus meus, fortis meus, & dissipentur inimici tui, & fugiant qui oderunt te, à facie tua. Sicut fluit cera à facie ignis, sic pereant peccatores à facie tua: & ego abscondar in abscondito faciei tuæ, & gaudeam cum filiis tuis,
fatia-

fatiatus omnibus bonis tuis. Et tu, & Domine Deus, pater orphanorum: & tu mater pupillorum tuorum, audi eiulatum filiorum tuorum: & extende alas tuas, vt fugiamus sub eas à facie inimici. Turris fortitudinis Israël, qui non dormitas, neque dormis custodiens Israël: quia non dormit, neque dormitat hostis, qui impugnat Israël.

CAPV T XIII.

De miseria hominis, & beneficijs Dei.

I **O** Lux quam non videt alia lux, lumen quod non videt aliud lumen; Lux quæ obtenebrat omnem lucem, & lumen, quod excoecat omne extraneum lumen; Lux à qua omnis lux, lumen à quo omne lumen. Lumen ad quod omne lumen est tenebræ, ad quod omnis lux obscuritas; Lux cui omnes tenebræ lumen, cui omnis obscuritas lux; Lux suprema quam cœcitas non obnubilat: quam caligo non hebetat, quam tenebræ nō obscurant, quam nulla obstantia claudit, quam nunquam separat aliqua vmbra; Lux, quæ

quæ illuminas omnia tota simul, semel, & semper: absorbe me in claritatis abyssum, vt videam vndique te in te, & me in te, & cuncta sub te. Ne derelinquas me, ne accrescant vmbrae ignorantiae meae, & multiplicentur delicta mea. Sine te enim omnia sunt mihi tenebrae, omnia mala: quia nihil bonum sine te vero, solo, & summo bono.

2 Hoc confiteor, hoc scio, Domine Deus meus, quia vbicunque sum sine te, male est mihi præter te; non solum extra me, sed etiam in me: quia omnis copia, quæ non est Deus meus, mihi est egestas. Satiabor tunc cum apparuerit gloria tua. Et tu, Domine, vita mea beata, fac vt miseriam meam confitear tibi, ex quo ab vnitatis bonitatis tuæ, summo, & vno bono, temporalium rerum multiformitas lapsum me per carnales sensus dissipauit, & ab vno in multa diuisit, & facta est mihi abundantia laboriosa, & egestas copiosa: dum aliud, & aliud sequebar, & à nullo implebar: dum non in me inueniebam te incommutabile, & singulare indiuisum

sum vnum bonum: quod consecutus, non egeo: quod consecutus, non doleo: quod possidens, satiatur totum desiderium meum.

3 Heu miseria super miseriam: cum misera anima mea à te refugit, cum quo semper abundat, & gaudet: & sequitur mundum, cum quo semper eget, & dolet. Mundus clamat, deficio: tu, Domine clamas, reficio; & miseria mea praua magis sequitur deficientem, quam reficientem. Plane infirmitas mea hæc est. Medice spirituum, sana illam; vt confitear tibi, salus animæ meæ, toto corde meo super omnibus beneficijs tuis, quibus pascis me à iuuentute mea, & vsque in senectam, & senium. Te deprecor per te ipsum, ne derelinquas me: fecisti me, cum non essem; redemisti me, cum perissem: perieram, mortuus fueram; ad mortuum descendisti, mortalitatem suscepisti: ad seruum Rex descendisti; vt seruum redimeres, te ipsum tradidisti. Vt ego viuerem, tu mortem suscepisti, mortem vicisti. Me instaurasti, cum te humiliasti.

4 Perieram, abieram, in peccatis vendatus eram: venisti pro me, vt redimeres me: & tantum me dilexisti, vt sanguinem tuum in pretium dares pro me: dilexisti me Domine plusquam te; quia mori voluisti pro me. Tali pacto, tam caro pretio, reduxisti me de exilio; redemisti me de seruitio; retraxisti me de supplicio; vocasti me nomine tuo; signasti me sanguine tuo, vt memoriale tuum semper esset apud me; & nunquam recederet à corde meo, qui pro me non recessit à Cruce. Vnxisti me oleo tuo, quo tu vnctus fuisti; vt à te Christo dicerer Christianus. En in manibus tuis descripsisti me, vt semper sit memoria apud te, si tamen memoria tua iugiter fuerit apud me. Sic igitur gratia tua semper, & misericordia prauenerunt me. De multis namque, & magnis periculis sæpe liberaisti me, liberator meus. Quando erraui, ad viam reduxisti me: quando ignorauì, docuisti me: quando peccaui, corripuisti me: quando tristis fui, consolatus es me: quando desperaui, confortasti me: quando cecidi, erexisti me: quando steti, tenuisti me: quando

do

do ibi, deduxisti me: quando veni, suscepisti me: quando dormiui, custodisti me: quando clamaui, exaudisti me.

CAPVTV XIV.

*Quod Deus perpetua inspectione considerat opera,
& intentiones hominum.*

I **H**Æc enim, & multa alia beneficia fecisti mihi, Domine Deus meus, vita animæ meæ, de quibus dulce esset mihi semper loqui, semper cogitare, semper tibi gratias agere: vt possim te semper pro omnibus bonis tuis laudare, & amare te toto corde meo, & tota anima mea, & tota mente mea, & tota fortitudine mea, simul ex omnibus medullis, & intimis cordis mei, & omnium compagum mearum. Beata dulcedo, Domine Deus meus, omnium qui delectantur in te. Sed imperfectum meum viderunt oculi tui. Oculi, inquam, tui multo lucidiores sunt Sole, circumspicientes omnes vias hominum, & profundum abyssi, & in omni loco cōtemplantur semper bonos, & malos.

2 Cum

2 Cum enim cunctis præsideas, singula implens, totus semper ubique præsens, cunctorumque curam agens, quæ creasti: quia nihil odisti eorum, quæ fecisti: sic gressus meos semitasque consideras, & die noctuque super custodiam meam vigilas, omnes semitas meas diligenter notans: Speculator perpetuus, veluti si totius creaturæ tuæ, cæli, & terræ oblitus, tantum me solum consideres, & nihil sit tibi curæ de alijs. Neque enim tibi crescit lux in commutabilis visionis tuæ, si tantum vnum aspicias, neque minuitur, si innumera videas, & diuersa. Quia sicut vnum totum simul perfecte consideras, sic singula quælibet, licet diuersa, perfecte simul totaque totus conspicit visus tuus. Sed sicut omnia, sic vnum: & sicut vnum, sic singula totus simul sine diuisione, vel commutatione, vel diminutione consideras. Itaque totus tu in toto tempore sine tempore; totum me simul semperque consideras, ac si nihil aliud considerare debeas.

30 Sic igitur super custodiam meam stas, sicut si omnium oblitus sis, & mihi soli intendere

dere velis. Semper quippe te præsentem exhibes, semper te paratum offers; si me paratum inuenis. Quocunque iero, tu me, Domine, non deseris, nisi prior ego te deferam. Vbicunque fuero, non recedis: quoniam vbique es, vt quocunque iero, inueniam te, per quem possim esse, ne peream sine te, cum sine te esse non possim. Fateor quidem, quia quicquid facio, & quæcunque facio, ante te facio; & illud quicquid est quod facio, melius tu vides, quam ego, qui facio: Quicquid enim semper operor, tu pariter semper præsens ades; vtpote perpetuus inspector omnium cogitationum, intentionum, delectationum, & operationum mearum. Domine ante te semper est omne desiderium meum, ante te tota cogitatio mea.

4 Tu, Domine, vides vnde veniat spiritus, vbi sit, & quo vadat; quia tu es omnium spirituum ponderator. Et vtrum radix sit dulcis, an amara, de qua foris pulchra folia emittuntur, tu iudex internus melius ipse nosti, & etiam medullas radicum subtilius perscrutaris. Et non solum intentionem, sed
radi-

radicis eius medullam intimam disertissima
tuæ lucis veritate colligis, numeras, intueris,
& consignas; vt reddas vnique non solum-
modo secundum opera, vel intentionem, sed
etiam secundum ipsam interiorem abscondi-
tam medullam radicis, de qua procedit in-
tentio operantis. Ad quod tendo, cum ope-
ror, quidquid cogito, & in quocunque de-
lector, tu vides: aures tuæ audiunt, oculi tui
vident, & considerant: signas, attendis, no-
tas, & scribis in libro tuo, siue bonum fuerit,
siue malum: vt reddas postea pro bono præ-
mia, pro malo supplicia: quando aperientur
libri, & iudicabuntur secundum hæc, quæ
fuerunt scripta in libris tuis.

5 Hoc est forte, quod iam dixisti nobis:
Considerabo nouissima eorum, & quod de
te, Domine, dicitur; Vniuersorum finem
ipse considerat, quoniam tu quidem in om-
nibus quæ agimus, finem intentionis magis
quàm actum operationis, attendis. Cumque
hæc diligenter considero, Domine Deus
meus, terribilis, & fortis, timore pariter, &
ingenti rubore confundor: quoniam nobis
magna

magna est indita necessitas iuste recteque viuendi, quia cuncta facimus ante oculos iudicis cuncta cernentis.

CAPVT XV.

Quod homo per se nihil potest sine diuina gratia.

2 **F**ortissime, magnipotens Deus spirituum vniuersæ carnis, cuius oculi sunt super omnes vias filiorum Adam, à die natiuitatis eorum vsque in diem exitus eorum, vt reddas vnicuique secundum opera sua, bona vel mala; ostende mihi, vt confitear tibi paupertatem meam; quoniam dixi, quod diues essem, & nullius egerem: & nesciebam quoniam pauper eram, cæcus, nudus, miser, & miserabilis. Credebam enim me fore aliquid, cum nihil essem. Dixi, sapiens efficiar, & stultus factus sum. Cogitabam me esse prudentem, & deceptus sum: & video nunc, quia donum tuum est, sine quo nihil possumus facere: quia nisi tu, Domine custodieris ciuitatem, frustra vigilat, qui cu-

stodit eam. Sic docuisti me, vt cognoscerem me: quia dereliquisti me, & probasti me, non propter te, quod cognosceres me; sed propter me, vt cognoscerem me. Nam, vt dixi, Domine, credebam me aliquid fore ex me existimabam me sufficere per me: nec percipiebā, quoniam tu regebas me: donec aliquantulum te elongasti à me, & cecidi statim in me: vidi, & cognoui, quoniam tu regebas me: & quod cecidit fuit ex me: & quod surrexi, ex te.

2 Aperuisti mihi oculos, lux, & excitasti, & illuminasti me: vidi, quoniam tentatio est vita hominis super terram: & quod gloriari non valeat ante te omnis caro, nec iustificabitur omnis viuens: quoniam si quid boni est, parui vel magni, donum tuum est, & nostrum non nisi malum est. Vnde igitur gloriabitur omnis caro? nunquid de malo? Hæc non est gloria, sed miseria. Sed nunquid gloriabitur de bono? nunquid de alieno? Tuum, Domine, est bonum, tua est gloria. Qui enim de bono tuo gloriam sibi quærit, & non tibi quærit, hic fur est, & latro: & similis est

est diabolo, qui voluit furari gloriam tuam. Qui enim laudari vult de tuo dono, & non quærit in illo gloriam tuam, sed suam; hic, licet propter tuum donum laudetur ab hominibus, à te tamen vituperatur: quia de dono tuo, non tuam sed suam gloriam quæsiuit. Qui autem ab hominibus laudatur, vituperante te, non defendetur ab hominibus, iudicante te, nec liberabitur condénante te.

3. At tu, Domine, formator meus ab utero matris meæ; non me finas cadere in illam exprobationem, vt exprobretur mihi furari voluisse gloriã tuam: tibi enim sit gloria, cuius est omne bonum: nobis autem confusio faciei, & miseria, quorum est omne malum, nisi tu volueris misereri. Misereris quippe, Domine, misereris omnium, & nihil odisti eorum, quæ fecisti: & das nobis de bonis tuis, & ditas nos, Domine Deus, inopes optimis donis tuis. Quoniam diligis pauperes, & diuites facis eos diuitijs tuis. Ecce nunc, Domine, pauperes nos filij tui sumus, & pusillus grex tuus: aperi nobis ianuas tuas, & edent pauperes, & saturabuntur: & lau-

dabunt te, qui requirunt te. Scio enim, Domine, & confiteor docente te; quoniam illi soli, qui cognoscunt se pauperes, & confitentur tibi paupertatem suam, ditabuntur à te; quoniam qui se diuites existimant, cum sint pauperes, à tuis diuitijs inuenientur exclusi.

4 Ego igitur confiteor tibi, Domine, Deus meus, paupertatem meam; vt fit tibi tua gloria tota, quoniam tuum est omne bonum per me gestum. Domine confiteor vt docuisti me, nihil aliud sum, quam vniuersa vanitas, & vmbra mortis, & abyssus quædam tenebrosa, & terra inanis, & vacua, quæ sine tua benedictione non germinat; fructum quoque non facit, nisi confusionem, peccatum, & mortem. Si quid boni vnquam habui, à te recepi: quicquid boni habeo, tuum est, vel à te habeo. Si quando steti, per te steti; sed quando cecidi, per me cecidi; & semper in luto iacuissem, nisi tu me erexisses; semper cæcus fuisset, nisi tu me illuminasses. Quando cecidi, nunquã surrexissem, nisi tu mihi manum porrexisses: post quam me
etiam

etiam erexisti sepe cecidissem, nisi tu me sustinuisses. Sæpius perissem, nisi me gubernasses.

5 Sic semper, Domine, sic semper gratia tua, & misericordia tua præuenit me; liberans me ab omnibus malis, saluans à præteritis, suscitans à presentibus, muniens à futuris; præciciens etiam ante me laqueos peccatorum, tollens occasiones, & causas: quia nisi tu hoc mihi fecisses, ego omnia peccata mundi fecissem. Quoniam scio, Domine, quod nullum peccatum est, quod unquam fecerit homo, quod non possit facere alter homo, si creator desit, à quo factus est homo. Sed quod non facerem, tu fecisti; quod abstinere, tu iussisti, & quod tibi crederem, tu infudisti. Tu namque Domine, regebas me tibi, seruabas me tibi: & mihi, ut adulterium, & omne aliud peccatum non committerem, gratiam, & lumen donasti.

CAPVTVI.

De Diabolo, & multiplicibus tentationibus eius.

TENTATOR defuit, & vt deesset, tu fecisti: locus, & tempus defuit, & vt hæc deessent, tu fecisti. Affuit tentator, non defuit locus, non defuit tempus: sed vt non consentirem, tu me tenuisti. Venit tentator tenebrosus, vt est: & vt eum despicerem, tu me confortasti. Venit tentator armatus, & fortis: & vt me non vinceret, tu eum refrenasti, & me roborasti. Venit tentator trāsfiguratus in Angelum lucis, & vt me non deciperet, tu eum increpasti: & vt eum cognoscerem, tu me illuminasti. Ipse enim est draco ille magnus, & rufus, & serpens antiquus, vocatus Diabolus, & Satanas, habens capita septem, & cornua decem: quem creasti ad illudendum huic mari magno, & spatioso, in quo reptant animalia, quorum non est numerus: & animalia pusilla, & magna, id est, diuersa dæmonum genera, quæ nihil aliud

aliud die noctuque operantur, nisi quod circumeunt, quærentes quem deuorent, nisi tu eripias.

2 Ipse enim est antiquus ille draco, qui ortus est in Paradiso voluptatis; qui cauda sua trahit tertiam partem stellarum cæli, & eas mittit in terram; qui veneno suo corrumpit aquas terræ, vt bibentes homines moriantur: & qui sternit sibi aurum quasi lutum, & habet fiduciam, quod influat Iordanis in os suum: qui factus est, vt nullum timeat. Et quis defendet à moribus eius? Quis eruet ab ore eius, nisi tu Domine, qui confregisti capita draconis magni? Adiuua nos: Præten- de Domine super nos alas tuas; vt fugiamus sub eis à facie draconis huius, qui nos persequitur, & scuto tuo libera nos à cornibus eius. Hoc enim continuum studium eius, vt animas quas creasti, deuoret.

3 Et ideo, Deus meus, ad te clamamus, libera nos ab aduersario nostro quotidiano: qui siue dormiamus, siue vigilemus, siue comedamus, siue bibamus, siue quodcunque opus operemur omnibus modis, instat die,

ac nocte fraudibus, & artibus, nunc palam, nunc occulte, sagittas venenatas contra nos dirigens, vt interficiat animas nostras. Et tamen, Domine, pessima infania nostra; quia cum continue videamus contra nos draconem ore operto, paratum ad deuorandum, nihilominus dormimus, & lasciuimus in pigritijs nostris, tanquam securi ante eum; qui nihil aliud desiderat, quam vt nos perdat. Inimicus vt occidat, semper vigilat sine somno: & nos, vt custodiamus nos, nolumus euigilare à somno.

4 || Ecce tetendit ante pedes nostros laqueos infinitos, & omnes vias nostras varijs repleuit decipulis, ad capiendas animas nostras: Ecquis effugiet? Laqueos posuit in diuitijs; laqueos posuit in paupertate; laqueos tetendit in cibo, in potu, in voluptate, in somno, & in vigilia; laqueos posuit in verbo, & in opere, & in omnia via nostra. Sed tu Domine libera nos de laqueo venantium, & à verbo aspero, vt confiteamur tibi, dicentes: Benedictus Dominus, qui non dedit nos in captionem dentibus eorum. Anima nostra

stra sicut pascere erepta est de laqueo venantium. Laqueus contritus est, & nos liberati sumus.

C A P V T X V I I.

Quod Deus est lux iustorum.

I **E**T tu quidem Domine, lux mea, illumina oculos meos, ut videam lumen, & ambulem in lumine tuo, & non impingam in laqueos eius. Quis enim euadet laqueos istos multos, nisi videat eos? Et quis videbit eos, nisi quem illuminaueris lumine tuo? ipse enim pater tenebrarum, laqueos suos abscondit in tenebris suis, ut capiantur in eis omnes, qui sunt in tenebris suis; qui sunt filij tenebrarum harum, non videntes lumen tuum; in quo qui ambulat, non timebit. Qui enim ambulat in die, non offendit; qui autem in nocte ambulat, offendit: quia lux non est in eo. Tu lux Domine, tu lux filiorum lucis; tu dies qui nescis occasum, in qua ambulant filij tui sine offensione; & sine qua omnes, qui ambulant, in tenebris suis, quia te
lucem

lucem mundi non habent.

2 ¶ Ecce quotidie cernimus, quia quo magis à te vero lumine quis elongatur, eo magis peccatorum inuoluitur tenebris: & quo magis est in tenebris, eo minus videt laqueos in via sua, & ideo minus cognoscit, & idcirco sapius rapitur, & cadit in eis; & quod est horribilius, etiam se cecidisse ignorat. Qui vero suum casum ignorat, eo minus curat surgere, quo magis se existimat adhuc stare. Tu vero lux mentis, Domine Deus meus, nunc illumina oculos meos, vt videam, & cognoscam, ne corruam in conspectu aduersariorum meorum. Etenim in exterminiu nostri laborat inimicus noster, quem petimus vt facias liquefieri à facie nostra, sicut cera liquefcit à facie ignis. Quoniam, Domine, ipse est latro primus, & vltimus, qui consilium fecit, vt raperet gloriam tuam, quoniam inflatus, & elatus crepuit, & cecidit in faciem suam, & deiecisti eum de monte sancto tuo, & de medio lapidum ignitorum, in quorum medio ambulauit.

3 Et nunc, vita mea, Domine Deus
meus

meus, ex quo cecidit, non cessat persequi filios tuos; & in odium tuum, ò Rex magne, cupit perdere hanc creaturam tuam, quam creavit omnipotens bonitas tua ad imaginem tuam; vt possideat gloriam tuam, quam ipse perdidit per superbiam suam. Sed contere eum fortis noster antequam nos agnos tuos deuoret: & illumina nos, vt videamus laqueos, quos ipse parauit; & euadamus ad te, ò lætitia Israel. Et hæc omnia tu, Domine, melius nosti, qui nosti contentionem eius, & ceruicem eius durissimam. Nec hoc dico vt ostendam tibi, quia omnia vides, & nulla te latet cogitatio: sed ante pedes tuæ maiestatis, de inimico meo querimoniam facio, Iudex æterne; vt & ipsum damnes, & nos filios tuos salues, quorum fortitudo ru es.

4 Versutus est enim, Domine, iste hostis, & tortuosus, nec facile deprehendi possunt circuitus viæ eius, nec cognosci species vultus eius, nisi tu illumines. Nam nunc hic, nunc illic: nunc agnum, nunc lupum, nunc tenebras, nunc lucem in se ostendit; & singulis

gulis quibuscumque qualitatibus, locis, & temporibus, secundum varias rerum mutationes, varias exhibet tentationes. Nam ut tristes decipiat, tristatur & ipse: ut gaudentes illudat, fingit se, & ipse gaudere: ut spirituales defraudet, in Angelum lucis se transfigurat: ut fortes comprimant, apparet agnus: ut mites deuoret, apparet lupo. Hæc quidem omnia secundum similitudinem variarum tentationum effici habent, ut terreat alios à timore nocturno, alios à sagitta volante in die, alios à negotio perambulante in tenebris, alios ab incursum, alios à dæmonio meridiano. Et ad hæc quis idoneus, ut cognoscat? & astutias eius quis cognouit? Quis reuelabit speciem indumenti eius? & gyrum dentium eius quis agnoscet?

5 En abscondit sagittas suas in pharetra, & laqueos suos abscondit sub specie lucis; & hoc difficilius perpenditur: nisi à te Domine spes nostra lumen assumamus, ut videamus omnia. Nam non solum in carnis operibus, quæ de facili cognoscuntur; nec tantum in ipsis vitijs: sed in ipsis etiam spiri-
ritua-

ritualibus exercitijs, laqueos abscondit subtiles: & sub virtutum colore ipsa vitia induit, & transmutat se in Angelum lucis. Hæc & multa alia nititur contra nos ipse filius Belial, ipse Sathan, Domine Deus noster. Et nunc, vt leo, nunc vt draco, manifeste, & occulte, intus, & extra, die, ac nocte insidiatur, vt rapiat animas nostras: Et tu eripe nos Domine, qui saluas sperantes in te; vt ipse de nobis doleat, & tu lauderis in nobis, Domine Deus noster.

CAPVT XVIII.

De beneficijs Dei.

EGO autem filius ancillæ tuæ, qui me commendaui manui tuæ, iam his meis pauperculis confessionibus confitear tibi, liberator meus, toto corde meo; & recoram ad mentem meam omnia bona, quæ fecisti mihi à iuuentute mea, in omni vita mea. Scio namque quod ingratitude multum tibi displiceat: quæ est radix totius mali spiritualis, & ventus quidam desiccans, & vrens
omne

omne bonum ; obstruens fontem diuinæ misericordiæ tuæ super hominem ; qua , & mortua iam non moriuntur , & viua iam opera moriuntur , & vltra non adipiscuntur . Et ego Domine gratias tibi agam , ne sim ingratus tibi , liberator meus , quoniam liberaſti me . Quoties iam me absorbuerat ille draco , & tu Domine ab ore eius extraxiſti me .

2 Quoties ego peccaui , & ipſe paratus fuit deglutire me ; ſed tu Domine Deus meus defendiſti me . Cum contra te inique agebam , cum tua mandata frangebam , ſtabat ipſe paratus vt me raperet ad infernum , ſed tu prohibebas . Ego te offendeſbam , & tu me defendebas . Ego te non timebam , & tu me custodiebas . A te recedeſbam , & inimico meo me exhibebam : tu ipſum ne me acciperet , deterrebas . Hæc mihi tu , Domine Deus meus , beneficia conferebas , & ego miſer non cognoſcebam . Sic enim me multoties à faucibus diaboli liberaſti , de ore leonis eripuisti , & ab inferno , licet neſcientem , multis vicibus reduxiſti . Descendi enim vſq; ad portas inferni , & ne illuc intrarem , tu me tenuiſti .

3 Appropinquabam vsque ad portas mortis, & ne me ipsæ caperent, tu fecisti. De morte etiam corporis sæpius eruisti me, Saluator meus, cum graues morbi tenerent me; cum fui in periculis multis per mare, per terras; ab igne, & gladio, & ab omni periculo liberans, semper mihi astans, & misericorditer saluans. Sciebas tu quidem, Domine, quia si tunc mors me occupasset, infernus animam meam suscepisset, & perpetuo damnatus fuisset. Sed tua misericordia, & tua gratia præuenit me, eripiens me de morte corporis, & de morte animæ, Domine Deus meus. Hæc, & multa mihi tua alia beneficia exhibuisti, & ego eram cæcus, & non cognoui, donec illuminasti me. Nunc igitur lux animæ meæ, Domine Deus meus, vita mea, per quam viuo; lumen oculorum meorum, per quod video; en illuminasti me, & cognosco te: quia viuo per te, & gratias ago tibi, licet viles, & exiles, & impares beneficijs tuis, quales habet mea fragilitas, offero. Quoniam tu es solus Deus meus, creator meus benignus, qui amas nostras animas,

mas, & nihil odisti eorum quæ fecisti. En ego primus inter peccatores quos saluasti, vt exemplum alijs tribuam benignissimæ pietatis tuæ.

4 Confiteor tibi beneficia tua magna, quoniam eripuisti me de inferno inferiori, semel, & secundo, & tertio, & centies, & millies, & ego semper ad infernum tendebam, & tu me semper reducebas, & iuste millies damnasses me, si voluisses. Noluisti, quia amas animas, & dissimulas peccata hominum propter penitentiam. Domine Deus meus, multæ misericordiæ in omnibus vijs tuis. Nunc ergo video hæc, Domine Deus meus, & cognosco per lumen tuum, & deficit anima mea misericordia tua magna, quæ est super me: quoniam eripuisti animam meam ex inferno inferiori, & me ad vitam reduxisti. Totus enim eram in morte, totum me resuscitasti. Tuum igitur sit totum id, quod viuo: & totus totum me tibi offero. Totus spiritus, totum cor, totum corpus, tota vita mea viuat tibi, vita mea dulcis: quoniam totum me liberaisti, vt totum me possideres: totum

totum me refecisti, vt totum me re haberes. Diligam te igitur, Domine, virtus mea; diligam te ineffabilis exultatio mea: & viuam iam non mihi, sed tibi. Tota vita mea, quæ perierat in miseria mea, resuscitata est in misericordia tua, qui es Deus misericors, & miserator, & multæ misericordiæ in millia his, qui diligunt nomen tuum.

5 Idcirco, Domine Deus meus, Sanctificator meus, iussisti in lege tua, vt diligam te toto corde meo, tota anima mea, tota mente mea, tota fortitudine mea, & totis viribus meis, & etiam ex intimis medullis cordis mei, omnibus horis, & momentis, quibus fruor bonis misericordiæ tuæ; quoniam semper perirem, nisi quia semper regis me; semper morerer, nisi quia semper me viuificas; & omni momento me tibi obligas, dum omni momento mihi tua magna beneficia præstas. Sicut ergo nulla hora est vel punctum in omni vita mea, quo tuo beneficio non vtar: sic nullum debet esse momentum, quo te non habeam ante oculos, in mea memoria; & te non diligam ex omni fortitudine mea.

mea. Sed nec hoc valeo, nisi tu dederis mihi: cuius est omne donum bonum, & omne datum optimum, descendens à Patre luminum; apud quem non est transmutatio, nec vicissitudinis obumbratio. Non enim est volentis, neque currentis, sed tui miserentis, ut diligam te. Tuum est Domine hoc donum, cuius est omne bonum. Iubes te diligere; da quod iubes, & iube quod vis.

CAPV T XIX.

De fervore dilectionis, vel charitatis.

AMo te Deus meus, magisque semper amare cupio; quia tu es revera omni melle dulcior, omni lacte nutritivior, & omni luce clarior. Idcirco super omne aurum, & argentum, & lapidem preciosum es mihi charior. Displicebat enim mihi quicquid agebam in sæculo, præ dulcedine tua, & decore domus tuæ, quam dilexi. O ignis qui semper ardes, & nunquam extingueris! O amor qui semper ferues, & nunquam tepescis, accende me! Accendar (inquam)

quam) totus à te, vt totus diligam te. Minus enim te amat, qui tecum aliquid amat, quod non propter te amat. Diligam te Domine, quoniam tu prior dilexisti me. Et vnde mihi verbum, vt explicem signa dilectionis tuæ maximæ erga me, propter innumera beneficia tua, quibus à principio educaſti me?

2 Post beneficium nempe creationis, quando in principio de nihilo ad imaginem tuam creasti me: honorificans, & exaltans me inter eas creaturas, quas fecisti, & nobilitans lumine vultus tui, quo signasti superliminare cordis mei, quo ab insensibilibus pariter, & sensibilibus brutis discreuisti me, & paulò minus ab Angelis minuiſti. Parum, & hoc fuit ante conſpectum diuinitatis tuæ. Quoniam quotidianis, ſingularibus maximisque donarijs tuorum beneficiorum, me ſine intermiſſione nutriuisti, & quaſi filium tuum paruulum tenellum, vberibus tuæ conſolationis lactaſti, & confortaſti me. Vt enim tibi totus ſeruirem, omnia quæcunque feciſti, in meum ſeruitium tradiſti.

CAPVT XX.

*Quod Deus subiecit omnia seruituti
hominum.*

I OMnia pedibus hominis subiecisti, vt
solus homo totus tibi subijceretur.
Et vt totus homo esset, super omnia opera
tua dominatus est homo. Exteriora nempe
pro corpore cuncta creasti; ipsum vero cor-
pus pro anima; animam vero pro te: vt tibi
soli vacaret, & te solum amaret; possidens
te ad solatium, inferiora vero ad seruitium.
Quicquid enim coeli ambitu continetur, in-
ferius ab anima humana est, quæ facta est,
vt summum bonum superius possideret, cu-
ius possessione beata fieret: cui si adhæserit,
cunctorum mutabilium inferiorum neces-
situdines supergrediens, illius summæ maie-
statis, cuius æmulatur speciem, æternæ im-
mortalitatis faciem cum serenitate videbit.
Tunc vero illis bonis optimis fruetur in do-
mo Domini, quorum comparatione cuncta
hæc quæ hic cernimus, velut nihilum compu-
tantur

tantur. Illa sunt, quæ oculus non vidit, nec auris audiuit, nec in cor hominis ascenderunt, quæ præparauit Deus diligentibus se. Et hæc quidem Domine daturus es animæ. His etiã quotidie lætificas animas seruorum tuorum, qui amas animas.

2 Quid miror hæc, Domine Deus meus? Imaginem quippe tuam honorificas, & similitudinem tuam, ad quam creatæ sunt. Nam, & corpori nostro, licet adhuc corruptibili, & ignobili, vt videret, dedisti cœli claritatem per manum ministrorum tuorum infessorum Solis, & Lunæ, qui præcepto tuo iugiter die, ac nocte deseruiunt filiis tuis: vt spiraret, largitus es aëris puritatem; vt audiret, sonorum varietates; vt odoraret, odorum suauitates; vt gustaret, saporum qualitates; vt contrectaret, dedisti corpulentorum omnium grossitates. Adiuuamenta suis necessitatibus dedisti iumenta: volucres quoque cœli, & pisces maris, & fructus terræ ad reficiendum impendisti. Medicinas de terra propter singulas quasque suas corruptelas creasti. Singula solatio singulis malis obui-

antia præparasti, quoniam es misericors, & miserator; & nouisti figmentum nostrum, figulus noster, & nos omnes quasi lutum in manu tua.

C A P V T X X I.

Quod ex consideratione bonorum temporalium, colligitur magnitudo cælestis consilij.

EN aperiatur mihi misericordia tua magna, lumine tuo illustra (quæso) magis adhuc, vt mihi magis aperiatur. Nam ex his minimis tua magna, & ex his visibilibus, tua inuisibilia comprehendimus, Domine Deus sancte, & bone creator noster. Si enim, mi Domine, pro hoc corpore ignobili, & corruptibili, tam magna, & innumera beneficia præstas à cælo, & ab aere, à terra, & mari, à luce, & tenebris, à calore, & umbra, rore, & imbre, ventis, & puluijs, volucribus, & piscibus, bestijs, & arboribus, & multiplicitate herbarum, & germinum terræ, & cunctarum creaturarum tuarum ministerio, nobis successiue per sua tempora ministran-

nistrantium, vt alleues fastidium nostrum ; qualia, quæso, & quam magna, & innumerabilia erunt illa bona, quæ præparasti diligentibus te in illa cœlesti patria, vbi te videbimus facie ad faciem ? Si tanta facis nobis in carcere, quid ages in palatio.

12. Magna, & innumerabilia sunt opera tua Domine, rex cælorum. Cum enim sint hæc omnia valde bona, & delectabilia, quæ bonis pariter malisque communia tradidisti: qualia futura sunt illa, quæ solis bonis recondidisti ? Si tam innumera, & varia dona tua, quæ nunc amicis pariter tribuis, & inimicis: quam magna, & innumerabilia, quam dulcia, & delectabilia, quæ solis tuis es largiturus amicis ? Si tanta solatia in hac die lachrymarum, quanta conferes in die nuptiarum ? Si tanta delectabilia continet carcer, quanta quæso continet patria ? Oculus non vidit, Deus, absque te, quæ præparasti diligentibus te. Secundum enim magnam multitudinem magnificentiae tuæ est etiam multitudo magna dulcedinis tuæ, quam abscondisti timentibus te.

30 Magnus enim tu es, Domine Deus meus, & immensus; nec est finis magnitudinis tuæ, nec est numerus sapientiæ tuæ, nec est mensura benignitatis tuæ, nec est finis, nec numerus, nec mensura retributionis tuæ: sed sicut magnus es tu, ita magna sunt donaria tua: quoniam tu ipse es præmium, & donum omnium legitimorum tuorum pugnantorum.

CAPV T. XXII.

Quod diuina dulcedo omnem præsentem mundi amaritudinem tollit.

HÆc sunt beneficia magna tua, Domine Deus, sanctificator sanctorum tuorum, quibus repleturus es inopiam esurientium filiorum tuorum. Quoniam tu es spes desperatorum. Tu corona spei, quæ ornata est gloria, præparata vincentibus. Tu famelicorum satietas æterna, danda esurientibus. Tu consolatio sempiterna, qui solis illis te tribuis, qui consolationem huius mundi pro tua perpetua consolatione contem-
nunt.

nunt. Nam qui hic consolantur, indigni tua consolatione habentur. Sed qui hic cruciantur, à te consolantur: & qui participant passionibus, participant, & consolationibus. Nemo enim potest in vtroque sæculo consolari; nec potest quis hic, & in futuro gaudere: sed vnum necesse est vt perdat, qui alterum voluerit possidere.

2 Hæc vbi confidero, Domine consolator meus, in hac vita renuit consolari anima mea, vt digna habeatur tuis consolationibus æternis; quia iustum est, vt amittat te, quicumque in aliquo alio magis consolari eligit, quam in te. Et obsecro summa veritas te per te, non permittas me in aliqua consolatione vana consolari. Sed peto vt omnia mihi amarescant; vt tu solus dulcis appareas animæ meæ, qui es dulcedo inæstimabilis, per quam cuncta amara dulcorantur.

3 Tua enim dulcedo Stephano lapides torrentis dulcorauit. Tua dulcedo craticulam beato Laurentio dulcem fecit. Præ tua dulcedine ibant Apostoli gaudentes à conspectu Concilij, quoniam digni habiti sunt pro

pro nomine tuo contumeliam pati. Ibat Andreas securus ad crucem, & gaudens, quoniam ad tuam dulcedinem properabat. Hæc tua dulcedo ipsos Apostolorum principes sic repleuit, vt pro ipsa crucis patibulum vnus eligeret: alter quoque caput ferienti gladio supponere non timeret. Pro hac emenda Bartholomæus propriam pellem dedit. Pro hac quoque gustanda veneni poculum intrepidus Ioannes potauit. Hanc vero vt gustauit Petrus, omnium inferiorum oblitus, clamauit quasi ebrius, dicens: Domine, bonum est nos hic esse, faciamus tria tabernacula: hic moremur, te contemplemur, quia nullo alio indigemus. Sufficit nobis Domine videre te, sufficit (inquit) tanta dulcedine satiari. Vnam enim stillam dulcedinis ille gustauit, & omnem aliam fastidiuit dulcedinem. Quid, putas dixisset, si magnam illam multitudinem dulcedinis diuinitatis tuæ gustasset, quam abscondisti timentibus te? Hanc tuam dulcedinem ineffabilem, & illa gustauerat virgo, de qua legimus, quod lætissima, & glorianter ibat ad carcerem, quasi ad epulas

las inuitata. Hanc vt reor, & ipse gustauerat, qui dicebat: Quam magna multitudo ducedinis tuæ Domine, quam abscondisti timentibus te! Quique monebat: Gustate, & videte, quoniam suavis est Dominus. Hæc est enim illa beatitudo, Domine Deus noster, quam expectamus daturum te nobis, pro qua tibi Domine continue militamus: pro qua tibi mortificamur tota die, vt in tua vita tibi viuamus.

C A P V T XXIII.

*Quod tota spes nostra, & desiderium cordis nostri
debeat esse in Deum.*

I V autem Domine expectatio Israel, desiderium ad quod suspirat cor nostrum quotidie, festina; ne tardaueris. Surge, propera, & veni; vt educas nos de isto carcere ad confitendum nomini tuo, vt gloriemur in lumine tuo. Aperi aures tuas clamoribus lachrymarum pupillorum tuorum, qui clamant ad te: Pater noster, da nobis hodie panem nostrum quotidianum; in
cuius

cuius fortitudine ambulemus die, ac nocte, usque quo perueniamus ad montem sanctum tuum Oreb. Et ego paruulus inter paruulos familiæ tuæ, Deus Pater, & virtus mea quando veniam, & apparebo ante faciem tuam? vt qui nunc tibi confiteor ad tempus, ex tunc confitear tibi in æternum. Beatus ero, si fuero admissus ad videndum claritatem tuam. Quis mihi hoc tribuat, vt ad hoc venire permittas me?

2. Scio Domine, scio, & confiteor me indignum, vt intrem sub testum tuum; sed fac propter honorem tuum, & ne confundas in te sperantem seruum tuum. Et quis intrabit sanctuarium tuum, ad considerandas potentias tuas, nisi, si tu aperias? Quis autem aperiet, si tu clauferis? Si enim destruxeris, nemo est qui ædificet. Et si incluseris hominem nemo est, qui aperiat. Si continueris aquas, omnia siccabuntur. Et si miseris eas, subuertent terram. Si omnia quæ fecisti ad nihilum redigas, quis contradicet tibi? Porro sempiterna bonitas misericordiæ tuæ, quæ fecisti omnia quecunque voluisti. Tu nos fecisti

cisti; fabricator mundi, rege nos. Tu nos creasti; ne spernas nos, qui opera tua sumus. Et quidem Domine Deus noster; nos lutum, & vermiculi, non valemus in tuas æternitates intrare, nisi tu induxeris, qui de nihilo cuncta creasti.

CAPVT XXIV.

Quod salus nostra ex Deo est.

IEGO autem opus manuum tuarum, confitebor tibi in timore tuo, qui non in arcu meo sperabo, & gladius meus non saluabit me: sed dextera tua, & brachium tuum, & illuminatio vultus tui. Alioquin desperarem, quoniam spes mea tu es, qui creasti me, quoniam non derelinquis sperantes in te. Tu quippe es Domine Deus noster, suavis, & patiens in misericordia disponens omnia. Nam si peccauerimus, tui sumus: si non peccauerimus, tui sumus; quoniam apud te sumus computati. Nos enim folium vniuersi, & vanitas est omnis homo viuens, & ventus est vita nostra super terram.

ram. Ne irascaris, si cadimus pupilli tui, quoniam tu nosti figmentum nostrum, Domine Deus noster.

2 Num Deus inæstimabilis fortitudinis, contra folium quod à vento rapitur, ostendere vis potentiam tuam, & stipulam siccam persequeris? Num damnabis, Rex Israel æterne, canem vnum? Num damnabis pulicem vnum? Audiuimus de misericordia tua Domine, quoniam tu mortem non facis, nec lætaris in perditione morientium. Propter hoc Domine oramus te, ne permittas dominari quod non fecisti, huic creaturæ tuæ, quam fecisti. Si enim doles de perditione, quid te prohibet Domine, qui omnia potes, ne semper læteris de nostra saluatione? Si vis, potes me saluare; ego autem, & si vellem, non possem. Magna est multitudo miseriarum mearum mecum.

3 Velle quippe mihi adiacet, perficere autem non inuenio. Velle quod bonum est non possum, nisi tu velis; nec quod volo possum, nisi tua potentia me confortet, & quod possum, aliquando nolo, nisi tua voluntas

luntas fiat sicut in cœlo, & in terra. Et quod volo, & possum, ignoro, nisi tua sapientia me illustret. Et si etiam sciam; quandoque volens, quandoque valens, imperfecta, & vacua transit sapientia mea, nisi adiuuet vera sapientia tua.

4 In tua autem voluntate cuncta sunt posita, & non est qui possit resistere voluntati tuæ, Domine vniuersorum, principatum tenens omnis carnis; & quæcunque vis, facis, in cœlo, & in terra, in mari, & in omnibus abyssis. In nobis igitur fiat voluntas tua, super quibus inuocatum est nomen tuum: ne pereat hoc nobile plasma tuū, quod creasti propter honorem tuum. Et quis est homo natus de muliere, qui viuatur, & non videat mortem, & eripiat animam suam de manu inferni? nisi tu solus eripias, vita vitalis omnis vitæ, per quem omnia viuunt.

CAPVT XXV.

Quod voluntas humana inefficax sit ad bona opera, sine diuina gratia.

1 **E**Tenim iam iam tibi confessus sum, laus vitæ meæ, Domine Deus meus, virtus salutis meæ. Sperabam aliquando in virtute mea, quæ tamen non erat virtus. Et cum sic volui currere, vbi magis stare credebam, ibi magis cecidi, factusque sum magis retro, & non ante: & quod credebam consequi, magis elongatum est à me. Sic per multa similia vires meas probas. Cognosco nunc quia illuminasti me, quoniam quod magis credidi posse per me, minus semper potui. Dicebam enim hoc, faciam, illud perficiam; nec hoc, nec illud faciebam. Aderat voluntas, non erat facultas; ad erat facultas, non aderat voluntas: quoniam de meis viribus confidebam.

2 Nunc autem confitebor tibi Domine Deus meus, Pater cæli, & terræ, quia non fortitudine sua roborabitur vir, vt glorietur
ante

ante te stulta præsumptio omnis carnis. Non enim est hominis, velle quod possit; aut posse quod velit, vel scire quod velit, & possit: sed potius à te gressus hominis diriguntur, illorum (inquam) qui non à se, sed à te dirigi se confitentur. Obsecramus itaque per viscera misericordiæ tuæ, vt velis Domine saluare quod creasti: quoniam si vis, potes nos saluare: & in tua voluntate virtus est nostræ salutis.

CAPV T X X V I.

De antiquis beneficijs Dei.

Recordare misericordiæ tuæ antiquæ, qua nos à principio in benedictionibus tuæ dulcedinis præuenisti. Antequam enim nascerer ego, filius ancillæ tuæ, Domine spes mea ab vberibus matris meæ, tu præuenisti; præparans mihi semitas, quibus incederem, & venirem ad gloriam domus tuæ. Priusquam me formares in vtero, nouisti me: & antequam exirem de vulua, quidquid tibi placuit, præordinasti de me. Quæ & qualia

sunt in libro tuo scripta de me, in secreto consistorij tui, ego quidem ignoro, vnde & valde timeo.

2 Tu verò nosti, quoniam quod ego per successus dierum, & temporum hinc ad mille annos huius temporalitatis expecto, in conspectu æternitatis tuæ iam factum est; & quod futurum est, iam factum est. Ego autem quia sto in hac nocte tenebrosa hæc ignorans, timor, & tremor venerunt super me: dum video mihi vndique imminere multa pericula, à multis quoque hostibus venari, multitudi- neque innumerarum miseriarum in hac vita me circumdari. Et nisi in his tantis malis adforet mihi tuum adminiculum, desperarem.

3 Sed spes mihi magna subest de te, mitissime Princeps, Deus meus: & consideratio multitudinis miserationum tuarum, quæ apud te sunt, subleuat mentem meam. Et præcedentia signa misericordiæ tuæ, quæ me antequam nascerer, præuenerunt, & nunc specialiter in me effulserunt, de futuris benignitatis tuæ melioribus, & perfectioribus muneribus,

ribus, quæ amicis tuis referuas, spem meam
admonent; vt in te lætetur, Domine Deus
meus; lætitia sancta, & viua, qua semper læ-
tificas iuuentutem meam.

C A P V T X X V I I.

De Angelis deputatis ad custodiam hominum.

I **D**ilexisti enim me, vnice amor meus,
antequam diligerem te, & ad ima-
ginem tuam creasti me, omnibus creaturis
tuis præposuisti me. Quam dignitatem nunc
quidem seruo, cum nouerim te, propter quem
fecisti me.

2 Insuper facis Angelos tuos spiritus
propter me: quibus mandasti, vt custodiant
me in omnibus vijs meis: ne forte offendam
ad lapidem pedem meum. Hi enim sunt cu-
stodes, super muros ciuitatis tuæ nouæ Hie-
rusalem, & montes in circuitu eius: vigilan-
tes, & custodientes vigilias noctis super gre-
gem tuum: ne quando rapiat, vt leo animas
nostras, dum non esset qui eriperet, ille an-
tiquus serpens aduersarius noster diabolus,

qui quasi leo rugiens semper circumit, quærens quem deuoret. Hi sunt ciues beatæ ciuitatis supernæ Hierusalem, quæ sursum est mater nostra, in ministerium missi propter eos, qui hæreditatem capiunt salutis: vt eos liberent ab inimicis suis: & custodiant in omnibus vijs suis, confortent quoque, & moneant, & orationes filiorum tuorum offerant, in conspectu gloriæ maiestatis tuæ.

3 Diligunt nempe conciuēs suos, per quos suæ ruinæ scissuras restaurari expectant. Ideoque magna cura, & vigilantī studio, adfunt nobis: omnibus horis, & locis succurrentes, & prouidentes necessitatibus nostris, & solliciti discurrentes inter nos, & te Domine: gemitus nostros, atque suspiria referentes ad te, vt impetrent nobis faciliem tuæ benignitatis propitiationem, & referant ad nos desideratam tuæ gratiæ benedictionem. Ambulant enim nobiscum in omnibus vijs nostris; intrant, & exeunt nobiscum: attente considerantes, quam pie, quam honeste in medio prauæ nationis conuersemur: quantoque studio, & desiderio quæramus regnum tuum, &

iusti-

iustitiam eius; quantoque timore, & tremore
 feruiamus, & exulemus tibi in lætitia cordis
 nostri. Adiuuant laborantes, protegent
 - quiescentes, hortantur pugnantes, coronant
 vincentes; congaudent gaudentibus, de te
 (inquam) gaudentibus; compatiuntur patien-
 tibus, pro te (inquam) patientibus.

- 4 Grandis est eis cura de nobis: magnus
 est affectus dilectionis eorum erga nos: & hoc
 totum propter honorem tuæ inæstimabilis
 charitatis, qua dilexisti nos. Diligunt enim
 - quos tu diligis; custodiunt quos tu custodis:
 & deserunt quos tu deseris; nec diligunt ope-
 rantes iniquitatem; quoniam & tu odisti om-
 nes operantes iniquitatem, & perdes omnes,
 qui loquuntur mendacium. Quoties bene
 agimus, gaudent Angeli, & tristantur dæ-
 mones. Quoties à bono deuiamus, diabolum
 lætificamus, & Angelos tuos suo gaudio de-
 fraudamus. Gaudium est enim eis super vno
 peccatore poenitentiam agente; sed diabo-
 lo, super vno iusto poenitentiam deferente.
 - Da igitur, da Pater eis semper gaudere de
 nobis, vt & tu semper per eos lauderis in no-

bis; & nos cum eis in vnum ouile tuum adducamur, vt. confiteamur simul nomini sancto tuo, creator Hominum, & Angelorum.

5 Hæc ipse commemorans, coram te confiteor, laudans te: quoniam beneficia tua magna sunt hæc, quibus nos honorificasti; dans nobis Angelos tuos spiritus in ministerium nostrum. Dederas enim quidquid cœli ambitu continetur; & quasi parua reputas hæc quæ sub cœlo sunt, nisi dares etiam ea, quæ sunt super cœlos. Laudent te, Domine, de hoc omnes Angeli tui; confiteantur tibi de hoc omnia opera tua; & ipsi sancti tui tibi benedicant. O honorificentia nostra, nos nimis honorificans, ditans, multis muneribus decorasti! admirabile est enim nomen tuum, Domine, in vniuersa terra. Quid est enim homo, quia magnificas eum, aut quid apponis erga eum cor tuum? Dixisti enim, veritas antiqua: Delitiæ meæ sunt cum filijs hominum. Nonne homo putredo, & filius hominis vermis? Nonne vniuersa vanitas omnis homo viuens? Et dignum ducis super huiusmodi aperire oculos tuos,

tuos , & adducere eum tecum in iudicium.

CAPVT XXVIII.

*De profunda prædestinatione, & præscientia
Dei.*

I D Oce me abyssus profundissima, creatrix sapientia, quæ libraſti in pondere montes, & colles, in ſtatera molem terræ tribus digitis appendiſti. Suspende molem corporalitatis huius quam gero, tribus inuiſis digitis tuis ad te, vt videam, & cognoscam, quam admirabilis es in vniuerſa terra. Lux antiquiſſima, quæ lucebas ante omnem lucem, in montibus ſanctis æternitatis antiquæ; cui nuda, & aperta erant omnia antequam fierent: Lux quæ odio habes omnem maculam, vtpote mundiſſima, & immaculatiffima, quæ tibi deliciæ cum homine? quæ conuentio lucis ad tenebras? Vbi enim ſunt in homine deliciæ tuæ? Vbi præparaſti tibi in me dignum ſanctuarium maiestatis tuæ, ad quod introiens habeas delicias

delectationistuae? Mundum enim coenaculum decet te mundans virtus, quæ non nisi à mundis cordibus videri potes; multo magis nec haberi.

2 In homine autem ubi est templum tam mundum, ut te suscipiat, qui regis mundum? Quis potest facere mundum de immundo conceptum semine? Nonne tu qui solus es mundus? Ab immundo enim quis mundabitur? Nam & secundum legem, quam dedisti patribus nostris in igne comburenti montem, & in nube tegente aquam tenebrosam; quicquid tetigerit immundus, immundum erit. Omnes autem nos quasi pannus menstruatae, de massa corrupta, & immunda venientes, maculam immunditiæ nostræ, quam celare, præsertim tibi, qui omnia vides, non possumus, in frontibus portamus. Quare mundi esse non possumus; nisi tu mundaueris, qui solus es mundus. Mundas autem de nobis, filiis hominum, eos in quibus tibi complacuit habitare; quos ab inaccessibilibus profundis secretis iudiciorum incomprehensibilium sapientiæ tuæ semper iustorum, licet occulto-

cultorum, sine eorum meritis prædestinasti ante mundum; vocasti de mundo, iustificasti in mundo, & magnificas eos post mundū. Non omnibus autem hoc facis, quod admirantur tabescentes omnes sapientes terræ.

301 Et ego Dōmine hoc considerans expauesco, & obstupefco de altitudine diuitiarum sapientiæ, & scientiæ tuæ; ad quam ego non pertingo: & incomprehensibilia iudicia iustitiæ tuæ, quoniam ex eodem luto, alia quidem facis vasa in honorem, alia vero in contumeliam. Quos igitur tibi elegisti de multis in templum sanctum tuum, ipsos mūdās, effundens super eos aquam mundam, quorum nomina numerumque tu nosti: qui solus numeras multitudinem stellarum, & omnibus eis nomina donas: qui etiam scripti sunt in libro vitæ: qui nequaquam perire possunt; quibus omnia cooperantur in bonum, etiam ipsa peccata. Cum enim cadūt, non colliduntur, quia tu supponis manum tuam: custodiens omnia ossa eorum, vt vnum ex eis non conteratur.

4 Attamen mors peccatorum pessima; illorum, inquam, quos antequam faceres coelum, & terram, secundum abyssum multam iudiciorum tuorum occultorum, semper autem iustorum, præsciuit ad mortem æternam; quorum dinumeratio nominum, & meritorum prauorum apud te est, qui numerum arenæ maris dinumerasti, & dimensus es profundum abyssi: quos reliquisti in immun-
ditijs suis; quibus omnia cooperantur in malum, & ipsa etiam oratio vertitur in peccatum; vt si etiam vique ad cœlos ascenderint, & caput eorum nubes tetigerit, & inter sydera cœli collocauerint nidum suum, quasi sterquilinium in fine perdentur.

CAPVT XXIX.

De illis, qui prius sunt iusti, & postea impij efficiuntur, & è conuerso.

I **M**agna sunt hæc iudicia tua, Domine Deus, iudex iuste, & fortis; qui iudicas æquitatem, & inscrutabilia facis, & profunda: quæ cum considero, contremiscunt omnia

omnia ossa mea. Quoniam non securatur homo viuens super terram, vt seruiamus tibi pie, & caste cunctis diebus vitæ nostræ, in timore, & exulemus tibi cum tremore: vt non sit seruitium sine timore, neque gaudium sine tremore; & nō gloriatur accinctus æque, vt discinctus; neque gloriatur ante te omnis caro, sed pauescat, & contremiscat à facie tua: cum ignoret homo, vtrum amore, an odio dignus sit, sed in futurum omnia reseruantur incerta.

2 Vidimus enim multos, Domine, & audiuius à patribus nostris (quod vtique sine magno tremore non recolo, sine multo timore non confiteor) ascēdisse primitus quodammodo vsque ad cœlos, & inter sidera nidum suum collocasse, postmodum autem cecidisse vsque ad abyssos, & animas eorum in malis obstupuisse. Vidimus, stellas de cœlo cecidisse, ab impetu ferientis caudæ draconis: & eos, qui iacebant in puluere terræ, à facie subleuantis manus tuæ, Domine, mirabiliter adscendisse. Vidimus viuos morientes, & mortuos à morte surgentes: & eos,
qui

qui inter filios Dei ambulabant in medio lapidum ignitorum, quasi lutum ad nihilum defluxisse. Vidimus lucem obtenebrasse, & de tenebris lucem processisse: quia publicani, & meretrices præcedunt incolas in regno cœlorum; filij autem regni eiiciuntur in tenebras exteriores.

3 Quare autem ista omnia, nisi, quia in montem illum ascenderunt, in quem primus ascendit Angelus, & descendit diabolus? Quos autem prædestinasti, ipsos, & vocasti, & sanctificasti, & mundasti, vt dignum habitaculum sint tuæ maiestatis: cum quibus, & in quibus sint tibi delitiæ sanctæ, & mundæ, in quibus tu delectaris, & lætificas iuventutē eorum: habitans cum eis in memoria eorū, vt ipsi templum sanctum tuum sint, quod magnæ dignitatis, & commendatio est humanitatis nostræ.



CAPVT XXX.

Quod Anima fidelis sit sanctuarium Dei.

ANima enim, quam creasti, non de te, sed per verbum tuum, non ex qualibet elementorum materia, sed ex nihilo; quæ quidem rationalis, intellectualis, spiritualis semper viuens, semper in motu (quam signasti lumine vultus tui, & consecrasti virtute lauacri tui) ita facta est capax maiestatis tuæ, quod à te solo, & à nullo alio possit impleri. Quando autem te habet, plenum est desiderium eius; & iam nihil aliud quod desideretur exterius restat. Dum autem aliquid exterius desiderat, manifestum est, quod te non habet interius; quo habito, nihil est quod vltra desideret.

2 Cum enim sis summum, & omne bonum non habet quod desideret amplius, sed possidet te omne bonum. Quod si non desiderat omne bonum, restat vt desideret aliquid, quod non est omne bonum, ergo nec summum bonum: ergo nec Deum, sed potius creaturam. Cum autem
crea-

creaturam desiderat, continuam famem habet; quia licet, quod desiderat de creaturis adipiscatur, vacua tamen remanet: quia nihil est, quod eam impleat, nisi tu, ad cuius imaginem est creata. Imples autem tu eos, qui nihil aliud desiderant præter te, & facis eos dignos te, sanctos, beatos, immaculatos, & amicos Dei; qui omnia reputant, vt stercora, vt lucrifaciant te solum.

3 Hæc est enim beatitudo, quam homini contulisti. Hic est honor, quo eum inter omnes creaturas, & super omnes honorificasti, vt sit admirabile nomen tuum in vniuersa terra. Ecce Domine Deus meus, summe, optime, omnipotentissime, inueni locum vbi tu habitas, quia in anima, quam creasti ad imaginem, & similitudinem tuam, quæ te solum quærit, & desiderat: quia non in illa, quæ te non quærit nec desiderat.

*

CAPVT XXXI.

*Quod neque per sensus exteriores, neque interiores
inueniri potest Deus.*

EGO erraui sicut ouis, quæ perierat,
quærens te exterius, qui es interius.
Et multum laboraui quærens te extra me: &
tu habitas in me, si tamen ego desiderem te.
Circuiui vicos, & plateas ciuitatis huius mū-
di, quærens te, & non inueni: quia male
quærebam foris, quod erat intus. Misi nun-
cios meos, omnes sensus exteriores; vt quæ-
rerem te, & non inueni; quia male quæreba.
Video enim lux mea Deus, qui illuminasti
me, quia male te per illos quærebam: quia
tu es intus: & tamen ipsi, vbi intraueris, ne-
sciuerunt.

2 Nam oculi dicunt, si coloratus non
fuit, per nos non intrauit. Aures dicunt, si
sonitum non fecit, per nos non transiuit.
Nasus dicit, si non oluit, per me non venit.
Gustus dicit, si non sapuit, per me non in-
troiuit. Tactus etiam addit, si corpulentus
non

non est, nihil me de hac re interroges. Non ista igitur sunt in te, Deus meus. Non enim speciem corporis, non decus temporis, non candorem lucis, non colorem, non dulcium melodiarum cantus, & quæcunque dulce sonantia: non florum, & vnguentorum, vel aromatum odores; non mella, vel manna, gustui delectabilia; non cætera ad tangendum, vel amplexandum amabilia; nec omnia alia sensibus his subiecta quæro, cum Deum meum quæro. Absit ut ista crediderim Deum meum, quæ etiam à brutalium sensibus comprehenduntur.

3 Et tamen, cum Deum meum quæro, quæro nihilominus quandam lucem super omnem lucem, quam non capit oculus; quandam vocem super omnem vocem, quam non capit auris; quandam odorem super omnem odorem, quem non capit naris; quandam dulcorem super omnem dulcorem, quæ non capit gustus; quandam amplexum super omnem amplexum, quem non capit tactus. Ista lux quidem fulget, ubi locus non capit: ista vox sonat, ubi spiritus non rapit: odor

non

iste

iste redolet, vbi flatus non spargit: sapor iste sapit, vbi non est edacitas; amplexus iste tangitur, vbi non diuellitur. Hic est Deus meus, & non æstimabitur alius ad illum. Hoc quæro, cum Deum meum quæro. Istud amo, cum Deum meum amo.

4 Sero te amaui, pulchritudo, tam antiqua, & tam noua: sero te amaui; & tu intus eras, & ego foris: & ibi te quærebam, & in ista formosa, quæ fecisti, ego deformis iruebam. Mecum eras, & tecum non eram. Ea me tenebant longè à te, quæ esse non poterant, nisi in te. Circumibam enim omnia, quærens te, & propter omnia derelinquens me. Interrogauì terram, si esset Deus meus: & dixit mihi, quod non, & omnia quæ in ea sunt, hoc idem confessa sunt. Interrogauì mare, & abyssos, & reptilia quæ in eis sunt, & responderunt: Non sumus Deus tuus; quære super nos eum. Interrogauì flabilem aerem, & inquit ynìuersus aer cum omnibus incolis suis: Fallitur Anaximenes; non sum ego Deus tuus. Interrogauì Cœlum, Solem, Lunam, & Stellas: neq; nos sumus Deus tuus, inquiunt.

5. Et dixi omnibus his, quæ circumstant
 forēs carnis meæ: Dixistis mihi de Deo meo,
 quod vos non estis; dicite mihi aliquid de il-
 lo. Et clamauerunt omnes voce grandi: Ipse
 fecit nos. Interrogavi deinde mundi molem:
 Dic mihi, si es Deus meus, an non? Et re-
 spondit voce forti: Non sum (inquit) ego,
 sed per ipsum sum ego; quem quæris in me,
 ipse fecit me; supra me quære eum, qui regit
 me; qui fecit me. Interrogatio creaturarum,
 profunda est consideratio ipsarum: responsio
 earum, attestatio ipsarum de Deo, quoniam
 omnia clamant: Deus nos fecit. Quoniam vt
 ait Apostolus: Inuisibilia Dei per ea, quæ fa-
 cta sunt, à creatura mundi intellecta conspi-
 ciuntur.

6. Et redij ad me, & intraui in me, & aio
 ad me: Tu quis es? Et respondi mihi: Ho-
 mo rationalis, & mortalis. Et incepti discu-
 tere quid hoc esset: & dixi: Vnde hoc tale
 animal, Domine Deus meus? Vnde nisi abs-
 te? Tu fecisti me, & non ego ipse me. Quis
 tu? Tu, per quem uiuo ego. Tu, per quem
 viuunt omnia. Quis tu? Tu, Domine Deus
 meus

meus verus, & solus omnipotens, & æternus, & incomprehensibilis, & immensus. Qui semper vivis, & nihil moritur in te; immortalis enim es, habitans æternitatē: mirabilis oculis Angelorum, inenarrabilis, imperscrutabilis, & innominabilis. Deus vivus est verus, terribilis, & fortis, nesciens principium, neque finem, principium omnium atque finis: qui es ante primordia sæculorum, & ante omnes sæculorum origines. Tu es Deus meus, & Dominus omnium quæ creasti; & apud te omnium stabilium stant causæ; & omnium mutabilium apud te immutabiles manēt: origines; & omnium rationabilium, & irrationabilium, atque temporalium sempiternæ vivunt rationes.

7 Dic mihi supplici seruo tuo, Deus meus, dic misericors misero tuo, dic quæso per miserationes tuas. Vnde hoc tale animal, nisi abs te? An quisquam se se faciendi erit artifex? An aliunde quam à te traditur esse, & vivere? Nonne tu es summum esse, à quo est omne esse? Quicquid enim est, à te est, quia sine te nihil est. Nonne tu es fons vitæ,

à quo fluit omnis vita? Quicquid enim viuit, per te viuit, quia sine te nihil viuit. Tu ergo Domine fecisti omnia. Num quæram, quis fecit me? Tu Domine fecisti me, sine quo factum est nihil. Tu factor mei. Ego opus tuum. Gratias tibi ago, Domine Deus meus, per quem uiuo ego, & per quem omnia uiuunt, quoniam fecisti me. Gratias tibi plas-mator mei, quia manus tuæ fecerunt me, & plasmauerunt me. Gratias tibi lux mea, quoniam illuminasti me, & inueni te, & me. Vbi inueni me, ibi cognoui me: vbi inueni te, ibi cognoui te: vbi autem cognoui te, ibi illuminaſti me. Gratias tibi lux mea, quoniam illuminaſti me.

8 Quid est, quod dixi, cognoui te? Nonne tu es Deus incomprehensibilis, & im-mensus? Rex Regum, & Dominus Domi-nantium? qui solus habes immortalitatem, & lucem habitas inaccessibilem; quam nullus hominum vidit, sed nec videre potest. Non-ne tu es Deus absconditus, & imperſcrutabi-lis maiestatis, solus tui ipsius cognitor, & mi-rabilis contemplator? Quis ergo cognouit,
quod

quod nunquam vidit? Dixisti enim in veritate tua: Non videbit me homo, & viuet. Dixit, & præco tuus per veritatem tuam: Deum nemo vidit vnquam. Quis ergo cognouit, quod nunquam vidit? Dixit etiam veritas tua: Nemo nouit filium, nisi Pater; neque Patrem quis nouit, nisi Filius. Sola Trinitas tua soli sibi integre nota est, quæ exsuperat omnem sensum.

9. Quid est ergo quod dixi, homo vanitati similis, quia cognoui te? Quis enim cognouit te, nisi tu te? Tu quippe solus Deus omnipotens, superlaudabilis, & supergloriosus, & superexaltatus, & altissimus, & superessentialis, in sanctissimis, & diuinissimis eloquijs nominaris. Quoniam super omnem essentiam intelligibilem, siue intellectualem, atque sensibilem, & super omne nomen quod nominatur, non solum in hoc sæculo, sed etiam in futuro, superessentiabiliter, & superintelligibiliter esse dignosceris: quoniam superessentiabili, & occulta diuinitate, super omnem rationem, intellectum, & essentiam, inaccessibleiter, & imperscrutabiliter habi-

tas in te ipso, vbi lux inaccessibilis, & lumen imperscrutabile, & incomprehensibile, & inenarrabile, ad quod non attingit aliquod lumen; quoniam incontemplabile, & inuisibile, superrationale, & superintelligibile, & superinaccessibile, & superincommutabile, & superincommunicabile creditur. Quod nullus vnquam Angelorum, vel hominum vidit, sed nec videre potest. Hoc est cœlum tuum, Domine, cœlum celans, superarcnum, superintelligibile, superrationale, & superessentiale lumen, de quo dicitur: Cœlum cœli Domino.

10 Cœlum cœli, cui terra est omne cœlum, quia supermirabiliter exaltatum est super omne cœlum. Ad quod etiam terra est ipsum cœlum Empyreum. Hoc enim est cœlum cœli Domino: quia nulli notum, nisi Domino. Ad quod nemo ascendit, nisi qui de cœlo descendit. Quia nemo nouit Patrem, nisi Filius, & eorum Spiritus. Et nemo nouit Filium, nisi Pater, & eorum Spiritus. Soli quidem tibi Trinitas integre nota est. Trinitas sancta, Trinitas supermirabilis, & superinenar-

inenarrabilis, & superinscrutabilis, & superinaccessibilis, superincomprehensibilis, superintelligibilis, superessentialis, superessentialiter exsuperans omnem sensum, omnem rationem, omnem intellectum, omnem intelligentiam, omnem essentiam supercœlestium animorum; quam neque dicere, neque cogitare, neque intelligere, neque cognoscere possibile est, etiam oculis Angelorum.

II Vnde ergo cognoui te, Domine Deus altissime super omnem terram, super omne cœlum? quem neque Cherubim perfecte cognoscunt, neque Seraphim; sed talis contemplationum suarum velatur facies, sedentis super solium excelsum, & eleuatum, clamantes, & dicentes: Sanctus, Sanctus, Sanctus Dominus Deus exercituum; plena est omnis terra gloria tua. Expauit Propheeta, & dixit: Væ mihi quia tacui; quia vir pollutus labijs ego sum. Et expauit cor meum, & dixi: Væ mihi, quia (non tacui; quia vir pollutus labijs ego sum: Sed dixi) cognoui te. Veruntamen Domine, væ tacentibus de te: quoniam loquaces muti fiunt sine te.

Et ego, Domine Deus meus, non tacebo, quoniam fecisti me, & illuminasti me: & inuenisti me, & cognoui te, quoniam illuminasti me.

12 Sed qualiter cognoui te? Cognoui te in te. Cognoui te, non sicut tibi es; sed cognoui te, sicut mihi es: & non sine te, sed in te; quia tu es lux, quæ illuminasti me. Sicut enim tibi es, soli tibi cognitus es: sicut mihi es secundum gratiam tuam, & mihi cognitus es. Sed quid mihi es: Dic mihi misericors famulo tuo misero: dic mihi per miserationes tuas, quid mihi es: Dic animæ meæ. Salus tua ego sum; noli abscondere à me faciem tuam, ne moriar. Sine me loqui apud misericordiam tuam, me terram, & cinerem: sine me loqui apud misericordiam tuam, quoniam misericordia tua magna est super me: loquar enim ad Deum meum, cum sim pulvis, & cinis. Dic mihi supplici tuo, dic mihi misericors misero tuo, dic per miserationes tuas, quid mihi es? Et intonasti de super voce grandi in interiorem aurem cordis mei, & rupisti surditatem meam, & audiui vocem tuam;

tuam; & illuminasti cæcitatem meam, & vidi lucem tuam: & cognoui quoniam Deus meus es tu. Propterea dixi, quod cognoui te.

13. Cognoui enim te, quoniam Deus meus es tu. Cognoui te solum verum Deum, & quem misisti Iesum Christum. Erat tempus quando non cognoscebam te. Væ tempori illi, quando non cognoscebam te. Væ cæcitati illi, quando non videbam te. Væ surditati illi, quando non audiebam te. Cæcus, & surdus per formosa quæ fecisti, deformis iruebam. Et mecum eras, & tecum non eram, & ea me tenebant longe à te, quæ non essent, nisi essent in te. Illuminasti me, lux mundi: & vidi te, & amaui te. Nemo quippe te amat, nisi qui te videt: & nemo te videt, nisi qui te amat. Sero te amaui, pulchritudo tam antiqua, & tam noua, fero te amaui. Væ tempori illi, quando non te amaui.

CAPVT XXXII.

Confessio vera fidei.

I **G** Ratias tibi ago lux mea, quæ illuminasti me, & cognoui te. Qualiter cognoui te? Cognoui te solum Deum viuum, & verum creatorem meum: cognoui te, creatorem cœli, & terræ, visibilium omnium, & inuisibilium, Deum verum, omnipotentem, immortalem, & inuisibilem, incircumscriptibilem, interminabilem, æternum, inaccessibleibilem, incomprehensibilem, imperscrutabilem, incommutabilem, immensum, infinitum, principium omnium visibilium, & inuisibilium creaturarum, per quem omnia facta sunt, per quem cuncta subsistunt elementa. Cuius maiestas sicut principium nunquam habuit, sic nec desinet in æternum. Cognoui te vnum solum verum Deum æternum, Patrem, & Filium, & Spiritum sanctum; tres quidem personas, sed vnā essentiam, omnino simplicem indiuisamque naturam; & Patrem à nullo, Filium à Patre solo, & Spiritum

tum pariter ab vtroque; absque initio, semper, & sine fine Deum trinum, & vnum solum, & verum Deum omnipotentem: vnum vniuersorum principium, creatorem omniū visibilium, & inuisibilium, spiritualium, & temporalium; qui tua omnipotenti virtute, simul ab initio temporis vtramque de nihilo condidisti creaturam, spiritualem, & corporalem, Angelicam videlicet, & mundanam, ac deinde humanam, quasi communem, ex corpore, & spiritu constitutam.

2 Cognoui te, & confiteor te Deum Patrem ingenitum, te Filium à Patre genitum, & Spiritum sanctum paracletum, neque genitum, neque ingenitum: sanctam, & indiuiduam Trinitatem, in tribus coequalibus personis consubstantialibus, & coæternis; Trinitatem in vnitatem, & vnitatem in Trinitate, corde credens ad iustitiam, & ore confitens ad salutem. Cognoui te verum Deum, & Dominum nostrum Iesum Christum, Filium Dei vnigenitum, Creatorem, Saluatorem, & Redemptorem mei, & totius humani generis; quem confiteor ex Patre genitum ante sæcula;

la; Deum de Deo, lumen de lumine, Deum verum de Deo vero, non factum sed genitum, consubstantiali, & coeternum Patri, & Spiritui sancto, per quem omnia facta sunt à principio: firmiter credens, & veraciter cōfitens, te Deum vnigenitum Iesum Christum, propter salutem hominum à tota Trinitate communiter incarnatum, & ex Maria perpetua Virgine, Spiritus sancti cooperatione conceptum, verum hominem factum, ex anima rationali, & humana carne subsistentem.

3. Qui cum secundum diuinitatem vni-
genitus Dei impassibilis sis, pariter, & im-
mortalis; propter nimiam dilectionem tuam,
qua dilexisti nos, idem ipse Dei filius secun-
dum humanitatem factus es passibilis, &
mortalis. Qui propter salutem humani ge-
neris, vnice filii Dei, in ligno crucis pati di-
gnatus es passionem, & mortem, vt nos a
morte perpetua liberares. Atque ad infe-
ros, vbi sedebant in tenebris patres nostri,
auctor luminis descendisti, & die tertia glo-
riosus victor ab inferis ad superos resurrexi-
sti;

sti; resumens sacrum corpus, quod pro peccatis nostris mortuum iacuerat in sepulchro; & viuificans secundum scripturas dietertia, vt ipsum in Patris dextra collocares. Assumpta namque tecum ex inferis captiuitate, quam captiuauerat antiquus hostis humani generis inimicus, verus Dei filius cum nostræ carnis substantia, id est, cum anima, & carne humana ex Virgine gloriosa assumpta, super omnes cælos ascendisti, transcendens omnes ordines Angelorum: vbi sedes ad dexteram Dei Patris, vbi est fons vitæ, & lumen inaccessibile, & pax Dei, quæ exsuperat omnem sensum.

4 Ibi te Deum verum, & hominem Iesum Christum adoramus, & credimus, confitentes te Patrem habere Deum; indeque te venturum Iudicem in fine sæculi expectamus, vt iudices viuos, & mortuos, & reddas omnibus bonis, & malis secundum opera sua, quæ operati sunt in hac vita, vel præmium, vel supplicium; prout vnusquisque dignus fuerit requie, vel ærumna. Resurgent enim in illa die à voce virtutis tuæ omnes homines,

nes, quotquot humanam animam acceperunt in carne sua, quam hic habuerunt; vt totus homo pro meritis, vel gloriam suscipiat, vel gehennam. Tu es ipsa vita, & resurrectio nostra, quem saluatorem expectamus, Dominum Iesum Christum, qui reformabit corpus humilitatis nostræ, configuratum corpori claritatis suæ.

5 Cognoui te Deum verum, & vnum Spiritum sanctum, Patris, & Filij ab vtroque pariter procedentem, consubstantialem, & coæternum Patri, & Filio, paracletum, & aduocatum nostrum, qui super eundem Deum, & Dominum nostrum Iesum Christum in columbæ specie descendisti, & super Apostolos in linguis igneis apparuisti. Qui & omnes Sanctos, & electos Dei à principio; tuæ gratiæ munere docuisti, & ora Prophetarum; vt enarrent mirabilia regni Dei, aperuisti: qui ab omnibus Sanctis Dei cum Patre, & Filio simul adoraris, & glorificaris. Inter quos, & ego filius ancillæ tuæ, corde meo glorifico nomen tuum, quoniam illuminasti me. Tu enim es vera lux, lumen veridicum, ignis Dei,

Dei, & magister spirituum: qui vñctione tua doces nos omnem veritatem, Spiritus veritatis: sine quo impossibile est placere Deo, quoniam tu ipse Deus es ex Deo, & lux de luce procedens, à Patre luminum ineffabiliter, & ab eius filio Domino nostro Iesu Christo: quibus consubstantialis, & coæqualis, & coæternus, existens in vnius Trinitatis essentia, supereffentialiter congloriaris, & conregnas.

6. Cognoui te vnum Deum viuum, & verum, Patrem, & Filium, & Spiritum sanctum; trinum quidem in personis, sed vnum in essentia: quem confiteor, adoro, & glorifico toto corde meo, verum Deum solum, sanctum immortalem, inuisibilem, incommutabilem, inaccessibleem, imperscrutabilem: vnum lumen, vnum solem, vnum panem, vnam vitam, vnum bonum, vnum principium, vnum finem, vnum creatorem cæli, & terræ; per quem omnia viuunt, per quem omnia subsistunt, per quem omnia gubernantur, reguntur, & viuificantur, quæ in cælis sunt, & quæ in terris, & quæ sub terra; præter

ter quem non est Deus in cælo, & in terra.

7 Sic cognoui te Domine Deus cognitor mei, sic cognoui te. Cognoui te per fidem tuam, quam inspirasti mihi, lux mea, lumen oculorum meorum, Domine Deus meus, spes omnium finium terræ, gaudium latificans iuuentutem meam, & bonum substantans senectutem meam. In te enim Domine iubilant omnia ossa mea, dicentia: Domine, quis similis tibi? Quis similis tibi in dijs Domine? Non quem fecit manus hominum, sed qui fecisti manus hominum. Simulachra gentium argentum, & aurum, opera manuum hominum; non sic operator hominum. Omnes dij gentium dæmonia; Dominus autē cælos fecit, Dominus ipse est Deus. Dij, qui non fecerunt cælum, & terram, pereant de cælo, & de terra; Deum, qui creauit cælum, & terram, cæli, & terra benedicant.

CAPVT XXXIII.

De confessione propria utilitatis.

I **Q**Vis similis tibi etiam in dijs Domine? Quis similis tibi? Magnificus in sanctitate, terribilis atque laudabilis, & faciens mirabilia? Sero te cognoui lumen verum, sero te cognoui. Erat autem nubes magna, & tenebrosa ante oculos vanitatis meæ: ita vt videre non possem solem iustitiæ, & lumen veritatis. Inuoluebar in tenebris; filius tenebrarum, tenebras meas amabam: quia lumen non cognoscebam. Cæcus eram, & cæcitatem amabam, & ad tenebras per tenebras ambulabam. Quis inde me eduxit, vbi eram homo cæcus, sedens in tenebris, & vmbra mortis?

2 Quis accepit manum meam, vt inde me educeret? Quis est ille illuminator meus? Non enim quærebam, & ipse quæsiuit me: non vocabam eum, & ipse vocauit me. Quis est ille? Tu es Domine Deus meus, misericors, & miserator, Pater misericordiarum,

R

& Deus

& Deus totius consolationis. Tu sancte Domine Deus meus, quem confiteor toto corde meo, gratias agens nomini tuo. Non te quærebam, tu me quæsiuisti; non te inuocabam, tu me vocasti.

3 Vocasti enim me nomine tuo. Intonasti desuper voce grandi, in interiorem aurem cordis mei, fiat lux, & facta est lux, & discessit nubes magna, & liquefacta est nubes tenebrosa, quæ operuerat oculos meos: & vidi lucem tuam, & cognoui vocem tuam, & dixi: Vere Domine tu es Deus meus, qui eduxisti me de tenebris, & umbra mortis; & vocasti me in admirabile lumen tuum, & ecce video. Gratias tibi illuminator meus. Et conuersus sum, & vidi tenebras, in quibus fueram; & abyssum tenebrosam, in qua iacueram; & contremui, & expaui, & dixi: Væ, væ tenebris meis, in quibus iacui: Væ, væ cæcitati illi, in qua videre non poteram lumen coeli! Væ, væ præteritæ ignorantie meæ, quando non cognoscebam te, Domine. Gratias tibi ago, illuminator, & liberator meus, quoniam illuminasti me, & cognoui

gnoui te . Sero cognoui te , veritas antiqua ,
 sero te cognoui , veritas æterna . Tu eras in
 lumine , & ego in tenebris , & non cognosce-
 bam te : quia illuminari non poteram sine te ,
 & non est lux extra te .

C A P V T X X X I V .

Consideratio diuinæ maiestatis .

I **S** Ancte sanctorum , Deus inæstimabilis
 maiestatis , Deus Deorum , & Domi-
 nus dominorum , mirabilis , inerrabilis , inex-
 cogitabilis ; quem contremiscunt in cælo An-
 gelicæ potestates ; quem adorant omnes Do-
 minationes , & Throni , & omnes Virtutes
 paudent à conspectu tuo ; cuius potentia , &
 sapientia non est numerus , qui fundasti mû-
 dum super nihilum , & mare colligasti in aëre
 quasi in vtre , omnipotentissime , sanctissime ,
 fortissime Deus spirituum vniuersæ carnis , &
 cuius conspectu fugit cœlum , & terra ; ad cu-
 ius nutum omnia se subijciunt elementa : te
 adorent , & glorificent omnes creaturæ
 tuæ .

2 Et ego filius ancillæ tuæ, per fidem tuam flecto certicem cordis mei, sub pedibus Maiestatis tuæ, gratias agens: quoniam dignatus es per tuam misericordiam illuminare me. Lumen verum, lumen sanctum, lumen delectabile, lumen superlaudabile, lumen admirabile, quod illuminat omnem hominem venientem in hunc mundum, & etiam oculos Angelorum. Ecce video, gratias ago. Ecce video lumen cœli, interlucet oculis mentis meæ radius desuper, à facie luminis tui, & lætificat omnia ossa mea. O si perficeretur in me! Auge quæso, luminis auctor, auge quæso, quod interlucet in me. Dilatetur, obsecro, dilatetur ex te.

3 Quid est hoc, quod sentio? Quis est ignis, qui calefacit cor meum? Quæ est lux, quæ irradiat cor meum? O ignis, qui semper ardes, & nunquam extingueris, accende me! O lux, quæ semper lucet, & nunquam obfuscaris, illumina me! O utinam arderem ex te! Ignis sancte, quam dulciter ardes, quam secrete lucet, quam desideranter aduris! Væ ijs, qui non ardent ex te: Væ illis, qui

qui non illuminantur ex te: O lumen veridicum, illuminans omnem mundum, cuius lux implet mundum!

4 Væ cæcis oculis, qui te non vident, sol illuminans cœlum, & terram. Væ caligantibus oculis, qui te videre non possunt. Væ auertentibus oculis, vt non videant veritatem. Væ non auertentibus, vt non videant vanitatem: nequeunt enim oculi assueti tenebris, summæ veritatis radios intueri; nec sciunt de lumine aliquid æstimare, quorum est in tenebris habitatio. Tenebras vident, tenebras diligunt, tenebras approbant: de tenebris euntes in tenebras, nesciunt vbi corruant. Miseri, qui nesciunt quid amittant; & miseres vtique, qui sciunt quid amittât; qui cadunt apertis oculis, & descendunt in infernum viuentes.

5 O lux beatissima; quæ non nisi á purgatissimis oculis videri pòtes. Beati mundo corde, quoniam ipsi Deum videbunt. Munda me, mundans virtus; sana oculos meos, vt sanis oculis te contempler, quem non nisi sani oculi intuentur. Aufer, quæso, squamas

caliginis antiquæ, radio tuæ illuminationis splendor inaccessibilis, vt te videre valeam, irreuerberatis obtutibus, & in lumine tuo videam lumen. Gratias tibi ago, lux mea. Ecce video. Dilatetur obsecro visus meus Domine ex te. Reuela oculos meos, vt considerem mirabilia de lege tua: qui es mirabilis in Sanctis tuis. Gratias tibi ago, lumen meum. Ecce video, sed per speculum in ænigmate. Sed quando facie ad faciem? Quando veniet dies lætitiæ, & exultationis, in qua ingrediar in locum tabernaculi admirabilis, vsque ad domum Dei: vt videam videntem me, facie ad faciem, & satietur desiderium meum?

CAPVT XXXV.

De desiderio suæ animæ ad Deum.

QUemadmodum desiderat ceruus ad fontes aquarum, ita desiderat anima mea ad te Deus. Sitiuit anima mea ad te Deum fontem viuum: quando veniam, & apparebo ante faciem tuam? O fons vite!

vena

vena aquarum viuentium, quando veniam
ad aquas dulcedinis tuæ, de terra deserta, in-
uia, & inaquosa, vt videam virtutem tuam;
& gloriam tuam, & satiem ex aquis miseri-
cordiæ tuæ sitim meam? Sitio Domine; fons
vitæ es, satia me. Sitio Domine, sitio te
Deum viuum. O quando veniam, & appa-
rebo Domine ante faciem tuam? Putasne
videbo diem illam, diem inquam iucundita-
tis, & lætitiæ, diem quam fecit Dominus, vt
exultemus, & lætemur in ea?

2 O dies præclara, & pulchra, nesciens
vesperum, non habens occasum: in qua au-
diam vocem laudis, vocem exultationis, &
confessionis. In qua audiam: Intra in gau-
dium Domini tui. Intra in gaudium sempi-
ternum, in domum Domini Dei tui; vbi sunt
magna, & inscrutabilia, & mirabilia, quo-
rum non est numerus. Intra in gaudium sine
tristitia, quod continet æternam lætitiā.
Vbi erit omne bonum, & non erit aliquod
malum. Vbi erit quicquid voles, & non erit
quidquid noles. Vbi erit vita vitalis dulcis,
& amabilis, semperque memorialis: vbi non

erit hostis impugnans, nec vlla illecebra, sed summa, & certa securitas, secunda tranquillitas, & tranquilla iucunditas, iucunda foelicitas, foelix æternitas, æterna beatitudo, & beata Trinitas, & Trinitatis Vnitas, & Vnitatis deitas, & deitatis beata visio; quæ est gaudium Domini Dei tui.

3. O gaudium super gaudium: gaudium vincens omne gaudium, extra quod non est gaudium! Quando intrabo in te, vt videam Deum meum, qui habitat in te? Ibo illuc, & videbo visionem hanc grandem. Quid est, quod me detinet? Heu me, quia incolatus meus prolongatus est! Heu me, quam diu dicetur mihi: Vbi est Deus tuus? quam diu dicetur mihi. Expecta, reexpecta. Et nunc quæ est expectatio mea? Nonne, Domine Deus, saluatorem expectamus, Dominum nostrum Iesum Christum, qui reformabit corpus humilitatis nostræ; configuratum corpori claritatis suæ? Expectamus Dominum, quando reuertatur à nuptijs, vt inducat nos ad suas nuptias. Veni Domine, & noli tardare. Veni Domine Iesu Christe, veni,

ni, & visita nos in pace: Veni, & educ victos de carcere, vt latemur coram te corde perfecto. Veni Saluator noster. Veni desideratus cunctis gentibus, ostende faciem tuam, & salui erimus. Veni lux mea, redemptor meus; educ de carcere animam meam, ad confitendum nomini sancto tuo.

4 Quamdiu miser iactabor in fluctibus mortalitatis meæ, clamans ad te Domine, & non exaudis? Audi clamantem, Domine, de hoc mari magno, & adduc me ad portum foelicitatis æternæ. Foelices, qui de periculo maris huius educti, ad te Deum, portum tutissimum, peruenire meruerunt. O vere foelices, qui de pelago ad litus, de exilio ad patriam, de carcere ad palatium perueniunt, optata iam quiete beati; qui branium illud perpetuæ gloriæ, quod hic per multas tribulationes quæsierunt, iam foelici iucunditate adepti, lætantur in perpetuum. O vere beati, o terque quaterque beati, qui iam omnium malorum exuti, securi de sua immarciscibili gloria, ad te, regnum decoris, peruenire meruerunt. O æternum regnum, regnum.

regnum omnium sæculorum; vbi lumen indeficiens, & pax Dei, quæ exsuperat omnem sensum: In quo sanctorum animæ requiescunt, & lætitia sempiterna super capita eorum, gaudium, & exultationem obtinebunt, & fugiet dolor, & gemitus.

5 O quam gloriosum est regnum, in quo tecum, Domine, regnant omnes Sancti, amicti lumine sicut vestimento, habentes in capite suo coronam de lapide precioso! O regnum beatitudinis sempiternæ, vbi tu Domine, spes Sanctorum, & diadema gloriæ, facie ad faciem videris à Sanctis, lætificans eos vndique in pace tua, quæ exsuperat omnem sensum. Ibi gaudium infinitum, lætitia sine tristitia, salus sine dolore, via sine labore, lux sine tenebris, vita sine morte, omne bonum sine omni malo. Vbi iuuentus nunquam senescit, vbi vita terminum nescit, vbi decor nunquam pallescit, vbi amor nunquam tepescit, vbi sanitas nunquam marcescit, vbi gaudium nunquam decrescit, vbi dolor nunquam sentitur, vbi gemitus nunquam auditur, vbi triste nihil videtur, vbi lætitia semper habetur,

tur, vbi malum nullum timetur, quoniam ibi summum bonum possidetur, quod est videre, semper faciem Domini virtutum.

6 Fœlices igitur, qui de naufraga vita præsentî, ad tanta gaudia iam peruenire meruerunt. Infœlices heu nos miseri, qui per huius maris magni fluctus procellosasque voragines nauem trahimus; ignorantes an ad portum salutis peruenire valeamus. Infœlices inquam, quorum vita est in exilio, vita in periculo: finis in dubio, nescientes finem nostrum: quia omnia in futurum reseruantur incerta. Adhuc in pelagi fluctibus versamur, suspirantes ad te portum maris. O patria nostra, patria secura, à longe te videmus, ab hoc mari te salutamus, ab hac valle ad te suspiramus, & nitimur cum lachrymis, si quomodo ad te perueniamus.

7 Spes humani generis Christe, Deus de Deo, refugium nostrum, & virtus, cuius lumen à longe inter caliginosas nebulas super maris procellas, quasi stellæ maris radius oculos nostros irradiat, vt dirigamur ad te portum: Guberna Domine nauem nostram
tua

tua dextra clauo crucis tuæ, ne pereamus in fluctibus ne nos demergat tempestas aquæ, ne absorbeat nos profundum: sed vnco crucis retrahere nos ab hoc pelago, ad te solamen vnicum nostrum, quem à longe, quasi stellam matutinā, & Solem iustitiæ, vix lachrymantibus oculis in lictore cælestis patriæ nos expectantem videmus.

8 En ad te clamamus redempti tui; sed & nunc exules tui, quos precioso sanguine redemisti. Exaudi nos Deus salutaris noster, spes omnium finium terræ, & in mari longe. In mari turbulento versamur. Tu in lictore stans, aspicias pericula nostra: saluos nos fac propter nomen tuum. Da nobis Domine inter scyllam, & charybdim ita tendere, & tenere medium, vt vtroque periculo euitato, salua naue, & mercibus, securi perueniamus ad portum.

* * *
* * *
*

CAPVT XXXVI.

De gl'ia celestis patrie.

CUm ergo peruenerimus ad te sapien-
 tia fontem, ad te lumen indeficiēs,
 ad te lucem inextinguibilem: vt te non iam
 per speculum in ænigmate, sed facie ad faciē
 videamus; tunc satiabitur in bonis, desideriu
 nostrum: quia nihil erit exterius quod deside-
 retur, nisi tu Domine summum bonum; qui
 eris præmium beatorum, & diadema decoris
 eorum, & lætitia sempiterna super capita
 eorum; pacificans eos intus, & extra, in pa-
 ce tua, quæ exsuperat omnem sensum. Ibi vi-
 debimus, amabimus, & laudabimus. Vide-
 bimus in lumine tuo lumen tuum, quoniam
 apud te est fons vitæ, & in lumine tuo vide-
 bimus lumen. Quale autem lumen? Lumen
 immensum, lumen incorporeum, incorru-
 ptibile, incomprehensibile: lumen indeficiēs,
 lumen inextinguibile, lumen inaccessibile,
 lumen increatum, lumen veridicum, lumen
 diuinum; quod illuminat oculos Angelorum;
 quod

quod latificat iuuentutem Sanctorum; quod est lumen luminum, & fons vitæ; quod es tu, Domine Deus meus.

2 Tu es quippe lumen, in cuius lumine videbimus lumen, te scilicet in te, in splendore vultus tui, quando te videbimus facie ad faciem. Quid est videre facie ad faciem, nisi quod ait Apostolus: Cognoscere sicut, & cognitus sum: cognoscere veritatem tuam, & gloriam tuam? Hoc est cognoscere faciem tuam, cognoscere Patris potentiam, Filij sapientiam, Spiritus sancti clementiam, ipsius summæ Trinitatis vnā, & indiuiduam essentiam. Videre enim faciem Dei viui, hoc est summum bonum, gaudium Angelorum, atque omnium Sanctorum, præmium vitæ æternæ, gloria spirituum, lætitia sempiterna, corona decoris, brauium felicitatis, requies opulenta, pulchritudo pacis, intimum, & externum gaudium, paradysus Dei: Hierusalem cœlestis, vita beata, plenitudo beatitudinis, gaudium æternitatis; pax Dei, quæ exsuperat omnem sensum.

3 Hæc est plena beatitudo, & tota glorificatio

rificatio hominis, videre faciem Dei sui, videre eum, qui fecit cælum, & terram, videre eum, qui fecit eum, qui saluauit eum, & qui glorificauit eum. Videbit eum cognoscendo, amabit diligendo, laudabit possidendo. Ipse enim erit hæreditas populi sui, populi Sanctorum, populi quem redemit. Ipse possessio felicitatis eorum, ipse præmium, & merces expectationis. Ero, inquit, merces tua magna nimis, magnum enim magna decent. Vere, Domine Deus meus, magnus es tu nimis super omnes Deos, & merces tua magna nimis. Neque enim magnus es tu, & parua merces tua: sed vt magnus es tu, ita magna merces tua: quoniam non aliud es tu, & aliud merces tua. Sed tu ipse magnus nimis: tu ipse merces magna nimis: tu ipse coronator es, & corona: tu ipse promissor es, & promissio. Tu remunerator, & munus: tu præmiator, & præmium felicitatis æternæ.

4. Tu ergo coronator es, & corona, Deus meus, & diadema spei meæ, quæ ornata est gloria: lumen lætificans, lux renouans, decor adornans: spes mea magna, desiderium cordis.

cordis Sanctorum, & desideratus eorum. Visio ergo tua tota merces est, totum præmiū, & totum gaudium, quod expectamus. Hæc est enim vita æterna, hæc est, inquam, sapientia tua. Hæc est vita æterna, vt cognoscamus te solum verum Deum, & quem misisti Iesum Christum. Cum igitur videbimus te solum Deum, Deum verum, Deum viuum, omnipotentem, simplicem, inuisibilem, in-circumscripibilem, incomprehensibilem: & Filium tuum vnigenitum, consubstantiallem, & coæternum tibi, Dominum nostrum Iesum Christum, quem pro salute nostra misisti in mundum in virtute Spiritus sancti, trinum in personis, & vnum in essentia, Deum sanctum solum, extra quem non est Deus; tunc habebimus quod nunc quærimus, vitam æternam, gloriam sempiternam, quam præparasti diligentibus te, quam abscondisti timentibus te, quam daturus es quærentibus faciem tuam semper.

5 Et tu Domine Deus meus, formator meus ex vtero matris meæ, quæ me commendauit manui tuæ, non me permittas amplius

plus ex vno distrahi in multa : sed collige me
 de exterioribus ad me, de me ad te ; vt dicat
 tibi semper cor meum, Exquisiuit te facies
 mea; faciem tuam Domine requiram, faciem
 Domini virtutum, in qua sola consistit tota
 gloria sempiterna beatorum. Quam quidem
 videre, vita æterna est, & gloria sempiterna
 Sanctorum. Lætetur ergo cor meum, vt ti-
 meat nomen tuum. Lætetur cor quærentium
 Dominum, sed multo magis cor inuenientiū.
 Si enim lætitia est in quærendo, qualis lætitia
 erit in inueniendo? Quæram ergo semper ar-
 denter, & indefinenter faciem tuam, si quan-
 do tandem aperiatur mihi ostium, & porta
 iustitiæ, vt intrem in gaudium Domini mei.
 Hæc porta Domini; iusti ingredientur per
 eam.

CAP. V. T. XXXVII.

Oratio ad sanctam Trinitatem.

O Tres cœquales, & cœternæ perso-
 næ; Deus vnus, & verus, Pater, &
 Filius, & Spiritus sanctus; qui solus habitas

S

æter-

æternitatem, & lucem inaccessibilem. Qui fundasti terram in potentia tua, & regis orbem terræ prudentia tua. Sanctus, Sanctus, Sanctus, Dominus Deus Sabaoth. Terribilis, & fortis; iustus, & misericors; admirabilis, laudabilis, amabilis. Vnus Deus, Tres personæ, vna essentia, potentia, sapientia; bonitas, vna, & indiuisa Trinitas. Aperi mihi clamanti portas iustitiæ; & ingressus in eas, confitebor tibi Domine.

2. En ad ostium tuum, summe paterfamilias, mendicus pulso. Iube aperiri pulsanti; qui dixisti: Pulsate, & aperietur. Pulsant enim ad ostium tuum, Pater misericordissime, desideria rugientium præcordiorum meorū, & clamores lachrymarum oculorum meorū. Ante te est omne desiderium meum, & gemitus meus à te non est absconditus. Et tu Domine non auertas faciem tuam amplius à me, nec declines in ira à seruo tuo. Pater misericordiarum, audi eiulatum pupilli tui, & porrige manum tuam optimam adiutricem; ut retrahat me de profundis aquarum, & de lacu miseriæ, & de luto facis, ne peream vidente.

dente misericordia oculorum tuorum, aspiciente clementia viscerum tuorum, sed eundam ad te Dominum Deum meum; ut videam diuitias regni tui, & intuear faciem tuam semper, & laudem dicam nomini tuo sancto. Domine, qui facis mirabilia; qui cor meum letum facis memoria tui; qui illuminas iuuentutem meam: ne despicias senectutem meam, sed iubilare facias ossa mea,

& reuiuiscere facias;

ut

Aquilæ canos

meos.

Soliloquiorum finis.

MANUALE DIVI AVGVSTINI SEV LIBELLVS

*De Contemplatione Christi, siue de Verbo Dei,
quo sopita cœlestis desiderij memoria
renouetur.*

P R Æ F A T I O.



Voniam in medio laqueorum positi sumus, facile à cœlesti desiderio frigeſcimus. Quapropter afſiduo indigemus muni-mento, vt expergeſciti ad Deum noſtrum, verum, & ſummum bonum, cum deſluimus, recurramus. Idcirco non præſumptionis temeritate, ſed magna Dei dilectione, huic opusculo ad laudem eius operam dedi; vt ex elegantioribus dictis ſanctorum Patrum, breue, & manuale verbum de Deo meo mecum

cum semper haberem: ex cuius lectionis igne, quoties te pefco, in eius accendar amorem. Nunc adesto mihi Deus meus, quem quæro, quem diligo, quem corde, & ore, & qua valeo virtute, laudo atque adoro.

2 Mens mea deuota tibi, tui amore accensa, tibi spirans, tibi inhians, te solum videre desiderans: nihil habet dulce nisi de te loqui, de te audire, de te scribere, de te conferre, tuam gloriam frequenter sub corde reuoluere: vt tui suauis memoria sit inter hos turbines aliqua repausatio mea. Te ergo inuoco, desideratissime, ad te clamo clamore magno in toto corde meo. Et cum te inuoco, vtique in me ipso inuoco. Quoniam omnino non essem, nisi tu esses in me: & nisi ego essem in te, non esses in me. In me es, quoniam in memoria mea manes: ex ea cognoui te, & in ea inuenio te, cum reminiscor tui, & delector in te, ex quo omnia, per quem omnia, & in quo omnia.

CAPVT PRIMVM.

De mirabili essentia Dei.

TV, Domine, cœlum, & terram im-
 ples, omnia portans, sine onere,
 omnia implens, sine inclusione. Semper
 agens, semper quietus. Colligens, & non
 egens. Quærens, cum nihil desit tibi.
 Amans, nec astuans: zelans, & securus es.
 Poenitet te, & non doles: Irasceris, & tran-
 quillus es. Opera mutas, sed non mutas con-
 silium. Recipis quod inuenis, & nunquam
 amisisti. Nunquam inops, & gaudes lucris.
 Nunquam avarus, & vsuras exigis. Super-
 erogas, cui non debes: vel semper supero-
 gatur tibi, vt debeas.

2. Ecquis habet quicquam non tuum?
 Reddis debita, nulli debens. Donas debi-
 ta, nihil perdens. Qui vbique es, & vbique
 totus. Qui sentiri potes, & videri non potes.
 Qui nusquam dees, & tamen ab iniquorum
 cogitationibus longe es: Qui nec ibi dees,
 vbi longe es: quia vbi non es per gratiam,
 ades.

ades per vindictam. Qui vbique præsens es, & vix inueniri potes. Quem stantem sequimur, & apprehendere non valemus. Qui tenes omnia, imples omnia, circumplecteris omnia, superexcedis omnia, sustines omnia.

3 Qui corda fidelium doces sine strepitu verborum. Qui locis non distenderis, nec temporibus variaris, nec habes accessus, & recessus: qui habitas lucem inaccessibilem, quam nullus hominum vidit, nec videre potest. In te manens quietus vbique circuis totum. Non enim scindi, & diuidi potes, quia vere vnus es: nec in partes efficeris, sed totus totum tenes, totum imples, totum illustras, & possides.

C A P V T I I.

De indicibili scientia Dei.

SI totum mundum libri repleant, tua scientia inenarrabilis nō potest enarrari. Quoniam vero indicibilis es, nullo modo scribi poteris, nec concludi. Tu es fons

lucis diuinæ, & Sol claritatis æternæ. Magnus es sine quantitate, & ideo immensus. Bonus sine qualitate, & ideo vere, & summe bonus, & nemo bonus, nisi tu solus. Cuius voluntas, opus est: cuius velle, posse est. Qui omnia quæ ex nihilo creasti, sola voluntate fecisti. Qui omnem creaturam tuam absque indigentia aliqua possides, & sine labore gubernas, & absque tædio regis, & nihil est quod conturbet ordinem imperij tui, vel in summis, vel in imis.

2 Qui in omnibus locis sine loco habetis; & omnia continet sine ambitu, & ubique præsens es sine situ, & motu. Qui nec mali auctor es, quod facere non potes. Qui nihil non potes, nec vnquam quicquam te fecisse poenituit. Cuius bonitate facti sumus, & iustitia poenas luimus, & clemencia liberamur. Cuius omnipotentia omnia gubernat, regit, & implet, quæ creauit. Nec ideo te implere omnia dicimus, vt te contineant; sed ipsa potius à te continentur. Nec particulatim imples omnia, nec vllatenus ita putandum est, vt vnaquæque res pro magnitudine

dine suæ portionis capiat te: id est maxima
 maius, minima minus; dum sis potius ipse
 totus in omnibus, & omnia in te. Cuius om-
 nipotentia omnia concludit, nec euadendi
 potentiam tuam, quis aditum inuenire pote-
 rit. Qui enim te non habet placatum, ne-
 quaquam euadet iratum.

CAPVT III.

De desiderio animæ sentientis Deum.

TE igitur clementissime Deus inuoco
 in animam meam, quam præparas
 ad capiendum te ex desiderio, quod inspiras
 ei. Intra, rogo, in eam, & coapta eam tibi,
 vt possideas illam, quam fecisti, & refecisti;
 vt habeam te velut signaculum super cor
 meum. Quæso pijsime, inuocantem te non
 deferas; quia priusquam te inuocarem, me
 vocasti, & quæsiisti: vt ego seruus tuus te quæ-
 rerem, quærendo inuenirem, & inuentum
 amarem. Quæsiui, & inueni te Domine, &
 amare desidero. Auge desiderium meum, &
 da quod peto; quoniam si cuncta, quæ feci-
 sti

ſti mihi dederis, non ſufficit ſeruo tuo, niſi teipſum dederis. Da ergo teipſum mihi: Deus meus redde te mihi. En amo te, & ſi parum eſt, amem validius. Tui ergo amore teneor, tui deſiderio flagro, tui dulci memoria delector.

2 Ecce, dum tibi mens mea ſuſpirat, & tuam ineffabilem pietatem meditatur, ipſa carnis ſarcina minus grauat, cogitationum tumultus ceſſat, pondus mortalitatis, & miſeriarum more ſolito non hebetat; ſilent cuncta, tranquilla ſunt omnia. Cor ardet, animus gaudet, memoria viget, intellectus lu-
cet, & totus ſpiritus, ex deſiderio viſionis tuæ accenſus, inuiſibilem amore rapi ſe videt. Aſſumat ſpiritus meus pennas, vt Aquilæ; volet, & non deficiat: volet, & perueniat uſque ad decorem domus tuæ, & thronum gloriæ tuæ; & ibi ſuper menſam reſectionis ciuium ſupernorum paſcatur de occultis tuis, in loco paſcuæ iuxta fluentia pleniffima. Tu eſto exultatio noſtra, qui eſ ſpes noſtra, ſalus atque redemptio. Tu eſto noſtrum gaudium, qui eſ futurus præmium. Te ſemper
quærat

quærat anima mea: & tu præsta, vt quærendo non deficiat.

C A P V T I V.

De miseria animæ, quæ Dominum nostrum Iesum Christum non amat, nec quærit.

VÆ miserae animæ, quæ Christum non quærit, nec amat, arida manet, & misera. Perdit quod viuit, qui te Deum non diligit. Qui curat viuere non propter te, Domine, nihil est, & pro nihilo est. Qui tibi viuere recusat, mortuus est. Qui tibi non sapit, desipit. Misericordissime, tibi me commendo, reddo, & concedo; per quem sum, viuo, & sapio: in te confido, spero, & totam spem meam pono, per quem resurgam, viuam, & requiescam. Te cupio, diligo, adoro: cum quo manebo, regnabo, & beatus ero. Anima quæ te non quærit, nec diligit, mundum diligit, peccatis seruit, & vitijs subiecta est: nunquam quieta, nunquam securæ est. Famuletur tibi semper mens mea, pijsime. Suspiret tibi semper peregrinatio mea:

mea: ardeat in amore tui cor meum.

2 Requiescat in te, Deus meus, anima mea: contempletur te in mentis excessu: cantem laudes tuas in iubilatione: & hæc sit in hoc exilio meo consolatio mea. Confugiat mens mea sub vmbra alarum tuarum, ab ædibus cogitationum sæculi huius. Repauset in te cor meum, cor, mare magnum tumens fluctibus. O diues omnium bonarum dapū, supernæ satietatis opulentissimæ largitor, Deus; da lasso cibum, collige dispersum, libera captiuum, & reintegra scissum. Enstat ad ostium, & pulsat. Obsecro per viscera misericordiæ tuæ, quibus visitasti nos oriēs ex alto, iube pulsanti misero aperiri, vt liberis gressibus ingreditur ad te, & requiescat in te, & reficiatur de te pane cœlesti. Tu enim es panis, & fons vitæ: tu lumen claritatis æternæ: tu omnia ex quibus viuunt re-
cti, qui diligunt te.



CAPVTV.

De desiderio animæ.

DEVS, lumen cordium te videntium,
 & vita animarum te amantium, &
 virtus cogitationum te quærentium: da vt
 sancto tui amoris inhæream. Veni, rogo, in
 cor meum, & ab vbertate voluptatis tuæ inebria
 illud, vt obliuiscar ista temporalia. Pudet,
 ac piget me talia pati, qualia mundus
 iste agit. Triste est mihi, quod video, graue
 est omne, quod de transitorijs audio. Adiuua
 me Domine Deus meus, & da lætitiā in corde
 meo: veni ad me, vt videam te. Sed angusta
 est mihi domus animæ meæ, quousque
 venias ad eam, & dilatetur à te. Ruinosa
 est, refice eam. Habet plurima, quæ offendunt
 oculos tuos; fateor, & scio: sed quis
 mundabit eam, aut cui alteri præter te clamabo:
 Ab occultis meis munda me Domine,
 & ab alienis parce seruo tuo.
 Fac me dulcis Christe, bone Iesu, fac
 me, rogo, amore, & desiderio tui deponere
 onus.

onus carnalium desideriorum, & terrenarum concupiscentiarum. Dominetur carni anima, animæ ratio, rationi gratia tua, & tuæ me interius, & exterius subde voluntati. Tribue mihi, vt laudet te cor meum, & lingua mea, & omnia ossa mea. Dilata mentem meam, & attolle intuitum cordis mei; vt vel rapida cogitatione spiritus meus attingat te, æternam sapientiam super omnia manentem. Dissolue me, oro, à vinculis, quibus constri- ctus teneor, vt relinquens omnia ista, tibi seruiam, tibi soli inhæream, tibi soli intendam.

C A P V T V I.

*De felicitàte animæ à terreno carcere
resolutæ.*

FOELIX anima, quæ terreno resoluta carcere, libera, coelum petit; quæ te dulcissimum Dominum facie ad faciem cernit; quæ nullo metu mortis afficitur, sed de incorruptione perpetuæ gloriæ lætatur. Tranquilla est, & secura; iam non timet ho-
stem,

stem, nec mortem. Habet te pium Domi-
num, quem diu quæsiuit, semperque amauit:
hymnidicis sociata choris, melliflua perpe-
tuæ festiuitatis carmina, ad laudem gloriæ
tuæ, rex Christe, bone Iesu, in æternum con-
cinit. Inebriata enim ab vbertate domus
tuæ; & torrente voluptatis tuæ potas eam.
Fœlix societas supernorum ciuium, & glorio-
sa solemnitas omnium ad te redeuntium ab
huius nostræ peregrinationis tristi labore,
ad amœnitatem pulchritudinis, ad formosi-
tatem totius splendoris, atque dignitatem
totius elegantia; ibi te iugiter, Domine, tui
ciues cernunt. Nihil omnino, quod contur-
bet mentem, ibidem auribus datur.

2. Quæ cantica? Quæ organa? Quæ can-
tilenæ? Quæ melodia; ibi sine fine decantan-
tur? Sonant ibi semper melliflua hymnorum
organa, suauissima Angelorum melodia, can-
tica canticorum mira; quæ ad salutem, &
gloriam tuam, à supernis ciuib; decantan-
tur. Amaritudo, & omnis fellis asperitas, in
regione tua locum non habent. Non enim
est ibi malus, neque malitia. Non est aduer-
farius,

farius, & impugnans, nec est vlla peccati illecebra. Nulla est ibi indigentia, dedecus nullum, rixa nulla, nullum improperium, causatio nulla, nullus timor, nulla inquietudo, nulla pœna, nulla dubietas, nulla violentia, nulla discordia: sed est ibi pax summa, charitas plena, iubilatio, & laus Dei æterna, sine fine secunda requies, & gaudium semper in Spiritu sancto.

3 O quam fortunatus ero, si audiuerò iucundissimas ciuium tuorum cantilenas, carmina melliflua, laudes summæ Trinitati debito honore promentia! Sed, & nimium felix, si ego ipse meruerò cantare canticum Domino Iesu Christo, de dulcibus canticis Sion.

C A P V T V I I.

De gaudio Paradisi.

I **O** Vita vitalis, vita sempiterna, & sempiternæ beata! Vbi gaudium sine mœrore, requies sine labore, dignitas sine tremore, opes sine amissione, sanitas sine languo-

languore, abundantia sine defectione, vita sine morte, perpetuitas sine corruptione, beatitudo sine calamitate: vbi omnia bona in charitate perfecta: vbi species, & visio facie ad faciem: vbi plena scientia in omnibus, & per omnia; vbi summa Dei bonitas cernitur; & lumen illuminans à Sanctis glorificatur; vbi præsens maiestas Dei conspicitur: & hoc vitæ cibo, sine defectu, mens intuentium satiatur; vident semper, & videre desiderant; sine anxietate desiderant, & sine fastidio satiantur.

2 Vbi verus Sol iustitiæ mira suæ pulchritudinis visione omnes reficit: & ita vniuersos cœlestis patriæ ciues illuminat, vt luceant ipsi: lumen videlicet illuminatum per diuinum lumen, illuminans vltra omnem Solis nostri splendorem, atque cunctarum stellarum claritatē: Immortali adhærentes Deitati, ac per hoc immortales, & incorruptibiles facti, iuxta promissionem Domini Saluatoris; Pater, quos dedisti mihi, volo vt vbi ego sum, & illi sint mecum, vt videant claritatem meam; vt omnes vnum sint, sicut tu

Pater in me, & ego in te, & ipsi in nobis
vnum sint.

C A P V T V I I I

De Regno celorum.

Regnum cœlorum, regnum felicissi-
mum, regnum carens morte, &
vacans fine; cui nulla tempora succedunt per
æuum. Vbi continuus sine nocte dies, nescit
habere tempus; vbi victor miles post laborẽ,
donis ineffabilibus cumulatur, nobile perpe-
tua caput amplectente corona.

2 Vtinam remissa peccatorum mole me
vltimum seruorum Christi, iuberet diuina pie-
tas hanc carnis sarcinam deponere; vt in suæ
ciuitatis gaudia æterna repausandus transi-
rem, sanctissimis supernorum choris interes-
sem, cum beatissimis spiritibus gloriæ con-
ditoris assisterem, præsentem Dei vultum
cernerem, nullo mortis metu tangerer, de
perpetuæ immortalitatis incorruptione se-
curus gauderem, & scienti omnia coniunctus
omnem ignorantia cæcitatem amitterem :
terrena.

terrena cuncta paruipenderem, conuallem
lachrymarum istam intueri, vel reminisci vl-
terius non dignarer; vbi vita laboriosa, vita
corruptibilis, vita omni amaritudine ple-
na, vita domina malorum, ancilla in-
fernorum.

3 Quam humores tumidant, dolores ex-
tenuant, ardores exsiccant, aëra morbidant,
escæ inflant, ieiunia macerant, ioci soluunt,
tristitiæ consumunt, sollicitudo coarctat, se-
curitas hebetat, diuitiæ iactant, paupertas
deijcit, iuuentus extollit, senectus incuruat,
infirmetas frangit, moeror deprimit; diabolus
insidiatur, mundus adulatur, caro delecta-
tur; anima excæcatur, totus homo contur-
batur. Et his tot, & tantis malis mors furi-
bunda succedit; vanisque gaudijs ita finem
imponit, vt cum esse desierint, nec fuisse
putentur.

C A P V T I X.

*Quomodo post nimios ploratus mœstam animam
consolatur Deus.*

SED quas laudes, quasue gratiarum
actiones, tibi referre valeamus, Deus
noster; qui nos etiam inter has tantas morta-
litis nostræ ærumnas non desinas consolari
mira visitatione gratiæ tuæ? Ecce me mise-
rum multis mœroribus plenum, dum vitæ
meæ finem timeo, dum peccata mea consi-
dero, dum iudicium tuum formido, dum mor-
tis horam cogito, dum supplicia tartari hor-
reo; dum opera mea, qua districtione, &
discussione à te pensentur, ignoro, dum
quo fine illa clausurus sim, penitus ne-
scio.

2. Cumque hæc, & alia multa mecum
sub corde retracto, consolaturus ades solita
pietate Domine Deus, & inter has querelas
nimiosque ploratus, ac profunda cordis su-
spira assumis mœstam, & anxiam mentem
super alta iuga montium, ad areolas vsque
aro-

aromatum, & collocas me in loco pascuæ,
 secus riuulos dulcium aquarum; vbi præpa-
 ras in conspectu meo mensam multiplicis
 apparatus, quæ fatigatum spiritum repauset,
 & cor triste lætificet: quibus tandem refocil-
 latus delicijs, multarum miseriarum mearum
 oblitus, leuatus super altitudinem terræ, in-
 te; vera pace, quiesco.

C A P V T X.

De dulcedine diuini amoris.

I **A**Mo te Deus meus, amo te, & ma-
 gis, atque magis amare volo. Da
 mihi Domine Deus meus, speciose præ filijs
 hominum, vt desiderem te, vt amem te quan-
 tum volo, & quantum debeo. Imensus es,
 & sine mensura debes amari; præsertim à no-
 bis, quos sic amasti, sic saluasti, pro quibus
 tanta, & talia fecisti.

2 O amor, qui semper ardes, & nun-
 quam extingueris! dulcis Christe, bone Iesu,
 charitas Deus meus; accende me totum igne
 tuo, amore tui, dulcedine tua, dilectione
 T 3 tui,

tui, desiderio tui, charitate tua, iucunditate, & exultatione tua, pietate, & suauitate tua, voluptate, & concupiscentia tui; quæ sancta est, & bona, quæ casta est, & munda; vt totus dulcedine amoris tui plenus, tota flamma tuæ charitatis vaporatus, diligam te, Dominum meum dulcissimum, & pulcherrimum, ex toto corde meo, ex tota anima mea, ex totis viribus meis, & ex omni intentione mea; cum multa cordis contritione, & lachrymarum fonte: cum multa reuerentia, & tremore: habens te in corde, & in ore, & præ oculis meis semper, & vbique; ita vt nullus in me adulterinis amoribus pateat locus.

C A P V T X I.

De preparatione nostræ redemptionis.

PUlcherrime Iesu Christe, rogo te, per illam sacratissimam effusionem pretiosi sanguinis tui, quo redempti sumus, da mihi cordis contritionem, & lachrymarum fontem, præcipue dum preces, & orationes tibi offero. Dum tuæ laudis tibi psalmodiam decanto.

decanto. Dum myſterium noſtræ redemptionis, manifeſtum miſericordiæ tuæ iudicium, reſcolo, vel profero. Dum ſacris altaribus, licet indignus, aſſiſto: cupiens tibi offerre illud mirabile, & cœleſte ſacrificium, omni reuerentia, & deuotione dignum; quod tu, Domine Deus meus, ſacerdos immaculate, inſtituiſti, & offerre præcepſti in commemorationem tuæ charitatis: mortis ſcilicet, & paſſionis pro ſalute noſtra, pro quotidiana noſtræ fragilitatis reparatione.

2. Confirmetur mens mea, inter tantâ myſteria, dulcedine præſentiæ tuæ; ſentiat te ſibi adeſſe, & lætetur coram te, ignis, qui ſemper lucet, amor, qui ſemper ardet; dulcis Chriſte, bone Ieſu, lumen æternum, & indeficiens: panis vitæ, qui nos reficis, & in te non deficis; quotidie comederis, & ſemper integer manes: reſplende mihi, accende me, illumina, & ſanctifica vas tuū, de malitia euacua, imple de gratia, & plenū conſerua; vt ad ſalutē animæ meæ manducem cibū carnis tuæ: quatenus māducando te, viuam de te, viuam per te, perueniā ad te, & repauſem in te.

C A P V T X I I .

De Gaudio.

1 **O** Dulcedo amoris, & amor dulcedinis; comedat te venter meus, & nestare tui amoris repleantur viscera mea, & eructet mens mea verbum bonum. Charitas Deus meus, mel dulce, lac niueum, cibus, & gaudium, fac me crescere in te; vt sano palato possis manducari à me. Tu es vita mea, qua viuo; spes cui inhæreo; gloria, quam adipisci desidero. Tu mihi cor tene, mentem rege, intellectum dirige, amorem erige, animum suspende, & in superna fluentia os fientis te spiritus trahe.

2 Taceat, quæso, tumultus carnis; conticescant phantasiæ terrarum, & aquarum, aëris, & poli. Taceant somnia, & imaginariæ reuelationes: omnis lingua, omne signû, & quicquid transeundo fit. Sileat sibi, & ipsa anima, & transeat se, non cogitando se, sed te Deus meus: quoniam tu es reuera tota spes, & fiducia mea. Est enim in te Deo, &
Domino.

Domino nostro Iesu Christo, dulcissimo, & benignissimo, atque clementissimo, vniuscuiusque nostrum, & portio, & sanguis, & caro. Vbi ergo portio mea regnat, ibi regnare me credo. Vbi sanguis meus dominatur, ibi dominari me confido. Vbi caro mea glorificatur, ibi gloriosum me esse cognosco. Quamuis peccator sim, de hac tamen communione gratiæ non diffido: Et si peccata mea prohibent, substantia mea requirit. Et si delicta propria me excludunt, naturæ communio non repellit.

CAPVT XIII.

*Quod Verbum incarnatum sit causa spei
nostræ.*

NON enim tam inimicus est Dominus, vt non diligat carnem suam, membra sua, & viscera sua. Desperare utique potuissẽm propter nimia peccata mea, & vitia, culpas, & infinitas negligentias meas, quas egi, & quotidie indefinenter ago, corde, ore, & opere, & omnibus modis,

dis, quibus humana fragilitas peccare potest; nisi Verbum tuum, Deus meus, caro fieret, & habitaret in nobis.

2 Sed desperare iam non audeo, quoniam subditus ille tibi, usque ad mortem, mortem autem crucis, tulit chirographum peccatorum nostrorum, & affigens illud cruci, peccatum crucifixit, & mortem. In ipso autem securus respiro, qui sedet ad dexteram tuam, & interpellat pro nobis. In ipso confisus, ad te peruenire desidero, in quo iam resurreximus, & reuiximus, iam in cœlum conscendimus, & in cœlestibus confidemus. Tibi laus, tibi gloria, tibi honor, tibi gratiarum actio.

C A P V T X I V.

*Quod quanto maior sit de Deo meditatio,
tanto sit, & dulcior.*

1 **P**ijssime Domine, qui sic nos amasti, & saluasti, sic viuificasti, & sublimasti: Pijssime Domine, quam dulcis est memoria tui! Quantò magis in te meditor, tanto es mihi

mihi dulcior, & amabilior. Idcirco delectant me valde bona tua puro mentis intuitu, & dulcissimo pij amoris affectu, in loco peregrinationis meæ, iuxta modulum meum. Interim quamdiu his fragilibus subsisto membris, miram tui dilectionem, & pulchritudinem indefinenter cupio desiderare, & considerare: tuæ enim charitatis iaculo vulneratus sum: tui vehementer desiderio flagro; ad te pervenire cupio, te videre desidero. Idcirco super custodiam meam stabo, & vigilantibus oculis psallam spiritu, psallam, & mente; & totis viribus meis te, factorem, & refectorem mei, collaudabo. Polum penetrabo mente, & desiderio tecum ero; vt in præseti quidem miseria solo corpore tenear: tecum autem cogitatione, & auditate, atque omni desiderio sim semper; quatenus ibi sit cor meum, vbi tu es, thesaurus meus desiderabilis, incomparabilis, multumque amabilis.

2. Sed ecce, Deus meus pijssime, ac misericordissime, dum tuæ immensæ bonitatis, & pietatis gloriam considerare volo, cor meum.

meum non sufficit: excedit enim omnem sensum humanæ mentis tuum decus, tua pulchritudo, tua virtus, tua gloria, tua magnificentia, tua maiestas, & tua charitas. Sicut inestimabilis est tuæ gloriæ splendor, ita ineffabilis est æternæ tuæ charitatis benignitas; qua illos, quos de nihilo creasti, adoptas in filios, & tibi coniungis.

C A P V T X V.

*Quod desiderandæ sint pro Christo tribulationes
in hac vita.*

I **O** Anima mea, si quotidie oporteret nos tormenta perferre; si ipsam gehennam longo tempore tolerare, ut Christum in gloria sua videre possemus, & Sanctis eius sociari; nonne dignum esset pati omne quod triste est, ut tanti boni tantæque gloriæ participes haberemur? Insidientur ergo demones, parent suas tentationes, frangant corpus ieiunia, præmant carnem vestimenta, labores grauent, vigiliæ exsiccent: clamet in me iste, inquietet me ille, vel ille; frigus

gus incuruet, conscientia murmuret, calor
 vrat, caput doleat, pectus ardeat, infletur
 stomachus, palleſcat vultus; infirmer totus;
 deficiat in dolore vita mea, & anni mei in
 gemitibus; ingrediatur putredo in oſſa mea,
 & ſubter me ſcateat: vt requieſcam in die tri-
 bulationis, & aſcendam ad populum accin-
 ctum noſtrum.

2 Quæ enim erit iuſtorum gloria? quam
 grandia Sanctorum lætitia, cum vnaquæque
 facies fulgebit vt Sol? Cum ordinibus di-
 ſtinctis, populum ſuum Dominus in regno
 Patris ſui cœperit recensere: & meritis atque
 operibus ſingulorum promiſſa præmia reſti-
 tuet; pro terrenis cœleſtia, pro temporali-
 bus ſempiterna, pro modicis magna? Re-
 uera cumulus ſœlicitatis erit, cum Dominus
 adducet ſuos Sanctos in viſionem paternæ
 gloriæ, & faciet in cœleſtibus conſidere, vt
 ſit Deus omnia in omnibus.



C A P V T X V I.

Quomodo regnum cœlorum possit acquiri.

1 **O** Foelix iucunditas, & iucunda foelicitas, Sanctos videre, cum Sanctis esse, & esse sanctum: Deum videre, & Deum habere in æternum, & ultra. Hæc sedula mente cogitemus, hæc toto desiderio desideremus, vt ad eos cito peruenire valeamus. Si quæras, quomodo istud potest fieri, vel quibus meritis, quibusue auxilijs? Audi: Res ista posita est in potestate facientis: quoniam regnum cœlorum vini patitur.

2 Regnum cœlorum, ò homo, aliud non quarit precium, nisi te ipsum: tantum valet, quantum es. Te da, & habebis illud. Quid turbaris de precio? Christus semetipsum tradidit, vt acquireret te regnum Deo Patri. Ita tu temetipsum da, vt sis regnum eius, ac non regnet peccatum in tuo mortali corpore, sed spiritus in acquisitione vitæ.

CAPV T XXVII.

Quid sit, & quid habeat Paradisus.

1 **O** Anima mea, reuertamur ad ciuitatem celestem; in qua scripti sumus, & ciues decreti. Sicut enim ciues Sanctorum, & domestici Dei, & sicut hæredes Dei, co-hæredes autem Christi, consideremus inclutam nostræ vrbis foelicitatem, in quantum considerare possibile est. Dicamus ergo cum Propheta: O quam gloriosa dicta sunt de te, ciuitas Dei: sicut lætantium omnium habitatio est in te. Fundaris enim exultatione vniuersæ terræ: Non est in te senectus, nec senectutis miseria: Non est in te mancus, nec claudus, neque gibbosus, neque deformis; dum omnes occurrunt in virum perfectum, in mensuram ætatis pulchritudinis Christi.

2 Quid hac vita beatius, vbi non est paupertatis metus, non ægritudinis imbecillitas? Nemo læditur, nemo irascitur, nemo inuidet, cupiditas nulla exardescit. Nullum tibi desiderium. Nulla honoris, aut potestatis.

tis pulsat ambitio. Nullus ibi diaboli metus, insidiæ dæmonum nullæ, terror gehennæ procul. Mors neque corporis, neque animæ: sed immortalitatis munere iucunda vita. Nulla erunt tunc mala, nusquam discordia, sed cuncta cōnvenientia, quia omnium sanctorum vna erit concordia. Pax cuncta, & lætitia continet, tranquilla sunt omnia, & quieta. Iugis splendor; non ille qui nunc est: sed tanto clarior, quanto felicior; quia ciuitas illa (vt legitur) non egebit Sole, neque Luna; sed Dominus omnipotens illuminabit eam, & lucerna eius est Agnus. Vbi Sancti fulgebunt vt stellæ, in perpetuas æternitates, & sicut splendor firmamenti, qui erudiunt multos!

3 Quapropter nox ibi nulla, nullæ tenebræ, concursus nubium nullus, nec frigoris ardorisue asperitas vlla, sed talis erit rerum temperies, quam nec oculus vidit, nec auris audiuit, nec in cor hominis adscendit, nisi illorum qui ea perfrui digni inueniuntur, quorum nomina scripta sunt in libro vitæ. Verum super hæc omnia est, consociari cho-

ris Angelorum, & Archangelorum, atque omnium coelestium virtutum, intueri Patriarchas, & prophetas, videre Apostolos atque omnes Sanctos, videre etiam parentes nostros. Gloriosa sunt hæc; sed multo gloriosius est, præsentem Dei vultum cernere, & incircumscriptum lumen videre. Superexcellens gloria erit, cum Deum videbimus in seipso, videbimus & habebimus in nobis, quem cernere finis non erit.

CAPVT XVIII.

*Quod homo non valet Deo vicem reddere,
nisi per amorem.*

A Nima insignis Dei imagine, illustris similitudine, habet in sese ex Deo, quo admoneatur semper aut stare cum eo, aut ad eum redire, si mota suis affectibus, imo defectibus, fuerit. Et non solum habet vnde respirare queat, in spe veniæ & misericordiæ, sed etiam vnde audeat aspirare ad nuptias Verbi: & cum Deo inire foedus societatis, atque cum rege Angelorum ducere suaue jugum amoris.

2 Hæc omnia facit amor, si animo exhibeat se similem Deo per voluntatem; cui similis est per naturam, diligens sicut dilecta est. Solus enim est amor, ex omnibus animæ motibus, sensibus atque affectibus, in quo potest creatura, etsi non ex æquo, respondere auctori, vel ipsi mutuam rependere vicem. Amor ubi venerit, ceteros in se omnes traducit, & captivat affectus. Amor per se sufficit, per se placet, & propter se. Ipse meritum, ipse præmium, ipse causa, ipse fructus, ipse usus. Per amorem enim coniungimur Deo.

3 Amor facit vnum spiritum de duobus. Amor facit idem velle, & idem nolle. Amor facit prius mores componere, postmodum omnia quæ adsunt, tanquam non adsint considerare: tertio vero loco, munda cordis acie, superna, & interna conspiciere, per amorem primum in sæculo bene geruntur honesta, postmodum etiam honesta sæculi despiciuntur, ad extremum etiam Dei intima conspiciuntur.

C A P V T X I X.

Quid in nobis Deus requirat sibi simile.

DEus Pater charitas est, Deus Filius dilectio est, Spiritus sanctus amor Patris, & Filij est. Hæc charitas, & hæc dilectio aliquid simile requirit in nobis; scilicet charitatem, qua velut quadam affinitate consanguinitatis, ei sociemur, & coniungamur. Amor dignitatis nescius, reuerentiam nescit. Qui amat, per se ipsum fiducialiter accedit ad Deum, familiariterque loquitur ei, nihil timens, nihil hæsitans. Perdit quod viuit, qui non diligit. Qui autem diligit, oculos suos semper habet ad Deum, quem diligit, quem desiderat; in quo meditatur, in quo delectatur, in quo pascitur, in quo impinguatur.

2 Iste talis sic deuotus, ita cantat, ita legit, & in omnibus operibus suis sic est prouidus & circumspectus, quasi Deus adsit præsens ante oculos ejus, sicut re vera adest. Ita orat, quasi sit assumptus & præsentatus

ante faciem maiestatis in excelsa throno; ubi millia millium ministrant ei, & decies centena millia adsistunt ei. Animam, quam visitat amore, expergefacit dormientem. Monet & emollit eam, & vulnerat cor ejus. Tenebrosa illuminat, clausa reſerat, frigida inflamat: mentem asperam & irascibilem & impatientem mitigat, vitia fugat: carnales affectus comprimit: mores emendat, reformat & innovat spiritum: lubricæ ætatis motus actusque leves coercet. Hæc omnia facit amor cum præſens est: cum vero abſceſſerit, ita incipit anima jacere languida, ac si caco-
bo bullienti subtraxeris ignem.

C A P V T XX.

De confidentia animæ amantis Deum.

I **M**agna res est amor, quo anima per semetipsam fiducialiter accedit ad Deum, Deo constanter inhæret, Deum familiariter percunctatur, consultatque de omni re. Anima quæ amat Deum, nil aliud potest cogitare, nil loqui; cætera contemnit, omnia fasti-

fastidit. Quicquid meditatur, quicquid loquitur, amorem sapit, amorem redolet, ita amor Dei eam sibi vindicavit. Qui vult habere notitiam Dei, amet. Frustra accedit ad legendum, ad meditandum, ad prædicandum, ad orandum, qui non amat. Amor Dei amorem animæ parit, & eam intendere sibi facit. Amat Deus, ut ametur. Cum amat, nil aliud vult quam amari, sciens, amore esse beatos, qui se amauerint.

2 Anima amans, cunctis suis renunciat affectionibus, & tota soli incumbit amor: ut possit respondere amor, in redhibendo amore. Et cum tota se effuderit in amorem, quantum est ad aliud fontis perenne profluvium? Non pari vbertate concurrunt amor & amans, anima & Deus, creator & creatura: tamen si ex toto se diligit, nihil est, ubi totum deest. Non timeat anima, quæ amat; paveat quæ non amat.

3 Anima amans fertur votis, trahitur desiderijs, dissimulat merita: maiestati oculos claudit, aperit voluptati, ponens se in salutari, & fiducialiter agens in eo. Amore

anima secedit, & excedit à corporeis sensibus: vt sese non sentiat, quæ Deum sentit. Hoc fit, cum mens, ineffabili Dei illecta dulcedine, quodammodo sese sibi furatur, immo rapitur atque elabitur à seipsa, vt Deo fruatur ad iucunditatem. Nihil tam iucundum, nisi esset tam modicum. Amor dat familiaritatem Dei, familiaritas ausum, ausu gustum, gustus, famem. Anima, quam tangit amor Dei, nihil aliud potest cogitare, nil desiderare; sed fréquenter suspirat, dicens: Sicut ceruus desiderat ad fontes aquarum, ita desiderat anima mea ad te, Deus meus.

C A P V T X X I.

Quid fecit Deus propter hominem.

I DEUS amore venit ad homines, venit in homines, factus est homo. Amore Deus inuisibilis, seruis suis factus est similis. Amore vulneratus est propter delicta nostra. Tuta & firma requies est infirmis & peccatoribus, in vulneribus Saluatoris. Securus illic habito, patent mihi viscera per vulnera.

Quic-

Quicquid ex me mihi deest, vsurpo mihi ex visceribus Domini mei: quoniam misericordiæ affluunt, nec desunt foramina per quæ affluant; per foramina corporis, patent mihi arcana cordis. Patet magnum pietatis sacramentum. Patent viscera misericordiæ Dei nostri, in quibus visitauit nos oriens ex alto.

2 Vulnera Iesu Christi plena sunt misericordia, plena pietate, plena dulcedine, & charitate. Foderunt manus eius, & pedes eius, & latus eius lancea perforauerunt. Per has rimas licet mihi gustare, quam suavis est Dominus Deus meus, quoniam reuera suavis & mitis, & multæ misericordiæ est omnibus eū inuocantibus in veritate, omnibus inquiringibus, & maxime diligentibus. Copiosa redemptio data est nobis in vulneribus Iesu Christi Saluatoris nostri. Magna multitudo dulcedinis, plenitudo gratiæ, & perfectio virtutum.

C A P V T XXII.

*De recordatione vulnerum Iesu Christi**Domini nostri.*

1 **C**Um me pulsat aliqua turpis cogitatio, recurro ad vulnera Christi. Cum me premit caro mea, recordatione vulnerum Domini mei, resurgo. Cum diabolus mihi parat insidias, fugio ad viscera misericordiae Domini mei, & recedit à me. Si ardor libidinis moueat membra mea, recordatione vulnerum Domini nostri Filij Dei extinguitur. In omnibus aduersitatibus non inueni tam efficax remedium, quam vulnera Christi. In illis dormio securus, & requiesco intrepidus.

2 Christus mortuus est pro nobis. Nihil tam ad mortem amarum, quod morte Christi non sanetur. Tota spes mea est in morte Domini mei. Mors ejus, meritum meum & refugium meum, salus, vita, & resurrectio mea: meritum meum, miseratio Domini. Non sum meriti inops, quamdiu ille misera-

tio-

tionum Dominus non defuerit. Et si misericordiae Domini multae, multus ego sum in meritis. Quanto ille potentior est ad salvandum, tanto ego sum securior.

C A P V T XXIII.

Quod recordatio vulnerum Christi est efficax remedium contra omnes aduersitates.

PECCAUI peccatum grande, & multorum sum mihi conscius delictorum. Nec sic despero, quoniam ubi abundauerunt delicta, superabundauit & gratia. Qui de venia peccatorum suorum desperat, negat Deum esse misericordem. Magnam iniuriam Deo facit, qui de eius misericordia diffidit. Quantum in se est, negat Deum habere charitatem, veritatem & potestatem, in quibus tota spes mea consistit: scilicet in charitate adoptionis, in veritate promissionis, & in potestate redemptionis. Murmuret iam quantum voluerit, insipiens cogitatio mea, dicens: Quis enim es tu? & quanta est gloria illa,

illa, quibusue meritis illam obtinere speras?
Et ego fiducialiter respondebo: Scio cui credidi; quæ charitate nimia ~~anima~~ adoptauit me in filium: quia verax est in promissione, potēs in exhibitione, & licet ei facere, quod vult.

2. Non possum terreri multitudine peccatorum, si mors Domini in mentem meam venerit; quoniam peccata mea illum vincere non possunt. Clauis & lancea clamant mihi, quod vere reconciliatus sum Christo, si eum amauero. Longinus aperuit mihi latus Christi lancea, & ego intraui, & ibi requiesco securus. Qui timet, amet: quoniam charitas foras mittit timorem. Nullum tam potens est, & tam efficax contra ardorem libidinis medicamentum, quam mors Redemptoris mei. Extendit brachia sua in cruce, & expandit manus suas, paratus in amplexus peccatorum. inter brachia Saluatoris mei & viuere volo, & mori cupio. Ibi securus decantabo: Exaltabo te Domine, quoniam suscepisti me, nec delectasti inimicos meos super me. Saluator noster caput inclinauit in morte, vt oscula daret suis dilectis. Toties Deum
oscu-

osculamur, quoties in eius amore compungimur.

C A P V T XXIV.

Meditatio anime ad amorem Christi.

O Anima mea, insignita Dei imagine, redempta Christi sanguine, desponsata fide, dotata spiritu, ornata virtutibus, deputata cum Angelis! Dilige illum, à quo tantum dilecta es. Intende illi, qui intendit tibi. Quære quærentem te. Ama amatorem tui, à quo amaris: cuius amore præuenta es, qui est causa amoris tui. Ipse est meritum, ipse præmium, ipse fructus, ipse vsus, ipse finis. Esto sollicita cum sollicito, cum vacante vacans, cum mundo munda, cum sancto sancta. Qualis apparuerit Deo, talis oportet vt appareat tibi Deus: suavis & mitis, & multæ misericordiæ, suaues, mites, dulces, humiles & misericordes requirit. Ama illum, qui eduxit te de lacu miseriæ, & de luto facis.

2 Elige illum amicum tuum præ omnibus amicis tuis, qui, cum omnia subtrahenda
fue-

fuerunt, solus tibi fidem seruabit. In die sepulturae tuae, cum omnes amici tui recedent à te, ille te non derelinquet: sed tuebitur à rugientibus præparatis ad escam, & conducet te per ignotam regionem, atque perducet ad plateas supernae Sion, & ibi collocabit te cum Angelis ante faciem maiestatis suae, vbi audies illud Angelicum melos: Sanctus, Sanctus, Sanctus, &c. Ibi est canticum lætitiæ, vox exultationis & salutis, & gratiarum actionis, & vox laudis, atque Alleluia in perpetuum. Ibi est cumulus fœlicitatis, supereminens gloria, superabundans lætitia, & omnia bona.

3 O anima mea, suspira ardentem, desideria vehementer; vt possis peruenire in illam supernam ciuitatem, de qua tam gloriosa dicta sunt: in qua, sicut lætantium omnium habitatio est. Amore potes ascendere. Amanti nihil est difficile, nihil impossibile. Anima quæ amat, ascendit frequenter, & currit familiariter per plateas cœlestis Hierusalem: visitando Patriarchas & prophetas, salutando Apostolos, admirando exercitus Martyrum

rum & Confessorum, chorosque Virginum
speculando. Cœlum, & terra, & omnia quæ
in eis sunt, non cessant mihi dicere, vt amem
Dominum Deum meum.

C A P V T X X V.

*Nihil potest animæ sufficere præter summum
bonum.*

I **C**Or humanum in desiderio æternita-
tis non fixum, nunquam stabile po-
test esse; sed omni volubilitate volubilius, de
alio in aliud transit, quærens requiem vbi non
est. In his autem caducis & transitorijs, in
quibus eius affectus captiui tenentur, veram
requiem inuenire non valet, quoniam tantæ
est dignitatis, vt nullum bonum, præter sum-
mum bonum, ei sufficere possit. Tantæ est
enim libertatis, vt in aliquod vitium cogi
non possit. Propterea, vnicuique propria
voluntas est causa suæ damnationis vel salua-
tionis; & ideo nihil ditius bona volûtate Deo
offertur. Bona voluntas Deum ad nos deducit,
& nos in eum dirigit. Per bonam volun-
tatem

tatem Deum diligimus, Deum eligimus, ad Deum currimus, ad Deum peruenimus, & eum possidemus.

2. O bona voluntas, per quam ad Dei similitudinem reformamur, & ei similes effici-mur. Ita amabilis est Deo bona voluntas, vt ipse in corde habitare non velit, in quo bona voluntas non fuerit. Bona voluntas, illius summæ maiestatis Trinitatem ad se inclinat. Sapientia namque ad cognitionem veritatis illam illuminat; Charitas ad desiderium bonitatis inflamat; Paternitas in ea custodit quod creauit, ne pereat.

C A P V T X X V I.

Quid sit cognitio veritatis.

1. **Q**uid est cognitio veritatis? Primo, cognoscere teipsum; & quod esse debes, esse studeas; quod autem corrigendum est, corrigas. Deinde, cognoscere & amare creatorem tuum. Hoc enim est totum hominis bonum. Vide ergo, quam

quam ineffabilis est diuinæ charitatis erga nos dilectio. De nihilo nos creauit, & quicquid habemus donauit. Sed quia plus dileximus datum, quam datorem, creaturam quam creatorem, cecidimus in laqueum diaboli, & facti sumus eius serui. Deus verò misericordia motus, misit Filium suum quo redimeret seruos; misit etiam Spiritum sanctum, quo seruos adoptaret in filios: Filium dedit in pretium redemptionis, Spiritum sanctum in priuilegium amoris, se denique totum, seruat in hæreditatem adoptionis.

2. Ita Deus vt piissimus & misericordissimus, præ desiderio vel amore hominis, non solum sua, verum etiam & seipsum impendit; vt hominem recuperaret, non tam sibi, quam homini ipsi. Vt homines ex Deo nascerentur, primo ex ipso natus est Deus. Quis est tam durus, quem non emolliat amor Dei, sic hominem præueniens; tam inquam vehemens amor, quod homo propter hominem dignatus est fieri? Quis potest odisse hominem, cuius naturam & similitudinem videt in humanitate Dei? Reuera qui odit illum, odit Deum;

Deum ; & ita perdit , quicquid facit .

3. Deus namque propter hominem factus est homo , vt esset redemptor , qui est & creator , vt de suo redimeretur homo . Et vt familiarius diligeretur ab homine , Deus in similitudine hominis apparuit ; & vt vterque sensus hominis in ipso beatificaretur , & reficeretur oculus cordis in eius diuinitate , & oculus corporis in eius humanitate ; vt , siue ingrediens , siue egrediens , in ipso pascua inueniret natura humana condita ab ipso .

C A P V T XXVII.

Quid in nobis operetur missio Spiritus sancti.

1. **S**aluator namque noster natus est nobis , crucifixus , & mortuus est pro nobis , vt morte sua mortem nostram destrueret . Et quia botrus carnis portatus fuerat ad torcular crucis , & expressione facta fluere coeperat mustum diuinitatis ; missus est Spiritus sanctus , quo vasa cordium præparentur , & vinum nouum in vtres novos poneretur primum

num vt corda mundarentur, ne infusum pollueretur: & postea ligarentur, ne infusum amitteretur. Mundarentur à gaudio iniquitatis, ligarentur contra gaudium vanitatis. Non enim quod bonum est venire potuit, nisi prius recederet, quod malum est. Gaudium iniquitatis polluit, & gaudium vanitatis effundit. Gaudium iniquitatis reddit vas sordidum, & gaudium vanitatis facit rimosum.

2. Gaudium iniquitatis est, cum peccatum diligitur: & gaudium vanitatis est, cum transitoria amantur. Eijce ergo quod malum est, vt quod bonum est, percipere possis. Effunde amaritudinem, vt dulcedine impleri possis. Spiritus sanctus gaudium est, & amor. Eijce spiritum diaboli, & spiritum mundi huius, vt accipias spiritum Dei. Spiritus diaboli operatur gaudium iniquitatis, & spiritus mundi gaudium vanitatis. En, hæc gaudia mala sunt, quoniam alterum habet culpam, alterum occasionem culpæ. Veniet autem spiritus Dei, cum eiekti fuerint spiritus mali: & intrabit tabernaculum cordis, & operabitur gaudium bonum & amorem bonum,

X

quo

quo expellitur amor mundi, & amor peccati. Amor mundi allicit, & decipit: amor peccati polluit, & ad mortem adducit. Amor Dei mentem illuminat, conscientiam mundat, animam lætificat, & Deum demonstrat.

C A P V T XXVIII.

De operatione eius qui diligit Deum.

IN quo amor Dei est, semper cogitat quando ad Deum perueniat, quando mundum derelinquat, quando carnis corruptionem euadat, vt veram pacem inueniat: semper habet cor suum & desiderium in superna eleuatum. Quando sedet, quando ambulat, quando requiescit, vel quando aliquid agit, cor à Deo non recedit. Omnes ad amorem Dei exhortatur. omnibus amorem Dei commendat: & quam dulcis sit Dei amor, & quam malus, & quam amarus sit amor sæculi, corde, ore, & opere omnibus demonstrat.

2 Deridet huius sæculi gloriam, arguit sollicitudinem: & quam stultum sit, in ijs quæ transeunt fiduciam habere, ostendit. Miratur

tur cæcitatem hominum, qui hæc diligunt. Miratur etiam quomodo vniuersa hæc transitoria & caduca omnes non derelinquunt. Omnibus existimat dulce, quod sibi sapit; omnibus placere, quod diligit; omnibus quidem esse manifestum, quod cognoscit. Frequenter Deum suum contemplatur, & in eius contemplatione suauiter reficitur, tanto felicius, quanto frequentius. Dulce est enim semper ad considerandum, quod ad amandum & laudandum semper est suaue.

CAPV T XXIX.

De vera cordis requie.

I **R**euera hæc est vera cordis requies, cum totum in amorem Dei per desiderium figitur; nec quidquam aliud appetit, sed in eo quod tenet, foelici quadam dulcedine delectatur, delectando iucundatur. Si verò vana aliqua cogitatione, vel rerum occupatione inde aliquantulum abstractum fuerit, summa cum festinatione illuc redire festinat; exilium reputans, alibi quam ibi moram

ram facere. Nam sicut nullum est momentum, quo homo non fruatur vel utatur pietate diuina; sic nullum debet esse momentum, quo eum præsentem non habeat in memoria.

2 Idcirco non leui crimine tenetur astrictus, quisquis in oratione cum Deo loquitur, & subito abstrahitur ab eius conspectu, quasi ab oculis non videntis, nec audientis. Hoc autem fit, quando cogitationes suas malas & importunas sequitur; & aliquam vilissimam creaturam, ad quam mentis intuitus facile distrahitur, ei præfert: illam videlicet in cogitatione sæpius reuoluendo vel cogitando, quam Deum, quem assiduè debet recolere Creatorem, adorare Redemptorem, expectare Saluatorem, timere Iudicem.



CAPV T XXX.

Quidquid mentis aspectum à Deo retrahit, omnino fugiendum est, atque execrandum.

Quisquis amas mundum, tibi prospice quosit eundum.

Hæc via, qua vadis, via pessima, plenaque claudis.

Fuge igitur, ô homo, paululum occupationes tuas, & absconde te modicum à tumultuosis cogitationibus tuis. Abijce nunc onerosas curas, postpone laboriosas dissensiones, vaca aliquantulum Deo, & paululum requiesce in eo. Intra in cubiculum mentis tuæ; exclude omnia præter Deum, & quæ valent ad quærendum eum; & claso ostio quære eum.

Dic nunc totum, cor meum, dic nunc Deo:

– Quæro vultum tuum, vultum tuum, Domine, requiro.

– **E**ia nunc ergo, Domine Deus meus, tu doce cor meum, vbi & quomodo te quærât, vbi & quomodo te inueniat. Domine, si hic non es, vbi te quæram absentem? Si

-antem vbiq̃ue es, cur te non video præsen-
tem? Sed certæ habitas lucem inaccessibilem.
Sed quomodo accedam ad lucem inaccessi-
bilem? Aut quis me deducet & inducet in il-
lam, vt videam te in illa? Deinde, quibus
signis, qua facie te quæram? Nunquam te
vidi, Domine Deus meus, nunquam noui fa-
ciem tuam. Quid faciet, altissime Domine,
quid faciet iste longinquus exul tuus; Quid
faciet seruus tuus anxius amore tui, & longè
proiectus à facie tua? En anhelat videre te,
- & nimis illi abest facies tua. Accedere ad te
- desiderat, & inaccessibilis est habitatio tua.
Inuenire te cupit & nescit locum tuum. Quæ-
rere te affectat, & ignorat vultum tuum.

C A P V T XXXI.

*Quod visio Dei perdita sit propter peccatum,
& miseria inuenta sit.*

Domine, Deus meus es tu & Domi-
nus meus, & nunquam vidi te: tu me
fecisti, & refecisti & omnia bona tua mihi cō-
tulisti; & nondū vidi te, neque noui. Deniq; ad

te

te videndum factus sum, & nondum feci id; propter quod factus sum. O misera fors hominis cum hoc perdidit, ad quod factus est! O dirus, ac durus casus ille! Heu, quid perdidit, & quid inuenit? Quid abscessit, & quid remansit? Perdidit beatitudinem, ad quam factus est; & inuenit miseriam ad quam factus non est. Abscessit, sine quo nihil foelix est; & remansit, quod per se non nisi miserum est. Manducabat tunc homo panem Angelorū, quem nunc esurit: manducat nunc panem dolorem, quem tunc nesciebat.

2 O tu Domine, vsquequo? vsquequo Domine obliuisceris nos? vsquequo auertis faciem tuam à nobis? Quando respicies & exaudies nos? Quando illuminabis oculos nostros, & ostēdes nobis faciem tuam? quando restitues te nobis? Respice Domine & exaudi; & illumina nos, & ostende nobis te ipsum. Restitue te nobis, vt bene sit nobis, sine quo tam male est nobis. Miserare labores & conatus nostros ad te, qui nihil valemus sine te. Inuita nos, adiuua nos. Obsecro, Domine, ne desperem suspirando, sed respi-

rem sperando. Obsecro, Domine, amarica-
tum est cor meum sui desolatione, indulca il-
lud tua consolatione. Obsecro Domine, esu-
riens coepi quærere te, ne deferar ieiunus à
te; famelicus accessi, ne recedam impastus;
pauper veni ad diuitem, miser ad misero-
dem, ne recedam vacuus & contemptus.

3 Domine, incuruatus sum, & non pos-
sum nisi deorsum aspicere. Erige me, vt pos-
sum sursum intendere. Iniquitates meæ su-
pergressæ sunt caput meum, obuoluerunt
me, & sicut onus graue grauauerunt me. Euol-
ue me, & exonera me, ne vrgeat super me
puteus os suum. Liceat mihi suspicere lucem
tuam vel de longo vel de profundo. Doce
me quærere te, & ostende te quærenti; quia
nec quærere te possum, nisi doceas tu, nec
inuenire, nisi te ostendas. Quæram te deside-
rando, desiderem, te quærendo, inueniam
amando, amem inueniendo.



CAPVT XXXII.

De bonitate Dei.

FAteor, Domine, & gratias ago, qui creasti in me hanc imaginem tuam: vt tui memor, te cogitem, te amem. Sed sic est oblita attritione vitiorum, sic est obfusca- ta fumo peccatorum: vt non possit facere ad quod facta est, nisi tu renoues & reformes eam. Non tento, Domine, penetrare alti- tudinem tuam, quia nullatenus comparo illi intellectum meum. Desidero aliquatenus in- telligere veritatem tuam, quam credit & diligit cor meum; neque enim quæro intel- ligere vt credam, sed credo vt intelligam. Ergo, Domine, qui das fidei intellectum, dá mihi vt quantum scis expedire intelligam, quia es sicut credimus; & hoc es quod cre- dimus: quia credimus te esse aliquid, quo nihil maius aut melius cogitari possit. Quid ergo es, Domine Deus? Quo maius melius- ue nihil valet cogitari. Sed hoc quid est, nisi quod summum omnium solum existens
per

per seipsum, omnia alia fecit ex nihilo? Quicquid hoc non est, minus eo est quo nihil maius possit excogitari, sed hoc de te cogitari non potest. Quod ergo bonum deest summo bono, per quod omne bonum? Tu es itaque, iustus, verax, beatus, & quidquid melius est esse, quam non esse.

2 Verum malis quomodo parcis, si es totus & summe iustus? An quia bonitas tua est incomprehensibilis, & latet in luce inaccessiblei, quam inhabitas? Vere in altissimo & secretissimo bonitatis tuæ profundo latet fons, unde manat fluuius misericordiæ tuæ. Nam cum totus & summe iustus sis, tamen idcirco etiam malis benignus es, quia totus & summe bonus es. Minus namque bonus esses, si nulli malo esses benignus. Melior est enim qui & bonis simul & malis bonus est, quam qui bonis tantum bonus est. Et melior est qui malis & parcendo & puniendo bonus est, quam qui puniendo tantum. Ideo ergo misericors es, quia totus & summe bonus es.

CAPVT XXXIII.

De delectabili fruitione Dei.

Immensa bonitas, quæ sic omnem intellectum excedis, veniat super me misericordia illa, quæ de tanta opulentia procedit: influat in me, quæ profluit de te. Parce per clementiam, ne vlciscaris per iustitiam. Excita te nunc anima mea, & erige te & totum intellectum tuum, & cogita quantum potes, quantum & quale sit illud bonum, quod Deus est.

2 Si enim singula bona delectabilia sunt, cogita intente, quam delectabile sit illud bonum, quod continet iucunditatem omnium, & non qualem in rebus creatis sumus experti, sed tanto differentem, quanto differt à creatura Creator. Si enim est bona vita creata, quam bona est vita creatrix? Si iucunda est salus facta, quam iucunda est salus, quæ facit omnium salutem? Si amabilis est sapientia in cogitatione rerum conditarum, quam amabilis est sapientia, quæ

quæ omnia fecit & condidit ex nihilo? Denique, si multæ & magnæ sunt delectationes in rebus delectabilibus, qualis & quanta est delectatio in eo, qui ipsa delectabilia fecit? O qui hoc bono fruetur, quid illi erit, quid illi non erit? Certe quicquid voluerit illi erit, & quid noluerit, non erit. Ibi quippe illi erunt bona animæ & corporis, qualia nec oculus vidit, nec auris audiuit, nec in cor hominis ascendit.

C A P I T U L U M XXXIV

Summum bonum appetendum est.

CUr ergo per multa vagaris homuncio, quærendo bona animæ tuæ & corporis tui? Ama vnum bonum, in quo sunt omnia bona, & sufficit. Desidera simplex bonum, quod est omne bonum, & satis est. Quid enim amas caro mea? Quid desideras anima mea? Ibi est quicquid amas: Ibi est, ibi est, quicquid amatis, quicquid desideratis. Si delectat pulchritudo, fulgebunt.

bunt iusti sicut sol . Si velocitas , aut fortitudo , aut libertas corporis , cui nihil obistere poterit , erunt similes Angelis Dei ; quia feminatur corpus animale , surget corpus spirituale ; potestate vtrique , non natura .

2 Si longa aut salubris vita : ibi erit sana æternitas & æterna sanitas ; quia iusti in perpetuum viuent , & salus iustorum à Domino . Si satietas , satiabuntur cum apparuerit gloria Domini . Si ebrietas : inebriabuntur ab vbertate domus Dei . Si melodia : ibi Angeli concinent sine fine Deo . Si quælibet non immunda , sed munda voluptas : torrente voluptatis suæ potabite eos Dominus . Si sapientia , ipsa Dei sapientia ostendet eis seipsam Si amicitia : diligent Deum plusquam seipsos , & inuicem tanquam seipsos , & Deus illos , plusquam illi seipsos , quia illi illum , & se & inuicem per illum : & ille se , & illos per seipsum . Si concordia : omnibus illis erit vna voluntas ; quia nulla in illis erit , nisi Dei summa voluntas .

3 Si potestas : omnipotentes erunt suæ voluntatis , vt Deus suæ . Nam sicut Deus poterit

terit quod volet per seipsum; ita poterunt illi quod volent per illum: quia sicut illi non aliud volent, quam ille volet, ita ille volet, quicquid illi volent, & quod ille volet, non poterit non esse. Si honor & diuitiæ: Deus seruos suos bonos & fideles supra multa bona constituet: immo filij Dei & Dij vocabuntur & erunt: & vbi erit vnicus eius, ibi erunt & illi hæredes quidem Dei, cohæredes autem Christi. Si vera securitas: certe ita certi erunt, nunquam vllatenus illud bonum sibi defuturum, sicut certi erunt se non sua sponte illud amissuros, nec dilectorem Deum illud dilectoribus suis inuitis ablaturum, nec aliquid Deo potentius, Deum & illos separaturum. Gaudium vero quale quantumue est, vbi tale ac tantum bonum est!

C A P V T XXXV.

De mutua charitate Sanctorum in cælis.

I **C**Or humanum, cor indigens, cor expertum ærumnas & misérias, imo obrutum miserijs, quantum gauderes, si in his

his omnibus abundares? Interroga intima tua, si capere possint gaudium suum de tanta beatitudine sua. Sed certe, si quis alius, quem omnino sicut teipsum amares, eandem beatitudinem haberet, duplicaretur gaudium tuum: quia non minus gauderes pro eo, quam pro teipso. Si vero duo, vel tres, vel multo plures idipsum haberent, tantumdem pro singulis, quantum pro teipso gauderes, si singulos sicut teipsum amares. Ergo quid erit in illa perfecta charitate innumerabilium beatorum Angelorum & hominum, & ubi nullus diligit alium minus quam seipsum? Non enim aliter gaudebit vnusquisque pro singulis alijs, quam pro seipso.

2 Si ergo cor hominis de tanto bono suo vix gaudium suum capiet, quomodo capax erit tot & tantorum gaudiorum? Et vtique, quantum quisque diligit aliquem, tantum de bono eius gaudet. Et sicut in illa beata foelicitate vnusquisque sine comparatione plus amabit Deum, quam se, & omnes alios secum: ita plus gaudebit absque æsti-

æstimatione de felicitàte Dei, quam de sua,
 & omnium aliorum secum. Et si Deum sic
 diligent toto corde, tota mente, tota ani-
 ma, vt tamen totum cor, tota mens, tota ani-
 ma, non sufficiat dignitati dilectionis: pro-
 fecto sic gaudebunt toto corde, tota men-
 te, tota anima; vt tamen totum cor, tota
 mens, tota anima, non sufficiat plenitu-
 dini gaudij.

C A P V T XXXVI.

De pleno gaudio vite æternæ.

I **D**Eus meus, & Dominus meus, spēs
 mea, & gaudium cordis mei, dic
 animæ meæ, si hoc est gaudium, de quo
 nobis per Filium tuum dicis: Petite, & ac-
 cipietis, vt gaudium vestrum sit plenum.
 Inueni namque gaudium quoddam plenum,
 & plusquam plenum: pleno quippe cor-
 de, plena mente, plena anima, pleno toto
 homine, gaudio illo adhuc supra modum
 supererit gaudium. Non ergo totum illud
 gaudium intrabit in gaudentes, sed toti

2 gau-

gaudentes intrabunt gaudium illud.


2. Dic Domine, dic seruo tuo intus in corde meo: si hoc est gaudium, in quod intrabunt serui tui, qui intrabunt in gaudium Domini sui. Sed certe gaudium, illud, quo gaudebunt electi tui, nec oculus vidit, nec auris audiuit, nec in cor hominis ascendit. Nondum ergo cogitaui aut dixi, Domine, quantum gaudebunt electi tui. Vtrique tantum gaudebunt, quantum amabunt: tantum amabunt, quantum cognoscent. Et quantum te, Domine, cognoscent, quantum te amabunt? Certe nec oculus vidit, nec auris audiuit, nec in cor hominis ascendit in hac vita, quantum te cognoscent & amabunt in illa vita.

3. Oro te, Deus meus, cognoscam, te, amem te, vt gaudeam de te. Et si non possum in hac vita ad plenum, vel proficiam de die in diem vsque dum veniat illud ad plenum. Proficiat in me hic notitia tua, vt ibi fiat plena. Crescat in me hic amor tuus, vt ibi sit plenus; vt hic gaudium meum sit in spe magnum, & ibi in re plenum.

Y

Deus

Deus verax, peto vt accipiam quod promittis, vt gaudium meum sit plenum. Meditetur inde interim mens mea; loquatur inde lingua mea; amet illud cor meum; sermocinetur os meum. Esuriam illud anima mea; sitiatur illud caro mea, desideret illud tota substantia mea, donec intrem in gaudium Domini mei: Qui est trinus & vnus Deus benedictus in sæcula, Amen.




Deus videri, puto ut recipiam quod pro-
 meritis, et gratiam habeam in personam Me-
 am. Etenim meo meritis meo; sed quia in-
 te huiusmodi, etiam illud est meum: sed
 meum, et illud est meum. Etenim illud animi
 meum, et illud est meum. Etenim illud
 meum, et illud est meum. Etenim illud
 meum, et illud est meum. Etenim illud
 meum, et illud est meum. Etenim illud
 meum, et illud est meum. Amen.



1871
The first of the year, 1871, was a very
dry one, and the crops were much
affected. The wheat was particularly
suffering, and the yield was very
small. The corn was also much
affected, and the yield was very
small. The other crops were also
much affected, and the yield was
very small. The weather was very
dry, and the crops were much
affected. The wheat was particularly
suffering, and the yield was very
small. The corn was also much
affected, and the yield was very
small. The other crops were also
much affected, and the yield was
very small.

The second of the year, 1871, was a
very wet one, and the crops were
much affected. The wheat was
particularly suffering, and the yield
was very small. The corn was also
much affected, and the yield was
very small. The other crops were
also much affected, and the yield
was very small. The weather was
very wet, and the crops were
much affected. The wheat was
particularly suffering, and the yield
was very small. The corn was also
much affected, and the yield was
very small. The other crops were
also much affected, and the yield
was very small.





4-3-4

